

2

DE
SINENSIIUM
RITIBUS POLITICIS
ACTA
SEU

R. P. FRANCISCI XAVERII
Philipucci Missionarii Sinensis
è Societate J E S U ,

PRÆLUDIUM

*AD PLENAM DISQUISITIONEM
an bonâ vel malâ fide impugnentur opinio-
nes & praxes Missionariorum Societatis
J E S U in regno Sinarum ad cultum Con-
fucii & defunctorum pertinentes.*



Lugduni & Vaneunt.

PARISIIS

Apud NICOLAUM PEPIE^r, viâ
Jacobæâ, sub signo sancti Basilii.

M. DCC.

CUM PRIVILEGIO REGIS.

21
MUSEUM

RITIBUS POLITICIS

ACTA

21

THE VAN METER

THE VAN METER

THE VAN METER

THE VAN METER

THE VAN METER

THE VAN METER

THE VAN METER

THE VAN METER

THE VAN METER

THE VAN METER

THE VAN METER

THE VAN METER

THE VAN METER

THE VAN METER

THE VAN METER


THE VAN METER

THE VAN METER

THE VAN METER

THE VAN METER

THE VAN METER



INDEX

CAPITUM ET RERUM.

Status quaestionis motæ inter Missionarios Sinicos circa cultum politicum Confucii & Defunctorum.
pag. 1. usque ad p. 7.

CAPUT I.

Suppositiones 42. falsa quæ inveniuntur in quaestis
R. P. Fr. de Morales apud Romanam Curiam.
pag. 8.

1. Falsa suppositio. PP. Societatis non proposuerunt initio Sinensibus Neophytis jus positivum circa festa, jejunia, confessionem & communionem annuam. p. 8.

2. Absolutè non administratur Sinensibus mulieribus Sacramentum Extr. unct. à PP. Societatis. p. 10.

3. In Baptismo Mulierum quasdam Sacramentales ceremonias omittunt PP. Societatis. p. 10.

4. In Sinis statutum est ut 30. pro 100. in mutuo accipiantur. p. 11.

5. In Sinis solus fœnerandi modus est ex solo motivo mutui cum aliquo sortis periculo. p. 11.

6. Sinensibus accipiendi licitè aliquid ex commutato titulos non aperuerunt PP. Soc. p. 12.

7. Absolutè usurariæ sunt ades ubi accepto pignore

I N D E X.

- pecunia fœneratur & lucrum exigitur.* p. 13.
8. *Sinenses ad fœnerandum compelluntur auctoritate judicum.* ibid.
9. *PP. Soc. ignorant illicitam esse usuram ad quam quis auctoritate Principis compellitur.* ibid.
10. *Fam li cien. Significat dare pecuniam ad usuram.* p. 13. 14.
11. *PP. Soc. malè docent Sinenses circa id quod ex suo præstare debent ad festivitates publicas.* p. 14.
12. *Permissum est Sinensibus adire fanum Idoli Chim Hoam.* p. 15.
13. *Confucius ut Sanctus habetur & colitur.* ibid.
14. *Aula Confucii, verum templum.* p. 16.
15. *Munera Confucio oblata, vera sacrificia.* p. 17.
16. *Præfecti Sinenses qui Confucio munera offerunt, Sacerdotis officium gerunt.* p. 18.
17. *Capra, candela, flores &c. Confucio oblata, vera victima.* ibid.
18. *Litterati Sinenses à Confucio volunt impetrare ingenium &c.* ibid.
19. *Sinenses accipiunt aliquid de Idolothytis & oblationibus in aula Confucii.* p. 19.
20. *PP. Soc. permittunt coli exterius Confucium ab iis qui gestant occultam crucem.* ibid.
21. *PP. Soc. levi de causa permittunt Sinenses prætergredi hoc inconcussum axioma non sunt facienda mala ut eveniant bona.* p. 20.
22. *Aulæ defunctorum, vera templa.* p. 21.
23. *Oblata defunctis, vera sacrificia.* ibid.
24. *Mensa ubi defunctorum oblationes deponuntur, verum altare.* p. 21. 22.
25. *Paterfamilias offerens defunctis munera Sacerdotis officium gerit.* p. 22.
26. *Capra, odores, flores &c. oblata mortuis, vera victima.* p. 23. 24.

INDEX.

27. Oblationes defunctorum sunt tam impetratio-
nis quam gratitudinis causâ. p. 24.
28. Ante mensam defunctorum Sinenses multa à
defunctis postulant. p. 25.
29. Soli Christiani Sinenses dicunt in oblationibus
defunctorum intendi tantum cultum politicum. p. 26.
30. Tabella defunctorum, animæ sedes apud Sinen-
ses. p. 28.
31. Anima defunctorum verè existimantur assistere
oblationibus quas ipsis faciunt viventes. p. 30.
32. Ante Baptismum non docentur Sinenses soli
Deo sacrificare licitum esse. p. 31.
33. Illicitus est omnis Sinensium defunctorum cul-
tus. p. 34.
34. Xim, idem quod sanctus. ibid.
35. Sinenses sacrificant nomini Imperatoris viventis
in tabella. p. 35.
36. Mensa ubi est tabella Imperatoris, verum al-
tare. p. 36.
37. In templis Deo dicatis nefas est collocare tabel-
lam Imperatoris eamque salutare more Sinensium. ibid.
38. Permittitur oratio pro defunctis infidelibus. p. 37.
39. PP. Soc. pro defunctis infidelibus sacrificant &
orant in Missa. ibid.
40. PP. Soc. non prædicant Sinensibus Christum
crucifixum. ibid.
41. Non ostendunt imaginem Crucifixi. p. 38.
42. Ratio cur non ostendant est quod Sinenses scan-
dalizentur. ibid.

CAPUT II.

DE translatione Sinica decreti sacre Congr. ann.
1645. p. 40. non est fidelis. ibidem. quis interpres,
ibidem & p. 42. ejusdem translationis errata. p. 44.
Perperam transtulit responsa ad quæsitâ.

I N D E X.

1. De oblationibus defunctorum. p. 45. usque ad 54.
2. De muneribus Confucii. p. 54. usque ad 71.
3. De muneribus Chim Hoam. p. 71. usque ad 75.
4. De prædicando Christo. p. 75. usque ad 89.
5. De Tabellis defunctorum. p. 89. usque ad 91.
6. De fœnore. p. 91. usque ad 95.
7. De ceremoniis sacramentalibus in Baptismo & Extrema-unctione mulierum. p. 95. usque ad 98.
8. De festis, abstinencia, & jejuniis. p. 98. usque ad 102.

CAPUT III.

Quid interpretes amiserit in translatione Sinica decreti illius Pontificii. p. 102. usque ad 116.

CAPUT IV.

Cultus Confucii & defunctorum politicus malâ fide impugnatur. p. 116.

Propo. 1. Controversiæ Sinicæ Sinenfibus imprudenter communicatæ. p. 119.

2. Sacrificium verum cum aliis confunditur per equivocationem litteræ Ci. p. 123.

3. P. Fr. Varus contra decreta Apostolica & ipsius superiorum prohibitiones damnat absolute Tabellas defunctorum. p. 129.

4. P. de Morales nimium extulit obsequium filiale. p. 136.

5. Præceptum 4. decalogi minus aptè in positivum & negativum dividitur. p. 139.

6. Inaudita Dei præcepta circa defunctorum funera proponuntur. p. 141.

7. P. de Morales permittit in Sinis quæ damnari Romæ curaverat. p. 143.

8. Laudatur Confucius à P. de Morales ejusque Socii suprâ quàm debeat. p. 146.

ERRATA PRÆCIPUA.

PAg. 31. lin. 8. ^o de agimus *lege* de quo agimus. p.
34. lin. 24. supponis , *lege* supponatur. p. 46.
lin. 11. littera *lege* litteram. p. 63. lin. 5. illam
lege illa. p. 73. lin. 6. hæc verba tolle *hac verba* ,
lin. 23. prohibitum , idolo. *lege* prohibitum ; sic , idolo.
p. 80. lin. 15. & gentilibus *lege* & à gentilibus. p. 105.
lin. 11. quæditorum *lege* quæsitorem. p. 106. l. 7. dilatio
lege delatio. p. 118 lin. 24. propositivum *lege* positivum.
p. 126. lin. 28. 1699. *lege* 1669. p. 144. lin. 18. duode-
cimo *lege* duodecimâ. p. 147. lin. 1. educendos *lege*
edocendos. p. 152. lin. 23. leges *lege* legi.




EXTRAIT DU PRIVILEGE
du Roy.

Par grâce & Privilege du Roy, donné à Versailles le 12. Avril 1700. signé NOBLET, & scellé : Il est permis à Nicolas Pepie Marchand Libraire, d'imprimer, faire imprimer, vendre & debiter un Livre intitulé, *Anciens Memoires sur les Ceremonies de la Chine*, seu de Sinensium Ritibus politicis acta, contenant plusieurs Traitez & Pieces tant latines que françoises, dont la plupart ont été cy-devant imprimées : & ce pendant le temps & espace de six années consecutives. Avec défenses à tous Imprimeurs & Libraires & autres, d'imprimer ou faire imprimer, vendre & debiter ledit Livre sous quelque pretexte que ce soit, aux peines & ainsi qu'il est plus amplement porté par lesdites Lettres de Privilege.

Registré sur le Livre de la Communauté des Libraires & Imprimeurs de Paris, le 15. May 1700.

Signé, C. BALLARD, Syndic.

R. PATRIS



R. P. FRANCISCI XAVERII
PHILIPPUCCII
MISSIONARII SINENSIS
E SOCIETATE JESU,
PRÆLUDIUM
SCRIPTUM ANNO 1682.

*AD PLENAM DISQUISITIONEM,
An bonâ, vel malâ fide impugnentur
opiniones & praxes Missionariorum So-
cietatis JESU in Regno Sinarum,
ad cultum Confucii & defunctorum
pertinentes.*

PRÆMONITIO DE STATU
Quæstionis.

Postquàm ad divinam legem prædican-
dam Patres Societatis JESU ab anno
Christi 1581. in Sinarum Regnum ingressi

A

sunt; indefesso studio, diuturnis, & impro-
bis laboribus, summaque sedulitate per plu-
rimos annos ad discendam Sinesium lin-
guam, & perfectam characterum, rituum, ac
morum notitiam obtinendam toto nisu in-
cubuerunt: præterea plurimos ubique omnis
generis literatos viros fideles juxta, ac infi-
deles sæpissimè, & accuratâ diligentia con-
suluerunt, eaque omnia, quæ tum ex eorum
responsis, tum ex diuturna librorum Sinen-
sium lectione hauserant, longis multorum an-
norum inter se collationibus discussuerunt, ac
deniquè ea, quæ controvertebantur, voce,
& scripto exhibitis in utramque partem ar-
gumentis, diù & acerrimè inter se disputa-
runt; ne quis Gentilis ritus superstitioni, vel
scandalo obnoxius nascenti Ecclesiæ permit-
teretur, & ne magno fidei propagandæ im-
pedimento, cultus aliquis prohiberetur lici-
tus. Demùm post seriam ejusmodi plurimo-
rum annorum dissertationem factam à viris
in lingua, libris, ac Sinicis moribus versatissi-
mis, qui totam ætatem in hac missione, ac
studio consumpserunt in controversiarum il-
larum certas resolutiones convenerunt, su-
periorum etiam auctoritate firmatas, quarum
praxes singulis præscriptas omnes Missionarii
Societatis J E S U ad hæc usque tempora in
toto Sinarum regno constanter observant.

In harum resolutionum pacifica observa-
tione sine ullius obloquentis strepitu perseve-
rarunt usque ad annum circiter trigesimum
tertium hujus sæculi, quo tempore RR. PP.

Frater Joannes Baptista de Morales sacri Ordinis Prædicatorum , & Frater Antonius de Sancta Maria ex sacra sancti Francisci familia Sinense regnum ingressi , post tres quatuorvè annos in studio (qualenam fuerit , postea demonstrabitur) linguæ & rerum Sinicarum impensos , contra opiniones , ac praxes Patrum Societatis ; acrem , ac non satis præmeditatam litem moverunt , in qua ulterius promovenda , à quibusdam eorundem sociis usquè modo viribus contenditur. Præterea idem R. P. de Morales eam ob rem Romam perrexit , & sacre Congregationi de Propaganda Fide septemdecim quæsitæ obtulit , partim circa opiniones , & praxes supradictas , partim circa alias , quas sine ullo fundamento Patribus Societatis affinxit , uti infra demonstrabitur ; & quamvis in his quæsitis apertè non declaret quæsitæ à se de his omnibus accusari Societatis Jesu Missionarios ; constat tamen evidenti ratione illos istis quæsitis , harum omnium opinionum , & praxium supponi , & declarari autores. Primò enim illa quæsitæ desumpta sunt ex quindecim animadversionibus Hispanicè *reparos* P. Fr. Antonii de S. Maria ejusdem Ordinis in opiniones , & praxes Missionariorum Societatis Jesu apud Sinas. Secundò eodem tempore , quo illa quæsitæ Romam ferebantur , vel ad hoc parabantur ex sollicitatione eorundem Patrum , Episcopi Philippinarum litteris datis anno 1636. ad Urbanum VIII. summum Pontificem gravissimè conquesti sunt , de

quibusdam in rei veritate supposititiis praxibus Patrum Societatis apud Sinas, quæ cum illis quæsitis prorsus conveniunt & hi quidem Ecclesiæ Prælati habitâ postmodum magis sincerâ rerum cognitione, anno sequenti litteris ad eundem summum Pontificem datis, nimis properam accusationem retractarunt, asserendo eam missam fuisse ex minùs fidei delatione sibi facta, à non satis æquis rerum æstimatoribus, ideoquè sibi id religioni duccendo *Patres Societatis à tam indignis querimoniis vindicare, & eorundem Patrum innocentia, & veritatis patrocinium pro virili suscipere*; quæ litteræ his ipsis verbis conscriptæ possunt ad justam defensionem exhiberi. Tertio idem manifestum est ex publica per Asiam, atque Europam sparsa à dictis Patribus fama, quâ Patres Missionarii Societatis *Jesu* fiebant illarum opinionum, atque praxium omnium auctores, de quibus Romæ quæstiones institutæ fuerunt. Igitur evidens est apud omnes nec dissidentibus ipsis impugnatoribus illa quæsitâ supponere, quod eæ sint opiniones, & praxes Patrum Societatis *Jesu*, in quas Romana censura procurabatur. Quare necesse non est rem notissimam ultra probare, scilicet quod opiniones & praxes, de quibus fiunt illa quæsitâ, Missionariis Societatis *Jesu* à quæstorum auctore imputentur.

Cum verò horum quæstorum notitia ad has partes pervenisset, atque insuper responsa approbata à S. Congregatione de Propaganda Fide anno 1645. Missus est ex parte Societa-

tis P. Martinus Martinus Vice-Provinciae Sinensis ad curiam Romanam procurator, qui certiore facto summo Pontifice Alexandro VII. & sacrâ Congregatione de Propaganda Fide, eidem aliquot quæsitæ de rebus Sinicis ad praxim magis necessaria proposuit. Cum autem hæc quæsitæ facta sint cum circumstantiis, & explicatione rerum longè diversa ab illa, qua usus fuerat Fr. Joannes Baptista de Morales, ideòque à S. Congregatione accepisset responsa multò diversa, hinc sumptâ perperam occasione impugnatores opinionum, & praxium Societatis Jesu apud Sinas, palam conqueruntur, quòd quæsitæ P. Martini Martinii mala fide fuerunt propositæ, factâ scilicet casuûm relatione diminutâ, & parùm fideli, veritatiquè contraria; atque insuper asserunt, quòd Patres Societatis J E S U sequentes responsa facta à S. Congregatione P. Martino Martinio malâ fide, adeoque nec tutâ conscientiâ operentur; voluntquè quod ad sequenda responsa facta R. P. Fr. de Morales strictissimè teneantur, utpotè quæ optima fide, & omnimodâ sinceritate concinnatis quæsitis fuerunt reddita, & à summo Pontifice approbata, hoc quoque magna contentione asserit R. P. Fr. Dominicus Navarrette in sua historia Sinica, in qua quidem Missionarios Societatis J E S U apud Sinas ita impetiit ut totum librum calumniis adversus plures Europæ nationes, ac præsertim contra Societatem implendo, hoc palam detrahendi studio, plus suæ causæ,

quàm alienæ famæ apud æquos lectores , detraxerit , sed de hujus auctoris stylo prorsus intolerabili , & supinâ rerum Sinicarum inscitiâ integrè , & efficaciter alio loco agetur , ut veritas , & innocentia à sua propria sede per summam injuriam deturbata ad pristinum ejus thronum restituatur.

Multi jam prodierunt ex parte Societatis tractatus , & Deo dante plures alii prodituri sunt , in quibus solidè , & evidenter ostenditur eam accusationem malæ fidei contra quæsitâ P. Martini Martinii suscitâtam esse, falsissimam. Quod si verò aliquis horum tractatuum clarissimis probationibus fidem adhibere detrectet , æqui , bonique consulat se ad irrefragabile testimonium amandari , scilicet ad archivium sacræ Congregationis de Propaganda Fide , ubi justum volumen inveniet , in quo ea , quæ ad quæsitâ P. Martinii pertinent prolixâ , & fideli narratione referuntur , ex qua desumptum esse compendium , quod in authenticis responsis in lucem prodit , certò constabit.

Cum verò nunc quoquè effervescente diversarum opinionum circa easdem quæstiones in Sinica Missione studio , in hoc potissimum versetur controversia , quænam sit recta , & vera facti relatio , sive casuum propositio , ritibus , ac consuetudinibus Sinarum consentiens , atque malæ fidei utraque pars adversam incuset , ad indagandam radicitus veritatem , quæstionem ab ovo instituere necesse est. Quapropter in præsentî tractatu ,

tanquam in totius controversiæ præludio
xaminandum est, quâ fide, & veritate R.
P. Fr. de Morales, qui in hac materia primus
lapidem movit, & vexillum prætulit, sua
quæsitâ apud Romanam Curiam proposuerit,
& rituum Sinicorum qui ad illa pertinebant,
decorationem exhibuerit; deinde qualia Si-
nensibus Neophytis Romana responsa reddi-
derit, ac demum qualem doctrinam circa eas-
dem controversias libro Sinicè edito docue-
rit, & quomodò ejus socii in hac re eum
fuerint imitati.

Ad hæc autem omnia methodicè exponen-
da tractatus hic in quinque dividitur capita.
In primo describitur catalogus 42. falsarum
suppositionum quæ in septemdecim quæsitis
à R. P. Fr. de Morales apud Romanam Cu-
riam propositis inveniuntur. In secundo affer-
tur illorum quæditorum in Sinicam linguam
translatio facta pro Neophytis, & defectus in
illa commissi ostenduntur. In tertio, ea quæ
in dicta translatione fuerunt omissa, declaran-
tur. In quarto mala fides, quâ impugnatur po-
liticus cultus Confucii, & defunctorum,
multipliciter confirmatur. In quinto recitatur
catalogus variarum propositionum, quæ in li-
bris à sociis Patris de Morales Sinicè conscri-
ptis inveniuntur. Quibus propositionibus effi-
caciter quoque confirmatur, id quod in hoc
tractatu breviter probandum assumpsi.

CAPUT PRIMUM.

Catalogus 42. falsarum suppositionum quæ in 17. quæstis à R. P. Fr. Joanne Baptista de Morales apud Romanam Curiam propositis, inveniuntur.

Prima suppositio falsa: In quæsito primo falso supponitur à Patribus Societatis JESU à Sinicæ Missionis initio, jus positivum circa festa, jejunia, confessionem, & communionem annuam absolutè non fuisse Neophytis publicatum. Etenim hæc omnia paulatim & suaviter ab ipso Missionis initio Neophytis publicata fuerunt à Missionariis Societatis Jesu, tum libellis, & annuis Kalendaris publicè excusis, eo ferè modo, quo in Europa quotannis vulgari solent, tum etiam publicis, ac privatis exhortationibus, quibus consuetudo servandi Ecclesiæ præcepta in hanc nascentem, teneramque adhuc Ecclesiam sensim introducebatur, horum publicum, & authenticum testimonium præbent Kalendaria singulis annis à Patribus Societatis in Regno Sinarum typis vulgata, in quibus notata erant festa, & jejunia, quæ Ecclesia à fidelibus præcipit observari; & quoad confessionem & communionem annuam extat perpetua publicatio in libro doctrinæ Christianæ, quem Sinicè vocant . . .

Tien

Tien . . . chu . . . Kiao . . . yao qui liber in lucem prodiit operâ P. Michaelis Rogerii, ab ipsis Missionis Sinicæ primordiis, & omnium passim Neophytorum manibus attretatur. Præterea in libris divulgatis, in quibus continentur puncta ad examinandam conscientiam in ordine ad confessionem sacramentalem expressè declaratur peccatum esse supradicta Ecclesiæ præcepta non servare, adeoque Neophytos ad illorum præceptorum observantiam teneri. Quæ cum tam publica sint apud Sinas, & manifesta omnibus veritatis testimonia, immeritò nec sine magna injuria supponitur à quæsitore dictum jus positivum à Patribus Societatis Jesu, non fuisse Sinensibus absolutè publicatum.

Hic verò mirandum magnoperè videtur; R. P. Fr. de Morales, qui eam Patribus Societatis finxit accusationem, in similem culpam, quam in aliis sine fundamento carpere volebat, postmodum palam, & in omnium conspectu incidisse: etenim cum in responsionibus ad sua quæsitæ, novum datum esset sedis Apostolicæ præceptum de jure positivo, circa supradicta Sinensibus promulgando, adeoque Sinensibus Neophytis declarare debuisset, illius juris positivi observationem cadere sub præceptum, ipse in propria versione illarum responsionum in Sinicum idioma, tantummodò affirmavit, supradicta præcepta servare *convenire*, seu decere, uti infra ostendetur; ideoque hoc ad consilium, non autem ad præceptum pertinere declaravit.

Secunda. In quæsito secundo falsò supponitur à Patribus Societatis Jesu absolute non administrari mulieribus Sinensibus sacramentum extremæ-unctionis, notum etenim omnibus, & exploratum apud Sinas, eosdem Patres datâ tantùm *gravi necessitate proportionatâ* id olim omisisse, & adhuc omittere. Id quidem olim egerunt solidæ innixi Theologorum doctrinæ: nunc verò eandem praxim approbatam per responsa ad quæsita P. Martinii Pontificio decreto firmata, observare sine scrupulo, aut periculo calumniæ non desistunt. Cum igitur prædictam praxim Patres Societatis in Sinis eodem semper modo supradicto servaverint; cur quæso quæsitör suo generali quæsitoro tacite accusat quasi passim mulierum unctionem extremam Sine discrimine omitterent.

Tertia. In eodem quæsito secundo falsò supponitur, Patres Societatis Jesu quasdam sacramentales ceremonias omittere in baptismo mulierum, & abstinere in earum infirmitatibus ab extremæ unctionis collatione, solum ex motivo zeli Sinensium erga suas mulieres, & scandali ex dictis actionibus secururi. Nam ratio omittendi saltem interdum unctionem mulierum in iis circumstantiis, de quibus supra, & prætermittendi aliquas ceremonias baptismi, quas adfert quæsitör, non est adæquata, nec principalis: cùm præcipua ratio sit, quod tota Ecclesia Sinica aliter evidenti periculo totalis ruinæ exponeretur: inde enim nascerentur gravissimæ gentilium

calumniæ , perturbationes , & persecutiones
fœvissimæ , uti frequens ipsorum impugnan-
tium experientia ostendit , ob quam , Patrum
Societatis plerumque sequi praxim coguntur ,
quam antea damnabant.

Quarta. In quæsito tertio falsò supponitur
in Sinarum Regno lege statutum esse , ut in
mutuo 30. pro 100. accipiantur , absque res-
pectu periculi fortis , lucri cessantis , & damni
emergentis. Certum est enim Sinenses etiam
infideles lumine naturali cognoscere malum
esse, majus quàm æquum est, lucrum ex pecunia
alteri ad usum tradita , recipere ; & si quis in
exigendo lucro limites æquitatis transcendat
exosus fit omnibus , & digito notatur. Quæso
lex illa Sinensis , de qua agit quæsitor , quæ
nullibi in Sinis hætenus apparuit , ad quæsiti
illius veritatem tuendam è latebris in lucem
aliquando eruatur.

Quinta. In eodem quæsito falsò supponi-
tur in regno Sinarum alium modum fæne-
randi pecuniam non haberi , nisi ex solo mo-
tivo mutui cum aliquo periculo fortis ; ete-
nim ratio lucri cessantis , & damni emergen-
tis in omnibus nationibus nota , non est in-
cognita Sinensibus , quod est hominum genus
inter omnes nationes eximiè acutum , & pers-
picax in eo , quod pertinet ad lucrum. Nam-
que Sinenses : quod dictu incredibile vide-
bitur , in unius quadrantis ærei divisione , di-
ligentiam vincunt mathematicorum , qui gra-
dus dividunt in prima , secunda , ac tertia
minuta nummum enim æreum ip 10. partes

dividunt , & singulas illarum in alias decem ; iterum , atque iterum distinguunt , & in mensuris rerum , quas vendunt , usque ad numeranda singula grana descendunt ; unde satis colligi potest quòd res adeò nota , quale est lucrum cessans , & damnum emergens , acutissimam illam , & fastidiosam in contractibus Sinarum perspicaciam nullo modo possit effugere.

Sexta. Ibidem falsò supponitur Neophytos Sinenfes à nostris Patribus non fuisse edoctos quibus titulis aliquid ex commodata pecunia licitè accipere possent : falsitas hujus suppositionis evidenter probatur ex eo , quod Patres Societatis ab ipso Missionis initio Neophytos Sinenfes edocere cæperunt lucrum ex mutuo , sine titulo periculi sortis , aut lucri cessantis aut damni emergentis esse illicitum , atque insuper aliud , quod his titulis non est proportionatum. Testis est liber P. Michaëlis Rogerii , cui titulus est veridica S. legis institutio cap. 14. pag. 33. facie 2. versiculo 7. & 8. hic liber typis datus est anno Domini 1584. & Imperatoris *Vân lie* à Sinis *Kia xin* noncupato , qui annus erat quartus à Patrum Societatis ingressu in regnum Sinarum. Testes insuper sunt multi alii libri successivè à dictis Patribus editi , in quibus explanando decem Dei præcepta , ea quoque quæ ad usuram pertinent , fusè , & accuratè explicantur. Unde satis patet , quàm parum perspectis rebus , & neglectâ librorum nostrorum lectione conscriptis tumultuariè quæsitis R. P.

Frater de Morales Romam provolarit.

Septima. In quæsito quarto falsò supponitur, in regno Sinarum, illas domos, ubi accepto pignore pecunia fœneratur, & lucrum exigitur ex genere suo, & absolutè esse usurarias; etenim si in receptione lucri justitia fervetur, & in venditione pignoris, tantum recipiatur quantum debitor ex justis titulis debet, quâ ratione harum domuûm Domini pro usurariis haberi possunt?

Octava. Falsò supponitur ibidem illos Sinen-
ses, qui in dictis domibus pecuniam fœnerant, ad id agendum judicis auctoritate compelli. Nam unicuique liberum est talem negotiationem exercere, vel ab ea cessare, neque poterat tale quid asserere R. P. de Morales, nisi fortè iis paucis annis, quibus in Sinis fuerat domi sese continuisset, ac consuetudinum totius regni Sinici notitiam acquirere neglexisset.

Nona. Falsò supponitur in eodem quæsito, horrendè supina in Patribus Sôcietatis ignorantia, quasi verò putent licitum esse frangere jus divinum usuram exercendo, dum quis à Principe compellitur ad illam exercendam. Profecto si hæc intoleranda in quantumvis novello discipulo Theologiæ imperitia, cujus tot insignes viros tacitè insinulat quæsitòr, à Patribus Societatis in minimo sociorum R. P. de Morales argueretur injuriam esse censerent ferro, & flammâ delendam.

Decima. Falsò supponitur ibidem, Sinicum hunc loquendi modum . . . *fam* . . *li* . .

cien ex se significare, dare pecuniam ad usuram; cum revera generaliter significet dare pecuniam ad lucrum, vel per usuram, vel ex aliquo justo titulo recipiendum. Ex hac autem Sinica phrasi perperam intellectâ, quæsitör in suo tertio, quarto, & quinto quæsito tacitè arguit Neophytos Sinenses quasi usuram sine scrupulo conscientiae exerceant; Missionarios verò Societatis, quasi illam suis Neophytis permittant, in quo videre licet, ad quam famæ restitutionem quæsitör teneatur.

Undecima. In sexto quæsito falsò supponitur, immò urbs, & orbis ad huic falsæ suppositioni credendum allicitur nempe Patres Societatis non rectam Sinenses Neophytos edocere doctrinam, circa id, quod agere debent in contributionibus, quæ ab eis exiguntur ad communem populi festivitatem sive illicitam, sive indifferentem, ad hanc falsam suppositionem penitus explodendam sufficit exhibere plurima, & exactissima circa hanc materiam quæsitâ ad R. P. nostrum Generalem à Patribus nostris olim è Japonia missa, & Romæ alibique diligenter à celeberrimis eo tempore Theologis discussa, & resoluta: hinc enim planè constat, quo studio, ac sedulitate in his; & similibus casibus Patres Societatis se gerant, non verò temerariè, & sine conscientia, uti ex suppositione quæsitöris sequeretur.

Duodecima. In septimo quæsitò falsò, & admodum injuriosè supponitur Patres Socie-

tatis Neophytis Mandarinis, sive Magistratibus permisisse, ut fanum idoli *Chim Hoam* adirent, ibique nefariâ simulatione, exterius quidem reverentiam idolo exhiberent, occultè verò secum allatam crucem adorarent. Cum publicè notum sit, in toto regno Sinarum Patres Societatis ne per umbram quidem tam abominabile factum permisisse suis Neophytis; quisque ponderet, quàm sit atrox illa in Societatem injuria, dum per tale quæsitum, tam intolerabilis inscitia, aut conscientia desperata Patribus Societatis imputatur: Quasi verò tam longa superassent maria non ut alios ad Cælum manuducerent, sed secum dissimulatâ in illis idololatriâ in infernum pertraherent, neque dici potest R. P. Fr. de Morales ex summa Theologiæ ignorantia tale quæsitum proposuisse Curiae Romanae, ad quod resolvendum, novellus quilibet Theologus suffecisset; sed è contra manifestum est ex probatis in præloquio, Patres Societatis, tanquam id stolidè, vel potius, perfidè permittentes perstringere, & toti Orbi digito monstrare voluisse.

Decimatertia. In octavo quæsito falsò supponitur Confucius à Sinis tanquam vir sanctus existimari, & secundum hanc sanctitatis formalitatem ab iisdem coli. Hæc falsa suppositio in voce Sinica *Xim* tota innititur, perinde ac si ista vox ex proprio, & communi Sinenfium sensu sanctitatem significet, eo modo, quo vox latina *sanctus*, vel *sanctitas*, in Ecclesia Catholica sumitur; debebat sanè au-

Et quæstorum advertere, hanc vocem *sanctus*, ut alias plures voces latinas ab Ecclesia assumptam fuisse ad significandam veram, perfectam, & supernaturalem sanctitatem; hæc autem significatio ante talem assumptionem, non inerat voci *sanctus*, ut ex antiquis authoribus, ac thesauro latinæ linguæ evidenter constat. Eodem autem modo per Evangelicos Prædicatores in Sinis, & per ipsos Neophytos vox *Xim* assumpta est ad significandam Sinico idiomate veram, perfectam, & supernaturalem sanctitatem, de se autem hæc vox Sinica talem significationem non habet, uti in vocabulariis, ac libris Sinicis clarè perspicui potest; de quo rursum capite 3. agetur.

Decimaquarta. In eodem quæsito falsò supponitur aulam, in qua à litteratis Sinensibus suus magister Confucius honoratur, templum vocari debere. Hujus suppositionis manifesta falsitas ad evidentiam ostenditur, in pluribus tractatibus, ubi sensus Sinensis litteræ *miao* minutissimè exquiritur, & explicatur; ibique graves, & non pauci lapsus aliquorum hanc litteram malè explicantium referuntur; hic autem breviter annotare juvat; id quod novissimè R. P. Franciscus Varus Ordinis Prædicatorum, in explicatione hujus litteræ *Miao* universaliter pronuntiat, hisce verbis ex Hispanico in latinam linguam conversis. *In nullo libro Sinico invenietur, quod hæc littera Miao Imperatoris palatium, sive aulam significet. Ne plurimos textus Sinenses hic, contra quam*
exigit

exigit brevitās hujus catalogi, congeramus, vocabularium unum in medium afferre sufficiat, cui nomen Chim Cu rum ibi in explicatione litteræ Miao sic habetur.

. ?

Id est omnis regii palatii pars anterior, & magna quorundam Praefectorum aula, ut vocant audientia Miao, vocantur. Hinc apparet, quā cautē universales propositiones sint pronuntiandæ, præcipuē in materiis parū sibi notis. Ad majorem autem supradictorum evidentiam notandum est, dictam Confucii aulam in Imperatoris diplomatibus communiter vocari . . Tay Hio. Id est magnum Gymnasium sive Quoe Hio, id est Regni gymnasium. Aulas autem ejusdem Confucii in singulis urbibus vocari Fū Hio, id est urbis gymnasium, hoc autem nomen omnibus, & solis Confucii aulis convenit, & nullo modo Idolorum delubris.

Decimaquinta. In eodem quæsito falsò supponitur, munera politica à Sinensibus litteratis oblata Confucio esse sacrificia, ideoque actiones illicitas, & Idololatricas. Sacrificiū sive liciti, sive illiciti definitio scholastico rigore discutiatur, eaque conferatur cum ritu munera offerendi Confucio, uti apud Sinas est in usu, & in illorum explicatur libris, clarèque constabit definitum cum definitione in materia nullatenus cohærere; de hac re plures habentur tractatus, in quibus sententia politici cultus erga Confucium solidè pro-

batur, & ab omni superstitionis suspitione, cultus ille vindicatur. In illis quoque perspicuè dissolvuntur impugnantium objectiones, & eorum lapsus demonstrantur. Præterea in secundo, & quarto capite hujus Tractatûs iterum hoc distinctè discutietur.

Decima sexta. In eodem quæsito falsò supponitur illos præfectos Sinenses, qui Confucio munera offerunt Sacerdotis officium gere-re. Prius probandum solidè esset à quæsitore, fieri à Sinensibus sacrificia Confucio, quàm Præfectos appellare sacerdotes. Ubi enim non datur sacrificium, nec sacerdos sacrificans invenitur.

Decima septima. In eodem quæsito falsò supponitur capram integram, candelas, vinum, flores, odores Confucio à litteratis oblata, esse victimas, & hujusmodi oblationes esse sacras; itidem genuflexiones ante ejus nomen in tabula descriptum, esse religiosas. Hæc enim eadem viventis Imperatoris nomini in tabula descripto, Præfectis magistratum adeuntibus, hospitibus in conviviiis, & absentibus benefactoribus adhuc vivis à Sinensibus offeruntur, sine umbra intentionis rem sacram peragendi, de quo vide infra dicenda cap. 2. art. 2.

Decima octava. In eodem quæsito falsò supponitur, quod litterati Sinenses in ritu honorandi Confucium, cæremonias supradictas cum hac intentione perficiant, ut ab eo impetrent ex ipsius meritis optimum ingenium, & magnos in acquirenda sapientia progressus.

Hoc manifestè refellitur ex antiquis , & modernis libris Sinensium , & ex communi litterarum opinione , & praxi , quæ omnia in propriis tractatibus fusè explicabuntur. Quod si quis fortè Sinensium aliter operetur , contra communia sapientiorum Sinensium placita peccat , & illorum se exponit irrisioni.

Decima nona. In eodem quæsito falsò supponitur post munera oblata Confucio ab assistentibus aliquid accipi de idolothytis , & oblationibus ; existimantibus illis infidelibus , quod quicumquè manducaverit ex talibus idolothytis magnum in litteris , & gradibus obtinendis successum sit habiturus , certum est , quod ubi non datur idolum , nec datur idolothytum : Proferantur quæso auctores Sinici qui talia affirmant somnia , quæ nescio ubi repererit R. P. de Morales, nisi fortè in quibusdam vulgi quisquiliis , quorum nemo palàm tale quid proferre audeat , quod communiter ab omnibus litteratis non explodatur. Alibi referetur , rerum Confucio oblatarum distributionis intentio ; & quomodò , dum illæ pro omnibus assistentibus non sufficiunt , ex aliis rebus Confucio non oblati suppleantur. Vide infra cap. 2. art. 2.

Vigesima. In eodem quæsito falsò supponitur non sine gravissima in Patres Societatis injuria , quod illi doceant litteratos , sive præfectos Christianos portando crucem in manibus licere hos venerationis actus erga Confucium exercere ad vitandos tumultus , Missionariorum exilium , & rei Christianæ

apud Sinas excidium. Ista simulatio, si Confucii cultus esset illicitus, intolerabilis planè, & stultissima videretur, ejusque permissio non esset tam facile sine ullo fundamento in Patres Societatis rejicienda, quasi doctrinam ad eò nefariam docerent. Cum vero iidem Patres cultum Confucii merè politicum, demptis superstitionis, Neophytis permittant, evidenter apparet ridiculum esse commentum dicere, quod illis gestandam occultè Crucem pro excusando ritu prorsus in se licito suadeant.

Vigesima prima. In eodem quæsito, in quo per tot modos jam allatos falsò supponitur illicitus cultus Confucii apud Sinas usitatus, aliud cæteris longè deterius falsum supponitur, & stabilitur, nempe quod propter prætextus numero antecedenti relatos Patres Societatis finant Neophytos prætergredi illud communissimum, divinumque axioma, scilicet *non esse facienda mala, ut eveniant bona*. Deus immortalis, quis æquo animo tam enormem calumniam possit sustinere? per hanc enim falsissimam suppositionem hæreticis antiquis, & modernis, Atheorum politicorum sectatoribus aliquomodo comparatur, quibus familiare est Deo simulatum cultum exhibere, & nullum re ipsa Deum agnoscere, nisi proprii corporis commodum; Cujus tam pestiferæ, ac Tartaræ doctrinæ, si non magistri, saltem publici permissores à quæsitore efficimur. Profectò cum professus sit, se iter ad Romanam Curiam aggredi, ut se scrupulis conscientiæ liberaret, mirum prorsus est de his enormibus

calumniis nullum conscientiae scrupulum habuisse, nisi forte ex studio quærendi festucam in oculo fratris, ingentem trabem non senserit in suo.

Vigesima secunda. In nono quæsito circa cultum Sinarum erga suos majores defunctos falsò supponitur. Aulas, ubi iidem defuncti honorantur, verè esse *Templa*. Probandum prius fuerat, progenitores defunctos, tanquam Deos, sive idola à Sinensibus adorari: Etenim ad rationem Templi vel fani absolutè requiritur, ut locus sit ad adorationem ejusmodi destinatus. In pluribus & amplis tractatibus jam demonstratum est, ac postmodum rursus demonstrabitur cultum defunctorum apud Sinas esse politicum, & eorum Aulas pro civilibus domibus computari, hic verò advertere sufficiet nomen, quo sæpè hanc Aulam Sinenses appellant scilicet *su* *tam*; id est *memoriæ aula*, quâ locutione tantummodò significare volunt locum ad perpetuandam progenitorum memoriam erectum. Videatur liber Sinicus nomine *cem* *pu* *yeu* *hio* lib. 1. pag. 3. & 4.

Vigesima tertia. In eodem quæsito falsò supponitur munera defunctis à Sinis oblata esse *sacrificia* quàm autem hoc sit falsum, jam pluribus tractatibus per textus Sinicorum librorum, & rationes Theologicas manifestè probatum fuit, harum rationum summam vide infra cap. 2. art. 1.

Vigesima quarta. In eodem quæsito falsò supponitur mensam in qua dicta munera col-

locantur esse *altare* falsitas hujus suppositionis evidenter patebit; si talis mensa bene expendatur, & quoad nomen & quoad rem, quoad nomen eadem voce illa mensa apud Sinas nominatur, quâ cæteræ mensæ communes, ut cap. 2. infra ostendetur; quoad rem verò, cùm soli Deo vel vero, vel falso altaria erigantur, in quibus victimæ immolentur in sacrificium, & religiosi ritus peragantur, quo fundamento illæ mensæ altaria vocabuntur, cùm in illis nulla fiant, nec vero Deo, nec falso sacrificia? Præterea in Similibus mensis plurium decadam numero pervias, & plateas ritè compositis ad amicos, & magnates comitantibus instrumentis musicis munera, officiosa nuptialia, &c. Plerumque apud Sinas asportari solent, & cum genuflexionibus offerri, an verò omnes illæ mensæ altaria vocabuntur? juxta principia R. P. Fr. de Morales difficile non esset variis rationibus ostendere Sinensium vulgaria munera inter vivos mutuò exhibita esse *sacrificia*, intervenire *sacerdotes*, *victimæ* apponi super *altaria*, & viva *Idola* à Sinensibus adorari, non tot quin plura quod quàm sit absurdum satis ex se perspicuum est, nec ratio brevis catalogi patitur id pluribus ostendere: duo tamen exempla breviter attingere non prætermittam. Tartaris in Imperio Sinarum nunc dominantibus in usu est, ut ante celebriora convivia coram hospitibus boves, capræ, &c. adhuc viventes adducant ibique honoris gratiâ ante illos mactentur, eisdem reverenter offerantur:

his peractis carnes in frustra dissectæ ad parandum convivium efferuntur. Item solent Sinensium liberi in die natali parentum adhuc viventium , vel dum contrahunt matrimonium coram parentibus , & natu majoribus ibi assistentibus in genua procidere , ibi calicem manibus sumunt , elevatis deinde in altum manibus submissè offerunt , ac deglutiunt. Evacuatis denique calicibus pronâ in terram facie , eis venerationem , ac honorem solitum exhibent ; quis autem non admiretur , quod eadem actiones eadem intentione , & erga parentes vivos exhibitæ clarè , & indubitanter politicæ judicentur , nec ullam suspensionem cultûs superstitiosi adferant ; exhibitæ verò mortuis parentibus in grati animi signum tanquam superstitiosæ sacrilegæ , & idololatricæ à quæsitore condemnentur ? reliqua refervantur ad fusiores tractatus supra ea , quæ breviter rursus infra dicentur. Cap. 2.

Vigesima quinta. In eodem quæsito falsò supponitur , quod ille qui offert munera defunctis , estque familiæ caput , *sacerdotis* fungatur officio , & ejus auditores , qui ad libitum eliguntur , sint *sacerdotis ministri* qui alibi ab aſſectis R. P. de Morales etiam *Diaconi* , & *Subdiaconi* immeritò , ne dicam audacter vocantur. Cum falsò supponat quæsitor , quod illa munerum oblatio sit sacrificium , mirum non est , quod in hunc alterum errorem ex priori consequentem impingat , quæ omnia fusè , & clarè alibi refutabuntur.

Vigesima sexta. In eodem quæsito falsò

supponitur Candelas , flores , odores , carnes , vinum , capita caprarum esse *victimae sacrificii* cætera verò esse sacras oblationes , quæ à Sinensibus cultu patriæ suis defunctis exhibeantur. Heu ! quid miseris Sinensibus Christi cultum amplecti volentibus fiet ? quorum scilicet plerique ritus manifestè politici , & in vulgaribus conviviis in gratiam hospitum adhiberi soliti ; quæstoris iudicio idololatriæ condemnantur. Audivi olim virum honestum Lusitanum , qui legatum Lusitaniæ Regis ad Aulam Pekinensem comitatus fuerat attestari , se in solemnibus legato exhibitis conviviis vidisse , integrum caput caprinum immanè , & horrendè bicornè honoris causâ mensis adhibitum. Profectò in ejusmodi conviviis non modo caput caprinum , sed & alia superius allata in hospitis honorem adhibentur , quæ si vivis oblata non movent idololatriæ , aut superstitionis scrupulum , eò quod intentio sit præcisè honorandi , nec movere quoque debent defunctis eadem intentione , eodemque ferè ritu oblata. Vide de his plura cap. 2. art. 1.

Vigesima septima. In eodem quæsito falsò supponitur , quod in dictis ritibus Sinarum intentio dirigatur non solum ad reddendam suis progenitoribus gratiam ob beneficia ab eis accepta , sed etiam ad nova ab illis obtinenda , quæ his ritibus assequi sperant , si singulæ Sinensium sectæ percurrantur , in unaquaque illarum hæc suppositio falsa esse invenietur. Etenim plurimi Sinenses , ac præcipuè ex literatis negantes animæ immortalitatem
nihl

nihil possunt à defunctis sperare, cùm post mortem nihil nisi putridum cadaver superesse putent, alii plurimi putant dari fatum, & expresse negant aliquod bonum, malumvè aliundè posse provenire. Hujus erroris præcipuus auctor est ipsemet collector Ritualis de rebus funeralibus. Denique qui apud Sinas sunt idololatræ pro suis defunctis idola deprecantur, ut eorum animas ab inferorum suppliciis eruant, ideoque toti sunt in procurando defunctis solatio, non in sperando ab eis auxilio; quo igitur fundamento contra omnium Sinarum opinionem dici potest, quod illi à suis defunctis aliquod sperant subsidium.

Vigesima octava. In eodem quæsto falsò supponitur, quod Sinenfes ante mensam, quam quæsitò malè vocat *Altare* defunctorum, deprecationes multas faciant, postulantes sanitatem, longam vitam, abundantiam fructuum, filiorum multiplicationem, & ut ab omnibus iniquis casibus liberentur. Hæc suppositio omninò destruitur axiomate apud litteratos universim recepto, quod petere à majoribus defunctis est contra obsequii filialis perfectionem, ad quod probandum plures Sinici textus ab illis proferuntur, manifestè ostendentes nihil peti solere à defunctis. Illæ autem orationes, quæ in ritibus funeralibus ex scripto leguntur, nomine, & re, sunt verè funebres, & panegyricæ orationes, variis commiserationis affectibus mixtæ, & multis rethoricis figuris exornatæ, demùm puris cære-

moniis, seu politicis officiis ad honorem defuncti exhibendum ordinatis ad fastidium usque, juxta Sinicum morem sunt refertæ. Quæ autem in quæsito postulationes appellantur, sunt faustæ acclamationes, & nihil amplius, quæ etiam in conviviis purè politicis adhibentur, uti videri potest in libro classico Xi Kim dicto.

Vigesima nona. In decimo quæsito falsò supponitur, quod in Regno Sinarum soli Christiani asseverent, quod in oblationibus supradictis solummodo intendunt progenitoribus suis defunctis illam exhibere reverentiam, & illa offerre munera, ac si iisdem viventibus exhiberentur, idque in memoriam tantum, ac reverentiam progenitorum, & generationis, & si illi vivi extitissent eadem illis præsentarent, ut illis oblatis vescerentur, vel sustentarentur & ea offerunt absque alia intentione, vel rogativarum spe, cum sciant illos mortuos esse, eorumque animas in inferno sepultas. Hactenus quæsitum. Hæc omnia, & singula, exceptâ ultimâ clausulâ sunt ipsa Sinarum antiqua, & universaliter in toto regno recepta dogmata, hæc est doctrina Confucii illorum magistri, cui si quis non adhibeat fidem in gravissimas leges Sinicas peccare censetur. Quomodo igitur R. P. de Morales potuit in Curia Romana asserere contra tam evidentem veritatem, hanc tantummodo Christianorum opinionem esse. An fortè id fecit, ut à sacra Congregatione, & ab omnibus Theologis damnarentur Patrum Societatis Sinenses Neo-

phyti, quasi verò velint suo paucorum numero, novo affirmato antiquis cæremoniis sensu cæterorum penè innumerabilium Sinarum, contrarium ab antiquo sensum pervertere, & abolere? eaque ratione ritus Sinicos circa defunctorum cultum ex se malos fucatâ boni specie contegere, ut sibi permittantur? hoc enim modo contra eos insurgebat hoc argumentum. Non potest paucorum hominum privatus sensus, & intentio contrariam totius vastissimi populi intentionem, & sensum immutare, aut ei derogare. Ergo pauci Christiani respectu innumerabilium Ethnicorum non possunt cultum defunctorum per se malum, & illicitum per suam de novo affectam rectam intentionem permutare, & licitam efficere. Quidquid sit de hoc argumento, & in quo sensu rectè concludat, æquiùs sanè, & ut illud decebat, se habuisset quæsitî auctor si debitâ fide retulisset supradictam de cultu defunctorum doctrinam non esse tantummodo Christianorum, sed esse toti Sinarum regno communem, atque insuper dari gravissimam necessitatem permittendi Neophytis, ut se regni antiquis consuetudinibus accommodarent, exclusis tamen superstitionis opinionibus, & actionibus, quæ processu temporis dictis politicis ritibus à quibusdam permixtæ fuerunt. Quod si fortè (ut eum non accusamus tantæ infidelitatis) ignoravit quæsitox hanc esse regni antiquissimam, ac communem doctrinam, quam solis Christianis hic falsò tribuit, profectò non debebat sine perfecta

Sinicorum rituum , atque doctrinae notitia hæc quaesita nimis properè Romam deferre cum evidenti periculo , nec plantatam tot alienis laboribus Ecclesiam usque deque evertere. Quoad verò postremò citatam quaesiti clausulam , scilicet , scire Neophytos suorum progenitorum animas in inferno sepultas : quidquid sit de universali hujus propositionis veritate. Ex politico rituali Sinico constat Sinenfes in cultu defunctorum ab eorum probitate , vel improbitate præscindere. Horum omnium , de quibus hic actum est Sinicus textus alio loco proponetur.

Trigesima. In eodem quaesito falsò supponitur tabellam illam , quâ Sinenfes ad memoriam suorum progenitorum defunctorum utuntur , & in qua nomina ipsorum descripta sunt à Sinis vocari *anima sedem* , falsissima est ista suppositio. Inscriptio enim in tabella posita (Si sapientioribus Sinenfibus , eorumque libris fidem habere velimus) nihil tale significat , plurimi textus Sinici adducuntur , pro his omnibus sequens textus modo sufficiat.

Id est , Tabella est defuncti representatio ; filius obsequens postquam Patrem sepelivit , ejus cor (sive defuncti parentis memoria) ubi innitatur aut affigatur non habet , ideo finito ritu , quem *yu* vocant , erigit tabellam ad suum parentem defunctum honorandum. Ita Sinicus litteratus nomen

• • • • *Hui* , • • • *Xim* in libro cui titulus

est V Kim . . . y . . . y Hic
auctor floruit sub imperiali familia Heu
. han dicta , cujus initium in annum
incidit 235. post Christum natum , ideoque
non est Neotericus auctor ; Sinicos libros vo-
lutando 30. diversa nomina , quæ alibi cum
sua explicatione referuntur , hujus tabellæ
hactenus reperi , quæ omnia defuncti repræ-
sentationem significant , nec obstat , quod
hæc tabella sæpè vocetur lim
guey , vel xim guey , nam illa
littera *lim* in illa phrasi non significat *animam*
intellectivam , & littera *xim* in dicta phrasi non
significat *spiritum* , sed utraque littera in rela-
tis phrasibus significat defunctum. Item littera
guey in illa phrasi non significat *sedem* , sed re-
præsentationem , sive rem ad aliud significan-
dum *substitutam* , hoc præcipuè patet ex com-
muni usu Sinarum erigendi , & appendendi
in parietibus tabulas , sive epitaphia , ubi vi-
ventium benefactorum nomina inscribuntur ,
vocanturque hæc epitaphia sem
guey , id est *viventium hominum* repræsentatio.
Quod si verò juxta voluntatem , & opinio-
nem R. P. Fr. de Morales hæc phrasis *sem guey*
explicaretur , sensus esset quod illa tabella
esset *viventium hominum* sedes , quod quàm sit
ridiculum , & intolerabiliter absonum satis
per se patet , cùm Sinenſes non sint tam bruta
animantia , quin evidenter illis constet homi-
nes vivos in illis tabellis appensos non esse ,
nec esse posse. Hæc solum breviter hic atti-
gisse sufficiat : alibi ex plurimis textibus li-

brorum Sinensium hæc veritas evidenter probatur , itaut nullus dubitationi locus relinquatur ; ibidem solvuntur leves quædam objectiones , quæ ut plurimum ex malè intellectis libris Sinicis , ac ritibus enasci solent , & si qui textus Sinenses in specie videntur favere falsæ suppositioni , sana explicatio aliorum Autorum Sinensium lectione contigit , ut sibi viderentur Sinici textus utrimque pugnare scilicet pro mendacio , & veritate in hac perplexitate sua potius ei erat amplectenda veritas , quod scilicet ea tabula esset defuncti repræsentatio juxta Sinarum opinionem , quàm sequendum mendacium.

Trigesima prima. In eodem quæsito falsò supponitur Sinenses existimare animas defunctorum venire , & assistere in dictis tabellis ad recipienda falsò supposita sacrificia , & oblationes , Hæc suppositio ex antiqua Sinarum doctrina probari non potest , plurimique moderni auctores Sinici animæ immortalitatem acerrimè negantes , dictam quoque animarum in tabellis assistentiam negare coguntur , aliqui quidem id in speciem videntur affirmare præcipuè in libro , quem vocant *Sim* *li* *ta* *Civen* lib. 28. ubi fusè de hac materia disputatur : si tamen omnia , quæ ibi allata sunt , ritè perpendantur , inde nullo modo poterit probari , quod censuerit auctor animas defunctorum ad tabellas venire , & in illis residere , dato autem , quod aliqui Sinenses animæ defuncti in tabella præsentiam affirmarint , plerisque aliis

eam apertè negantibus , cur quæso autor quæsitum mavult adhærere defendentibus mendacium , quam illud negantibus , & errorem paucorum , doctrinam omnibus Sinen- sibus imputare ? præsertim cùm error pauco- rum non possit inficere totius regni commu- nem ritum , & opinionem totius multitu- dinis sequentis veritatem , in hoc deagimus puncto.

Trigesima secunda. In quæsito decimo ter- tio falsò supponitur , quod Patres Societatis Cathecumenis ante Baptismum non decla- rent , & in particulari doceant sacrificia super- stitiosa , & alteri præterquàm Deo vero exhi- bita esse illicita , ed quod ex his sequerentur inconvenientia , scilicet desistere à susceptione baptismi persecutiones , mors vel exilium ministrorum Evangelicorum. Hujus supposi- tionis intolerabilis falsitas , & gravissima in Patres Societatis calumnia apertè evincitur ex plurimis libris , quos dicti Patres in regno Sinarum typis vulgaverunt , ubi sæpissimè illicita sacrificia condemnantur , illud ipsum audientibus doctrinam Christianam infideli- bus , & Cathecumenis inculcant , & tum in publicis tum privatis congressibus ubique , & apud quemcunque etiam ipsum Imperatorem , datâ vel quæsità occasione id declarare non reformidant pro illa veritate vitam ponere parati. Cur ergò tam injuriosè iisdem Pa- tribus adeò atrocem calumniam imponit quæ- sitor , cujus in toto Sinarum regno tam aper- tè falsitas est cognita ? quam quidem ut mitiùs

de quæsitore judicem non malevolo erga Societatem animo adscribo, sed potius cuidam nimis præproperæ & minus circumspectæ incogitantæ, quam in re tanti momenti sibi potissimum scrupulo ducere debebat. Quoad verò politica munera, quæ suis defunctis à Sinensibus offeruntur eò quod non sint sacrificia, sed grati animi testimonia, quæ civiles officii limites non excedunt Patres Societatis nec volunt, nec possunt juxta falsas quæsitoris suppositiones, contra illa in Catholicorum dogmatum Catechismo aliquid prædicare: hoc enim esset sine ulla causa, & valdè imprudenter maximos tumultus, & persecutiones contra Dei legem excitare, & apud Sinas de cultu defunctorum politico optimè sibi conscios omnium sibilis, & cachinnis se exponere. Hic autem ex occasione breviter quærere liceat, an quibusdam R. R. Patribus in Sinis nunc degentibus, & tabellas, cultumque defunctorum, ut supersticiosum prohibentibus licitum sit hanc suam mentem Cathecumenis in explicatione doctrinæ Christianæ occultare, eamque declarationem usque post baptismum differre, ne à suscipiendo baptismo absterreantur? Videtur profectò minus malum esse Sinenses Cathecumenos à baptismi susceptione absterre, quàm post illius susceptionem ob talis prohibitionis notitiam illos à fide deficere. Quæ quidem gravissima incommoda, quæ experientia com-
monstrat, cum multa rei Christianæ jactura omninò tollerentur; si adhibitis Sinensium
libris

libris ac ritibus debito studio, veritas multorum annorum patientiâ inquireretur; non verò præcipiti iudicio tantum leviter prælibatis Sinensibus libris, ac Doctrinis antiquorum Missionariorum sententiæ rejicerentur, qui longâ eas multitudine, studio, annorum diuturnitate longè vicerunt. Sed ut ad falsæ suppositionis caput regrediamur videtur esse certissimum, Quæsitorem hoc præsens 13. quæsitum, nec pro se, nec pro suis sociis sacris Romæ Tribunalibus proposuisse: quasi verò sibi compertum non esset, vel ipse dubitaret de eo, quod omnis Christianus, licet Idiota nisi mentis ex toto sit expertus optimè callet. Aliter scilicet præterquàm soli Deo sacrificare omninò esse illicitum, etiamsi ob hanc causam persecutiones, exilia, mors ipsa per atrocissima supplicia sit subeunda. Cum igitur hæc notitia cuique Christiano sine gravi injuria negari non possit, cur quæso eadem notitia, vel saltem omnimodæ obligationis eam Cathecumenis communicandi reminiscencia Sinensibus sociis Missionariis deesse supponitur? Si hujusmodi notitia, & reminiscencia illis adesse, non negatur, cur tam perversa, & invida voluntas eisdem impingitur; ac si eam doctrinam nolint Cathecumenis communicare? Si tam nefaria voluntas in illos non refunditur, cur turpissima timiditas, & ecubescencia hanc summè necessariam doctrinam Cathecumenis ennunciandi, illis Missionariis attribuere inducuntur, qui hoc quæsitum 13. aut perlegunt, aut audiunt? Nulla enim alia justa, & laudabilis causa præ-

ter adductas ad hoc interrogandum videtur adfuisse. Interea nos sub importabili hujus gravissimæ , & horribilis calumniæ pondere adhuc gemimus , & nostra fama ubique locorum fædè proscinditur , omniumque sibilis , cachinnis , & odio exponitur. Hæc igitur omnia silenter perpetuò feremus , & veritatis defensionem nobis hîscere non licebit ? Sed de his alia hujus tractatûs cap. 3. adduntur , & alibi plenius agetur.

Trigesima - tertia. In eodem quæsito falsò supponitur omnia supradicta in antecedentibus quæsitis circa defunctorum cultum apud Sinas esse illicita ; hæc suppositio sanctæ Sedis Apostolicæ menti manifestè adversatur , cùm hæc in responso ad quæsitum 12. decernat : posito quod *mensa parata* sit quædam *tabula* , non autem *verum* , & *proprium altare* , si cætera contineantur *intra limites obsequii civilis* , & *politici* esse *toleranda*. Patet igitur , quod ea , quæ à S. Sede sub debita conditione tolerantur , & permittuntur ab Authore quæsiti omnia absolute illicita , adeoque prohibenda immeritò supponis.

Trigesima quarta. In quæsito decimo quarto falsò supponitur , quod vox Sinica . . . *xim* idem sit , quod *sanctus* , *sancta* , *sanctum* in eo scilicet sensu , quem illi tradidit Ecclesia. Tantâ festinatione sua quæsita compegit Quæsitör , ut non videatur illi fuisse otium vocabularia Sinica , rationemque ipsam consulendi , ex quibus , aliisque libris Sinicis , hujus suppositionis falsitas , & talis litteræ ac vocis maxima

significationis latitudo alibi abundè demonstrabitur. Vide infra dicenda Cap. 3.

Trigesima quinta. In quæsito decimo quinto falsò supponitur pro tempore viventis Sinarum Imperatoris nomini in aliqua tabula descripto, Sinenfes pluries in anno *sacrificare*.

Certissimum est Sinenfes suum viventem Imperatorem tanquàm Deum, vel Idolum non venerari. Ex modo tamen loquendi hujus quæsiti patet, vel ipsius Autorem putavisse, inter Sinas viventem Imperatorem pro Idolo haberi, eò quod illius scripto nomini à Sinenfibus sacrificetur, vel necesse est, ut Quæsitòr confiteatur, illud verbum *sacrificare* etiam juxta ipsum esse valdè genericum, sub quo species religiosi cultus, & politici officii contineantur. Ratio est, quia ipsemet eodem verbo *sacrificare* utitur ad significanda religiosa sacrificia; & politica munera, & consequenter juxta ipsum utraque possunt sacrificia appellari. Hinc etiam alia deducitur illatio, nempe Autorem quæsitòrum, ejusque asseclas non posse justè arguere Patres societatis, quando in suis Sinicis vocabulariis & libris politica munera Sinenfium nominant *sacrificia*, quia cum dicto Autore utuntur hoc æquivoco verbo *sacrificare*, & hoc nomine *sacrificium* secundum latitudinem significationis litteræ . . . ei, quæ significat munus reverenter exhibitum, sive Deo vero, sive Idolis, sive hominibus etiam adhuc viventibus. Hoc idem infra confirmabitur cap. 4. ubi videbitur ab eodem Quæsitore ejusdem litteræ . . . significationem extensam

fuisse ultra veri, & proprii sacrificii intelligentiam & sensum non sine magna eorum, quæ ibi tractat confusione, & æquivocatione.

Trigesima sexta. In eodem quæsito falsò supponitur illam mensam in qua Sineses sui viventis Imperatoris nomine in scriptam tabulam collocant, esse altare. Unum ex duobus Quæsitores fateri cogitur, vel se existimare Sineses, ut dictum est, suum viventem Imperatorem, ut Idolum colere, eò quod illi Altare erigatur, quod soli Deo vero, vel falso putato Deo dedicatur, & hoc est evidenter falsum, vel vulgari, & civili mensæ perperam nomen altaris imponere.

Trigesima septima sub specie quæsiti videtur falsò supponi esse illicitum in Templis Deo dicatis collocare tabulam, ubi viventis Imperatoris Sinarum nomen, & salutatio inscripta sit super mensam, vel altare, improprie valdè dictum, candelis, rosis, & odoramentis ornatum, & ante illam tabulam genuflectere, & munera, quæ immeritò si proprie loquamur sacrificia nuncupantur offerre in Imperatoris reverentiam, & honorem. Ratio hujus suppositionis falsitatem ostendens est, quia sacra Congregatio ad hoc quæsitum respondit. Exclusis sacrificiis, & altari verè & proprie dicto; cætera quæ redolent tantummodo cultum civilem, aut possunt ad illum reduci, permitti posse.

Quoad id verò, quod in eodem quæsito insinuatur Patres scilicet societatis ritum supradictum in Imperatoris reverentiam exhibitum

in Sinis peregrisse, si hoc in primis Sinicæ Missionis exordiis ab aliquo nostrorum alicubi actum fuisse intelligatur, universaliter id negare non ausim; cæterum à plurimis abhinc annis hoc nullo modo fit, quia experienciâ comperitum est, hujusmodi ritûs usum non esse ad vitanda gravia incommoda necessarium, ideoque ab illo abstentum est.

Trigesima octava. In quæsito decimo sexto falsò supponitur Patres societatis Sinensibus Neophytis permisisse posse illos pro suis Majoribus in sua infidelitate defunctis orare.

Verum fateor me haud posse intelligere, quò modo hoc quæsitum liberetur, vel à crimine falso, vel ab erroneo judicio, quod Patres societatis in Sinis adedò supinâ ignorantia sint involuti, ut illos omninò lateat, quod sacri Canones, Theologia, & ipsamet Catholica fides circa hoc edocent, & decernunt infra Cap. 3. quæsitum hoc quàm sit irrationabile, & nobis injuriosum demonstratur.

Trigesima nona. In eodem quæsito falsò supponitur, etiam dictos Patres pro iisdem Sinensibus in infidelitate defunctis sacrificia facere, & pro illis in Missa Deum rogare.

Idem & potiori quidem jure fieri potest judicium de hac falsissima suppositione ac de antecedenti.

Quadragesima. In quæsito decimo septimo falsò supponitur, & gravissima insinuaturn calumnia, quod Patres societatis in Sinis Christum Crucifixum non prædicent.

Infra cap 2. hujus atrociter injuriosæ supposi-

tionis clarissima falsitas latè ostenditur.

Quadragesima prima. In eodem quæsito falso supponitur eosdem Patres Christi Crucifixi imaginem sacram non ostendere.

Infra in eodem Cap. 2. declarabitur, quod in modo eam sacram imaginem ostendendi antiquæ Ecclesiæ usui, & novo S. Sedis Apostolicæ decreto de eadem imagine exponenda, quoad *opportune potest*, dicti Patres semper, & omninò adhæserunt.

Quadragesima secunda & ultima falsa suppositio. In eodem decimo septimo quæsito falso supponitur Patres societatis ineptissimam, & summè impiam causam adducere ad non prædicandum Christum Crucifixum in regno Sinarum, & ad non ostendendam ejus sanctissimam imaginem, quia scilicet Sinenses scandalizentur ex tali prædicatione & ostensione, & maximam esse stulticiam judicent.

Hæ inexplicabilis calumnia, & summè probrosum crimen, cujus Patres societatis Jesu falsissimè, & injustissimè insimulantur inferius cap. 2. plenè retunditur, & diluitur.

Hæ quadraginta duæ superius relatæ falsæ suppositiones in septemdecim quæstis à Patre Joanne Baptista de Morales anno Domini 1645. in romana Curia propositis inveniuntur. Hic tantum earum catalogus cum aliqua rerum quæsitaram explicatione recitatur in sequentibus etiam hujus tractatûs capitibus de iisdem materiis paulò latiùs agitur, ne quis autem opponat omnia hic ad has quæstiones pertinentia non exhaustiri, ad

alios longiores tractatus, qui ad minima etiam quæque descendant, & omnia discutiant, curiosus Lector, & æquus rerum ponderator remittitur, & ad illos legendos, & maturè perpendendos invitatur. Nunc verò ad præsentis Tractatûs scopum attingendum satis est, ut ex superiori Catalogo manifestum fiat, quânam Sinensium peritiâ rerum, qualinam veritatis examine, & studio, quâ denique sinceritate, & fide dictus Pater Morales sua quæsita sacris Romæ Tribunalibus examinanda, & resolvenda obtulerit. Ex his enim omnibus benè perspectis satis supérque colligi poterit in quamnam partem de Sinicis quæstionibus altercantium, mala fides, saltem materialiter sumpta declinet.

Cæterum licet suprâ in prædictis falsis contra nostros Sinenſes Missionarios suppositionibus, & infra suis locis, & calumniarum nobis illatarum enormitatem manifestem, potiùs quàm acri stylo perstringam, negari tamen non potest, ni fallor justissimæ de illis & vehementiori expostulationi adhuc locum esse, & fortassè eandem meritò requiri: de atrocissimis enim criminibus accusatus remissè, & frigidè respondendo, vel illa non penitùs execrari, vel ab iis non omninò immunem se esse videtur ostendere. Attamen quibuscunque quæ de nobis humanus autumat, & judicet dies prætermisſis, atque neglectis ulteriores, & vehementiores expostulationes fraternæ charitati, & Omnipotenti Deo, qui charitas est, corde magno, & volenti animo sacrificare par est; veritas ostendatur, & sufficit nobis.

CAPUT II.

*Agitur de translatione in Sinicam linguam
decretorum, & responsionum sacra Con-
gregationis de propaganda fide ad quasi-
ta R. P. Francisci Joannis Baptista de
Morales, & errata, quæ interpres in
translatione commisit, perpenduntur.*

TEXTUS SINICÆ TRANSLATIONIS

.....
.....
.....
.....
.....
.....

*Fidelis & exacta translatio superius ex scripti textûs
Sinici in latinum idioma.*

» **S**acerdos cognomine *ly*, & nomine *yo fan:*
» **S**id est, P. Fr. Joannes Baptista de Morales:
» revertens in Europam, & ad aulam roma-
» nam perveniens datâ operâ summum Ponti-
» ficem obsecravit, ut decerneret, quasnam
» rituum regulas Christianas regalis Sinarum
» familiæ nomine *ta mim* regimini subjectos
» servare conveniat. Supplicem obrulit libel-
» lum per hæc verba (supplex libellus in tex-
tu

ru Sinico non refertur), summus Pontifex
 Urbanus VIII. excellentioribus in doctrina
 Magistris prius mandavit, in unum cogi, &
 de contentis in supplici libello dicti Patris de
 Morales disquirere. Aliquot mensibus elap-
 sis, tunc demum quid esset responden-
 dum, statuerunt. Deinde summus Pontifex
 Innocentius X. ad Pontificatum evectus
 (juxta dictorum Magistrorum judicia,) de-
 cretum edidit inquiens; primò Christianos
 regiae Sinarum familiae *ta mim* dictæ regimi-
 ni subiectos Majoribus defunctis munera of-
 ferre non convenit. Secundò confucio munera
 offerre non convenit. Tertiò insuper *Chim*
Hoam munera offerre non convenit. Quartò
 tempore prædicationis, omnia ad Domini
 nostri Jesu Incarnationem, mundi Redem-
 ptionem, & Passionem pertinentia convenit
 promulgare, & Jesu Crucifixi imaginem in
 Domini Altari erigere convenit. Quintò Ma-
 jorum defunctorum Epitaphium in tabella
 descriptum exponere Christianis non conve-
 nit. Sextò pecuniam alteri fœnerare non con-
 venit, 7º. Tempore Baptismi convenit, ut sa-
 cerdos omnes mulieres sancto Oleo vice al-
 terius inungat, & sanctum salem gustan-
 dum eisdem præbeat, & in earum mortis
 articulo convenit, ut vice alterius sanctum
 Oleum iis conferat. Octavò omnibus mari-
 bus, & fœminis Christianis diem domini-
 cum, & magnos dies festos abstinentiam, à
 carnibus, & jejunia servare convenit.

Antequàm de singulis superiùs allatæ ver-

sionis articulis tractare aggredimur, quædam prius ad eorundem meliorem intelligentiam prænotanda sunt.

Primò notandum, quod supradicti textûs Sinici in latinam linguam translatio non fit secundum tenorem Quæditorum, quæ Pater de Morales Romæ proposuit; eorum enim ne unum quidem verbum in relato textu invenitur, nec juxta formalia verba responsionum, quas idem Pater de Morales accepit; hic enim textus ab earum autographo quàm maximè discrepat; sed tantùm fideliter, & ad amussim exprimitur sensus, quem textus & litteræ Sinenses requirunt juxta illarum propriam, & communem significationem, & Sinensium acceptionem, ut scilicet apertè constet, quemnam conceptum Sinenses Christiani de Pontificiis decretis illorum linguæ & litteris translatis efforment, & ut translationis vitia clariùs innotescant.

Secundò notandum quisnam fuerit relatæ versionis Interpres, & quo tempore illa confecta fuerit. Interpres videtur omninò fuisse idem R. P. de Morales qui anno Domini 1649. ad Sinas reversus statim à se allata responsa, & decreta Sinensibus Missionariis sacræ Congregationis de propaganda fide, & Apostolicæ sedis nomine denunciavit. Eodem tempore valdè probabile est, dictum R. Patrem Sinensibus Christianis eadem decreta sinicè translata promulgare voluisse. Circa idem tempus, credibile est, quod idem Pater Sinicum opusculum suo nomine inscriptum, de obsequio fi-

liali, de quo infra cap. 4. agemus, elaboraverit, & ediderit, ad cujus calcem hæc Pontificia responsa sinicè conscripta inveniuntur. Nullo autem modo dici potest, hujusmodi translationem tardiùs fuisse confectam. In ipsius enim textûs duobus locis apparet, tunc versionem hanc elaboratam, editamque fuisse, cum adhuc in quibusdam Sinarum Provinciis, & præcipuè in Provincia *To Kien*, quò dictus Pater appulerit, ibique morabatur regia familia *Ta mim* non dum penitus à Tartaris extincta dominabatur. Quando enim fieri potuit, ut posterioribus annis, cum totum Sinarum regnum Tartari occupassent, Sinenses Christiani in supradicto textu regiae familiae *Ta mim* dominatui subiecti nominarentur? Hic aliquis fortassè interrogabit: si eo tempore, quo regia *Ta mim* familia nondum penitus à Tartaris extincta fuerat, hæc Sinica translatio perfecta fuit, cur tam serò scilicet post 30. circiter annos Patres Societatis illam assecuti sunt, & de illa mentionem faciunt? Respondeo hoc potissimum attribuendum esse videtur maximæ diligentiae, & cautioni R. P. Fr. de Morales, ejusque sociorum, qui illam nobis omninò celatam esse voluerunt. Anno autem hujus sæculi 79. cum in urbe Cantonienſi degerem, illius noticiam inopinato casu subodoratus sum. Protinùs igitur de re mihi certò, sed confusè comperta, nostrum Patrem Simonem Rodríguez in urbe *soken* Provinciae *sokien* Metropoli commorantem certiore feci, illumque instanter rogavi ut dictum translationis exscrip-

tum exemplar inter Christianos R. R. P. P. Dominicanorum curæ subiectos diligenter perquireret, & inventum ad me transmitteret. Hoc P. Rodriguez statim assecutus est, & ad me duabus viis magnâ sedulitate transmisit. Hoc igitur accepto, cum primùm à cæteris urgentioribus occupationibus aliquid otii modo natus sim, ad hunc scribendum in supradictam translationem tractatum animum applicui.

Tertiò notandum relatam versionem plurima in se continere errata, & lapsus. Primò enim est, tripliciter mutila, quia non refert libellum supplicem sedi Apostolicæ oblatum, referri autem fideliter omninò debuerat, ut proposita S. Sedi, cum sibi significatâ ejusdem mente Sinenses diligenter conferrent, & an unum apud eandem Apostolicam sedem quæsitum, & aliud diversissimum sibi denunciatum fuisse, possent evidenter advertere, deinde quia ex septemdecim Pontificiis responsis octo tantùm in Sinico textu referuntur, & cætera reticentur, demum quia eadem ipsa octo responsa, quæ ibidem referuntur diminuta sunt, & decurtata. Secundò interpretes in recitandis dictis responsis, autographi ordinem non servavit, sed potius nullo ad id respectu eum ordinem invertit, primum enim responsum ultimo loco posuit, secundum penultimo; nonum verò, & octavum in prima collocat acie, quasi verò in hæc duo puncta R. Patris de Morales summæ sollicitudines, vasta itinera, sudores, & labores potissimùm dirigantur. Tertiò debitam versionem fidem Inter-

pres sæpè non servat ob hanc, ut videtur causam, ut suis scilicèt meliùs consulat à præjudicatis sententiis, easque Sinensibus Christianis tanquàm Apostolicæ sedis autoritate confirmatis denunciaret. Quartò ob minorem, quàm opus erat Sinicæ linguæ peritiam in contrarium, & insulsum sensum, Autographum decretorum sæpè transfert. Quintò versionis stylus humilis est, & rudis, nec servat loquendi etiam præcisè necessarias proprietates. Hæc omnia in præsentī, & sequenti capite demonstrantur. His prænotatis octò articuli versionis modo percurrentur eo ordine, quo in textu Sinico disponuntur.

PRIMUS ARTICULUS

Textus. Sinica Translationis.

.....

Versio hujus Textus.

Christianos regiæ Sinarum familie Ta mim di-
ctæ regimini subiectos Majoribus defunctis munera offerre non convenit.

Hæc versio à Pontificii decreti mente, & verbis est valdè aliena. Responsio enim decreti ad quæsitum nonum declarat Sinensibus Christianis nullatenùs licere assistere sacrificiis in honorem defunctorum progenitorum, & multò minus circa illa ministerium aliquod exerce-

re. Hoc Interpres fideliter, & clarè exprimere in sua versione debuerat. Sinenſes autem in hujus articuli Sinico textu ſibi propoſito nihil aliud intelligunt, eſſe illicitum, quàm munera offerre defunctis, licet illa ſint evidenter politica, & nullo modo ſint vera ſacrificia.

Dicit Interpres litteram... *Ci* in textu appoſitam habere ſignificationem ſacrificii, ideòque per illam ſedis Apoſtolicæ mentem, per verba apta declarari.

Reſpondeo littera *Ci* ampliſſimam habere ſignificationem, non ſolùm quoad res omninò diverſas de quibus modo non agimus, ſed ad rem noſtram præciſè pertinentem. Illa enim non tantum ſignificat ſacrificium vero Deo, vel Idolis oblatum, ſed etiam ſervat ſpecies politicorum munerum quæ honoris cauſâ inter homines offeruntur ſive in conviviiſ, ubi conviva, & convitator . . . *Siam* . . . *Ci id eſt edulia, vinum &c.* ad invicem ſibi offerunt, ſive etiam extra convivii tempora adventu hoſpitum, in ſolemnitate nuptiarum, & aliis multis occaſionibus, item coram tabula ubi viventis Imperatoris, vel aliorum vivorum benefactorum nomina inſcripta ſunt munera eâdem voce, & litterâ *Ci* nuncupata offeruntur. Quoad defunctos verò munera illis exhibita eodem planè modo nominantur, ſive ea conſanguineis, & affinibus, vel extraneis offerantur. Hæc inſuper erga defunctos honoris officia non tantum inveniuntur inter æquales, ſed etiam in ſuperioribus erga inferiores, & in ipſomet Imperatore erga ſubditos in annalibus, & li-

bris Sinicis passim istiusmodi narrationes occurrunt, & ne aliena tantum adducamus in memoriam revocemus, quod Imperatores Sinenfes erga P. Matthæum Riccium, P. Nicolaum Longobardum, P. Joannem Adamum Scalct, P. Gabrielem de Magalhães gesserunt. His emortuis . . sic . . Ci . . tam, id est *beneficium* munerum eis suo nomine offerendorum, & sepulturæ locum impertiti sunt. Palatinos ergo Prefectos unà cum ingenti argenti pondere in funeris sumptibus infumendo sibi delegarunt. Ita . . ju . . Ci id est *Imperatoris nomine* munera defunctis Patribus obrulerunt cum solitis genuflexionibus, capitis usque ad terram inclinatione, aliisque reverentiæ, & honoris officiis. Videatur Catalogus scriptorum in Sinico idiomate nostræ societatis & harum rerum narrationes Sinenfibus typis in lucem datæ, & prætereà varii tractatus super hanc litteram Ci . . Hic interrogo; an ne Imperatores Sinenfes dictos Patres pro Idolis habuerunt? annè sacrificia illis obtulerunt? Ridiculum sanè esset hæc cogitare. Prætereà si hujus ritûs circumstantiæ, & præcipuè Sinicus loquendi modus rectè consideretur, illius actionis merè politica ratio evidenter inspicietur. Dicitur enim Imperator subditis defunctis munera offerendo, eisdem eâ ratione beneficium impertiri, hoc autem beneficium conferendi motivum, cum ratione sacrificii quomodo poterit coaptari? sacrificium enim suapte naturâ fit in recognitionem, & protestationem supremi dominii illius, cui offertur, & simul

subjectionis , & servitutis erga eundem.

Superiùs attigimus munera apud Sinenſes defunctis offerri , non tantùm à conſanguineis & affinibus , ſed etiam ab extraneis cujuſcunque ſint conditionis , & ſexûs. Ad hoc melius confirmandum , ſciendum eſt , quod cùm aliquis in hoc regno mortem obierit , præſertim nobili , & divite familiâ natus , præter cognatos , omnes amici ad defuncti domum accedunt , ibique coram cadavere in lignea arca recluſo genuſteſcunt capite ad terram pluries inclinato reverentiam exhibente . . *Tiao* . . *Ci* , id eſt ſummæ commiſerationis ſigna , ob amici , vel patroni mortem oſtendunt , illique munera reverenter offerunt. Hic mos etiam à Miſſionariis Sinenſibus , non ſolùm noſtræ ſocietatis , ſed etiam ex ſacris Ordinibus S. Dominici , & S. Franciſci ſervatur. Teſtes ſint R. P. Fr. Franciſcus Varus è ſancti Dominici familia , qui in urbe *fochen* Provinciæ *Fokien* reguli ibi demorantis demortuæ Matri , & R. P. Franciſcus de Conceptione è S. Franciſci familia in urbe Cantoniënſi nuper occiſi reguli Patri defuncto hunc honorem , & reverentiam unâ cum muneribus detulerunt.

Ex dictis ſatis ſupérque inferitur , ex vi ſignificationis litteræ *Ci* concludi nequaquam poſſe proprium , & ſtriçtè ſumptum ſacrificium per illam ſignificari , niſi per adjuncta tollatur æquivocum , ideóque nec Interpretem per eandem litteram Pontificii decreti mentem , & verba ſinice exprimere potuiſſe.

Si verò consideremus non tantum vocem, sed etiam rem sacrificii, multò minus munera, quæ Sinenſes ſuis offerunt defunctis, poterunt *sacrificia* nuncupari. In sacrificio ſiquidem juxta Theologos debent hæc quinque conſiderari. 1°. Miniſter, 2°. Materia, 3°. Forma. 4°. Locuſ. 5°. Finis. Hæc igitur cum prædictis mortualibus Sinarum muneribus comparemus.

Primò miniſter ſacrificii debet eſſe ſacerdoſ ad hoc miniſterium ſpecialitèr, & legitimè deputatus. Inter Sinas autem univerſalitèr loquendo, nemo eſt ad præfata dona mortuis exhibenda peculiaritèr deſtinatus, ſed omneſ utriuſque ſexuſ, & cujuſcunque conditionis (exceptis Bonziis Idolorum ſacerdotibus tanquàm à ſecularibus, & politicis curis, & officiis ſegregatis, quod eſt maximopere conſiderandum) ut diximus ſuo, vel alterius nomine hoc officio fungi poteſt, niſi aſſerere libeat omneſ Sinenſes mares, & fæminas eſſe ſacerdoteſ; quo quid abſurdius?

Secundò materia ſacrificii eſt aliqua reſ ſenſibilis, & externa viva vel inanimata. Hæc autem materia per ſe ſumpta, ut patet, non conſtituit rationem ſacrificii, cum ea ad quemcunque uſum de ſe ſit indifferenſ?

Sinenſes verò adhibent in ritibus funeralibus omnia cujuſcunque ſpeciei comestibilia, & potabilia, & juxta ipſorum politicum rituale ea ſerè deberent eſſe quæ defunctis in vita degentibus fuerant gratiora, ut meliùſ re-præſentatio honorandi defunctoſ, ac ſi eſſent

superstites exprimeretur. Hæc autem ut plurimum incerta sunt, & ad cujusunque palatium accommodata. Materia igitur dictorum munerum in Sinis est maximè indeterminata, quod contra accidit in veris, & propriis sacrificiis, ubi quædam assignantur pro idonea materia, alia prohibentur.

Tertiò. Forma sacrificii consistit in destructione, vel mutatione rei oblatae in ipso actu sacrificii, ut patet in sacrificiis legis, naturæ, & scriptæ, immò & legis gratiæ.

In Sinensium autem donis suis defunctis oblatis, si materia sit comestibilis, in ipso actu oblationis nulla fit destructio, vel mutatio, sed solum die antecedenti animalia à macellario occiduntur, & ad culinam, ut suo tempore coquantur, afferuntur, sequenti die juxta morem in mensis offeruntur; & ritibus expletis omnia cum aliis ordinariis eduliis à domesticis & hospitibus comeduntur; si verò materia sit potabilis, ut vinum, in ipso quidem actu oblationis parum vini è poculo pleno in terram cadere sinitur; hoc primâ facie aliquam destructionem materiæ continere videbitur, ideóque dari formam, unum scilicet ex quinque requisitis ad sacrificii constitutivum. Verùm sciendum est actionem effundendi parumper vini è poculo, ut dictum est, inter Sinas esse de se indifferentem, & sæpiSSimè evidenter politicam. Legatur Sinense rituale politicum (mihi lib. 8. pag. 23. facie 2. vers. 14.) ibi invenietur in festivarum inter amicos comotationum, & propinationum regulis, &

ritu fusè descripto eadem actio emittendi in terram aliquantulam pleni poculi partem, & hoc genuflexo, aliisque profundæ reverentiæ signis. Imò quod magis est non tantùm inter ipsosmet Regulos cum hospitii gratiâ se se ad invicem in domum admittunt, hæc consuetudo servatur, sed ipsemet Imperator hoc idem peragit, cum sibi subditos Regulos, ad se subjectionis sibi præstandæ causâ adventantes eodem urbanitatis officio honorat: hoc testatur liber Sinicus cui nomen est . . Cùm . . Miao . . ly . . yo . . cao, id est de ceremoniis, & Musica aulæ Confucii lib. 3. apud me: pag. 16. facie 2. vers. 1. & deinceps hujus libri Auctor opportunè ad nostrum propositum adjungit loco citato; *si hoc beneficium Imperator Regulis sibi benemeritis præstat, cur hoc an Confucio fieri debeat necne dubitatur?* Hic textus Sinicè scriptus cum aliis similibus alibi fusè referetur. Hinc inferitur, hanc vini effusionem esse tantùm honorificam urbanitatem, & officium purè civile; denique ad rem nostram concluditur, cùm cætera, quæ à Sinis in munerum oblatione erga defunctos peracta sint politica, etiam hanc vini effusionem esse politicam, & nullatenus esse formam sacrificii.

Quartò. Locus sacrificii est altare ad hoc specialiter deputatum, & consecratum, in quo fiat victimæ, & rei oblatae destructio, vel mutatio.

In Sinarum oblationibus, de quibus agimus, nullum invenitur altare specialiter deputatum, aut consecratum, in quo fiat dicta

destructio, vel mutatio. Ad munera autem defunctis offerenda quælibet communis mensa, quæ casu occurrat adhibetur, atque adeò, & nomine, & re eadem cum qualicunque alia vulgari mensa, nisi velimus omnes Sinensium mensas altaria appellare.

Quintò finis sacrificii universaliter sumpti, est, ut referatur in honorem Dei, vel veri, vel putati vel ficti, in recognitionem scilicet, & protestationem ejus supremi dominii, & simul nostræ subjectionis, vel servitutis erga illum. Secundò in gratiarum actionem ob accepta ab ipso beneficia. Terriò ad novorum beneficiorum impetrationem; quartò ad expiationem peccati contra ipsum commissi consequendam. Hujus multiplicis finis ratio, quoad omnes ejus partes in Sinensium muneribus defunctis commemorationis, & amoris intentio erga defunctos intra limites civilis obsequii, & honoris erga eosdem. Hæc omnia alibi fusè probantur, & objecta diluuntur.

Ex dictis consequitur litteram. . *Ci* per se solam, neque quoad rem veram, & propriam sacrificii rationem significare, ideòque non posse relati decreti Pontificii Interpretem per eandem litteram *Ci* aptè, & verè summi Pontificis mentem, & verba Sinensibus explicare, nisi aliud addatur.

Prætereà etiam dato casu, quod Sinenses verum, & strictè sumptum sacrificium defunctis offerrent, & Interpres vellet Sedis Apostolicæ mentem, quâ illud declaratur illicitum fideliter proponere, in hoc ipso etiam Inter-

pres à scopo graviter aberraret : dicit enim in suo citato textu summum Pontificem declarasse . . . *Pu . . cai* id est , non *convenire*, sive non *decere* illa sacrificia peragere ; hæc enim dictio non *convenire* , sive non *decere* , consulentis est non præcipientis, seu graviter & strictè obligantis. Sacrificia autem alteri præterquàm soli Deo exhibita in primo Dei præcepto severissimè prohibita implicite continentur ; quomodo ergo hoc aptè explicabitur tantummodò dicendo : non *convenit* , seu non *decet* illud infringere. Præterea clarissimè patet hoc esse Pontificio decreto omninò contrarium ; nam in ejus sine sub pœna excommunicationis latæ sententiæ Sedi Apostolicæ specialiter reservatæ illius diligens observantia districtè præcipiendo mandatur ; denique illud gravissimum absurdum ex dicto Interpretis loquendi modo subsequitur , quia plures Neophyti Sinenses ex illo facillè inferent sacrificare alteri , præterquàm soli Deo non esse usquequaque & strictissimè prohibitum , sed tantum ad melius esse , & ex quadam decentia , hoc autem absurdo quidnam potest deterius inveniri ? Constat ergo evidenter Interpretem in hoc primo articulo à legitima versione toto cœlo aberrasse.

ARTICULUS II.

Textus Sinica Translationis

.....

Versio hujus Textus ,

Confucio munera offerre non convenit .

HÆc Pontificii responsi ad quæsitum septimum Patris de Morales translatio in pluribus non leviter deficit.

Primo quia Sinensibus Neophytis Apostolicæ Sedis mentem longè aliter , quàm oporteat proponit. Summus enim Pontifex ex vi dicti quæsitii supponit Confucium esse Idolum , & ut tale à Sinensibus adorari , illique sacrificari , ab eo insuper beneficia peti , & sperari , ejus Idolothyta supersticiosè comedi , & tandem simulatam S. Crucis delationem in ejus cultu adhiberi. Juxta hanc suppositionem omnia supradicta non licere nec permitti posse conformiter ad certissima sanctissimæ Fidei dogmata in Pontificio responso declarantur. Translatio verò omninò suppressâ relatione facti à sancta Sede suppositi , ejusdem nomine denuncians , munera offerre Confucio Sinensibus prohibet. Littera enim *Ci* . . in subjecta materia cultûs Confucii apud Sinenses nihil aliud significat , quàm *politica munera* , ut in articulo superiori

& simili casu dictum est. Hoc igitur loquendi modo hujus articuli translatio nulla Pontificiæ mentis , & intentionis , veram speciem ingerit , & infundit.

Secundò hujusmodi translatio Sinenfes ad sibi persuadendum facile inducit omnem Confucii politicum cultum à summo Pontifice prohiberi , hoc autem absque dubio videtur omninò falsum. Ecclesia enim in consuetudinibus , & ritibus gentium omne , quod contra fidem , & bonos mores non sit , illis permittit , ut ex pluribus sacris Canonibus , sanctis Patribus , & Doctoribus abundè constat , ut alibi referam.

Tertiò licèt in prædicto quæsito supposita essent omninò vera , & certissima , Pontificia declaratio de divinis præceptis in cultu Confucii nullo pacto violandis in relata translatione nequaquàm benè , & aptè proponitur per illa verba. *Non convenit* , vel *non decet* , ut in prior articulo , & consimili materia notatum est.

Ne quis autem fortè objiciat gratis à nobis supponi Sinenfes ex præsentī translatione ab Interprete iis proposita Pontificii decreti sensum non benè percipere ad talem objectionem refellendam necesse est hìc aliquid ex multis , quæ alibi fusè de cultu Confucii differuntur in medium proferre.

Primò igitur recolendum est id quod superiori articulo adduximus de quinque requisitis quæ veri , & proprii sacrificii rationem constituunt. Eadem igitur requisita cum muneribus Confucio exhibitis sedulò conferantur , & ple-

nè constabit dicta munera nec esse, nec vocari posse sacrificia.

Deindè ex Philosophia pro certo supponendum est, quod omnis actio à suo objecto formali & motivo specificatur, ideóque eadem actio materialiter sumpta v. g. actus adorationis si habeat pro objecto motivum religionis, erit religiosa, si politicum, & civile, erit politica, & civilis, si superstitiosum erit superstitiosa; si adoratio referatur ad Deum, erit Iatria, si ad Deiparam Virginem erit hyperdulia; si ad Angelos, & Sanctos, erit dulia; si ad Idola, erit Idololatria, si ad regem, ad parentes, ad ætate & gradu majores, si ve ad amicos, hospites, etiam valdè inferioris conditionis, uti Sinis mos est, & fit, capite usque in terram inclinato, absque dubio omnis hæc adoratio erit politica & civilis. Quoad defunctos verò, si ex pluribus, & manifestis circumstantiis constet eandem adorationis actionem cum eodem objecto, & motivo formali erga illos exerceri, cum quo erga vivos exercetur, dubium non est, quin hujusmodi adoratio sit politica, & civilis.

Prætereà sciendum est, à Sinensibus non soli Confucio titulo magisterii cultum, & honorem exhiberi, sed in eadem aula Confucii, una cum ipso centum, & amplius litterati, & sapientes inter illos insigniores coluntur, & honorantur; apposito pro unoquoque ipsorum proprio nomine in scripta tabella, & ad quamlibet harum tabellarum, genua flectuntur, caput usque ad terram inclinatur, & munera offeruntur.

offeruntur. Ad hunc honoris gradum non tantum antiqui, sed etiam moderni celebriores sapientes etiam usque ad nostra tempora Imperatoris decreto evehuntur; de illorum sanctitate, & virtutibus moralibus, ne dicam Theologicalibus, nulla omnino fit mentio, immo de illorum pluribus magna vitia sæpè narrantur, & acri stylo perstringuntur. Hinc evidenter datur intelligi illos à Sinensibus, non ut sanctos viros, sed ut excellentiores sapientes politicè honorari. His præsuppositis in sequentibus Sinicis textibus ostenditur.

Primò Confucium, & consequenter cæteros sapientes Sinicos in ipsius aula unà cum illo honore affectos inter spiritus quos secta litteratorum cognoscere, & colere saltem ex antiqua institutione proficitur, à Sinensibus non referri.

Secundò Confucium inter Bonziorum Idola coli Imperatoris legibus prohiberi.

Tertiò Sinenses venerari Confucium eo modo, quo ipsi viventes Magistros venerantur.

Quartò Intentionem colendi Confucii, ut Sinarum Magistri Imperatoris Sinensis testimonio expressè declarari.

Prima propositio probatur ex libro, qui dicitur . . Cum . . Miao . . Ly . . jo . . Cao id est examen rituum, & musice aula Confucii libro primo (mihi) pag. 35. facie 2. vers. ultimo ibi agitur de portis cancellatis, quæ in quibusdam aulis indebitè conficiebantur textus sic ait.

„ Id est , Confucius sanè est (purus) homo
 „ defunctus , sive defuncti hominis spiritus ,
 „ oblatio munerum coram illo ex institutione
 „ fit in ejus aula , quæ non est per modum ar-
 „ cæ subdispositæ (ubi sacrificatur spiritibus
 „ quos secta litteratorum cognoscere profitetur ,
 „ ut dictum est) adhibere autem in illius aulæ
 „ januis opus cancellatum , hoc est tractare
 „ Confucium , ac si esset spiritus , aliquis ex
 „ supradictis , illumque cum cœli , & terræ spi-
 „ ritibus comparare. Hoc verò ab Imperatori-
 „ bus præscriptâ formâ valdè procul distat.

*Hic textus desumitur à vastissimo opere cui
 titulus est.*

Ta . . mim . . Hoey . . Tien , id est sum-
 ma legum , sive rituum regalis familia Ta mim
 dicta.

Secunda propositio probatur ex libro , cui
 nomen est Po Va Tien Guey id est de omnium rerum
 speciebus methodicè descriptis lib. 4. mihi : pag. 1.
 facie 2. vers. 2. ibi refertur . . Im . . Cum Im-
 peratoris decretum anno Domini 1438. publica-
 tum per hæc verba.

Id est : Imperator prohibet munera offerri Con-
 fucio in fanis Idolorum , quæ foe , & Lao tan vo-
 cantur.

Ex hoc textu satis clarè deducitur nolle Sinenses Confucium in numerum Idolorum transcribere , sicut in præcedenti textu à classe spirituum cœlo , & terræ præsidentium eundem excludunt. Ulteriùs hinc inferri potest , quod cum Imperator Sinensis vetet comparari Confucium cum duobus Idolis *Foe* , & *Lao tan* , quæ sunt in Sinis principaliora , & magis universaliter culta , multò magis intelligendum est , esse prohibitum eundem in numerum Idolorum inferioris ordinis collocare. Hic etiam opportunè notandum , quod si Sinenses Confucium quem ubique plenis buccis omnium hominum excellentissimum prædicant inter Idola non collocant , quanto magis hoc idem de suis progenitoribus defunctis judicabunt.

Tertia propositio probatur scilicet , quod Sinenses Confucium venerentur eo modo , quo viventes Magistros honorant.

Ad hujus majorem intelligentiam sciendum est eximium cultum , & honorem viventium , & defunctorum Magistrorum inter Sinas longè ante Confucii tempora viguisse , hoc manifestè patet ex libro quem vocant . . . *Cheu* . . . *ly* . lib. 8. sub titulo . . . *Tay* . . . *Su* . . . *yo* , & sub titulo . . . *Ta* : . . . *Siu* Item ex libro . . . *ly* . . . *Ki* cap. 5. *Vam* . . . *chi* . . . cap. 6. *yve* . . . *lim* . . . cap. 8. *Ven* . . . *van* . . . *Xy* . . . *Cu* & cap. 18 . . . *Hio* . . . *Ki*. Hos textus brevitatì gratiâ hic non relatos , facilè erit cui libeat in citatis locis invenire.

Quod autem eâdem omninò ratione Sinæ demortuos Magistros , quàm vivos venerantur

patet ex citato libro. Cum *Miao ly yo cao* post
procemia, & ante initium libri primi, mihi,
pag. 4. facie 2. ibi agitur de ritu . . . *Xe . . .*
Cay, id est offerendi munera defunctis Magistris.
Origo hujus ritus inquiritur, & per hæc ver-
ba explicatur,

„ Id est. Qua de causa iste ritus vocatur
„ *Xe cay*. Hic ritus similis est ritui offerendi mu-
„ nera, cum aliquis amicum invisit. Certè in-
„ ter ritus Sinicos in solemnitate nuptiarum,
„ cum sponsa focerum, aut socrum primum
„ invisit ad dona illis offerenda utitur quacun-
„ que specie fructuum, quos mala vocamus,
„ & castaneis, si focer, & socrus vitâ defuncti
„ fuerint sponsa aulam majorum defunctorum
„ invisit, ibique dona offert. Omnes discipuli
„ cum viventem Magistrum invisunt ad mu-
„ nera illis offerenda iis rebus utuntur, quas
„ vocant *Xo sien*, & ferè sunt res comestibiles,
„ & vinum sive argentum, cum autem hoc ur-
„ banitatis officium erga mortuos magistros
„ exercent, tum illis dona offerunt, quæ ap-
„ pellant *Xe cay*.

Haftenus Sinicus textus, post quem ab ejus
autore notatur, dicta munera ex sua prima
institutione fuisse varias olerum species, po-
steà introductum fuisse pannos sericos & carnes
animalium pridie à macellario occisorum,
deindè benè coctas offerre,

Ex citato textu, & plurimis aliis, qui hic brevitatís causâ prætermittuntur, & potissimum ex illo celebri, & in omnium Sinensium ore versatissimo axiomatico . . *su* . . *su* . . *ju* . . *su* . . *sem*, id est eodem modo coluntur ex hac vita defuncti, ut coluntur homines adhuc in hac vita degentes. Universalis doctrina colligitur, tam pro cultu defunctorum progenitorum, sive amicorum &c. quàm Confucii, & cæterorum sapientum, & Magistrorum, qui jam obierunt munera scilicet ipsis exhibita esse quandam continuationem ejusdem honorifici officii, quo illos invita superstites eorum filii, cognati, amici, & discipuli fuerant profecuti.

Quarta propositio, nempe de intentione colendi Confucium ut Magistrum in muneribus illis oblatis apertè probatur ex eodem jam citato libro, *Cum Miao ly yo cao* lib. 1. pag. 4. facie 2. ubi refertur decretum Imperatoris . . *Chim* . . *cu* . . *ven*, qui est tertius ex regali familia *Ta mim*, & regnare cœpit anno Domini 1406. Decretum sic ait.

„ Id est ego veneror Confucium Imperato-
 „ rum Magistrum, Imperatores quidem Domi-
 „ ni sunt populorum, Confucius verò bonam
 „ populorum institutionem præposuit. Tria il-
 „ la vincula videlicet inter Regem, & subdi-
 „ tos, inter Patrem, & filium, & inter ma-

ritum, & uxorem, multa officia exercenda; doctrinam quinque universalium, & perpetuò servandarum virtutum, nempe pietatis, justitiæ, omnium officiorum ritè obeundorum studii, prudentiæ, & fidelitatis, Sinici Imperii magnam symmetriam, & formam, hæc omnia Confucius declaravit, ut omnia sæcula erudiret. Convenit igitur, per me ipsum ad magnum Gymnasium: hoc est aula Confucii, pergere, & munera offerre Confucio *cum hac intentione*, ut litteratos, sive litteratorum institutum magnificem & honorem, rectamque doctrinam magni pendam, hucusque Imperator.

Ex his quatuor relatis textibus supradicta quatuor propositionum veritas satis apertè constare videtur, videlicet Confucium apud Sinenses nec recognosci, tanquam spiritum, humanorum spirituum sphæram excedentem, nec pro Idolo haberi, & coli, sed solùm ut Magistrum eadem omninò ratione, & intentione honoris, quo viventes Magistri in Sinis coluntur, ac honorantur.

Contra politicum à nobis assertum Confucii, & similiter etiam defunctorum hominum cultum varia ab illum impugnantibus obijciuntur, quæ in hoc tractatu, cujus assumptum, & titulus est alibi fusè dicendorum præludium distinctè referri, & dissolvi nequeunt. Verùm tamen abs re non erit summa objectionum capita, & quæ ad illa respondenda sunt leviter attingere, & ferè sunt hæc; quæ sequuntur.

Primò multoties ea obijciuntur, quæ Chri-

stianis Sinensibus omninò non permittimus : Ad hæc respondemus, nullam de his debere fieri quæstionem, quia ea omnia penitùs rejicimus, & reprobamus. Ad objicientes spectat solidè probare illam ad quæstionem pertinere.

Nos in hoc tantùm insistimus, ut Pontificiis decretis circa has quæstiones penitùs conformemur, nempe quòd dummodo substantia cultus, de quo est controversia, intra limites obsequii civilis, & politici contineatur, si aliqua illi adjacentia civilem, & politicam actionem tantummodò redoleant, vel ad illum reduci possunt, illa permittimus, si detur universalis, gravis, & urgens necessitas; si verò dentur alia illi cultui extrinsecè adjuncta quæ superstitionem verè redolent, nec ad cultum civilem reduci possunt, ea omnia de facto excludimus, rescamus, & nullo pacto Neophytis permittimus.

Secundò in objectionibus libri Sinici indiscriminatim citantur, ac si omnes ejusdem essent auctoritatis, & fidei, & si quid objectis favens in illis inveniatur tanquàm antiqua & universalis Sinarum doctrina proponitur.

Respondetur quòd litteraria Sinensium respublica multos habet, & graves Censores qui libros classici, & cæteros eruditè & acutè examinant, & genuina loca à supposititiis discernunt, ideòque in citandis Sinicis textibus magnâ uti cautelâ necesse est, ne graviter erremus. De hac materia copiosus tractatus jam confectus est, & suo tempore divulgabitur.

Tertiò plura objiciuntur, quæ ex minùs benè percepto Sinicorum librorum sensu, ea asserunt, quæ in adductis textibus verè non dicuntur.

Horum omnium copiosus catalogus, sive justum volumen alibi exhibetur, ubi plurimè & graves lapsus in linguæ, & littæræ Sinesium intelligentia referuntur.

Quartò. In iis, quæ opponuntur frequentè antiquorum, & classicorum librorum negligitur textus, Neotericis commentatoribus plus nimio adhæretur, & gravissimè culpamur, quasi verò nos pauci exteri Sinicarum rerum minimè periti indigenis plurimis valdè sapientibus viris nos anteferre audeamus.

Hanc objectionem, & minimè meritam censuram multorum, & gravium Sinicorum Doctorum testata autoritas, quæ alibi adducetur infringet, & retundet. Hi enim firmiter statuunt, ubi antiquorum, & classicorum librorum textus planum obvium, & clarum sensum exprimat, ad commentatores non esse recurrendum; isti si quidem antiquam, & sanam doctrinam subtilibus, & violentis interpretationibus plerumque penitus destruxerunt.

Quintò multæ objectiones ex vocabulariis Sinico-Europeis, & ex ipsismet Sinicis dictionariis ad quæstionum, de quibus agimus certiores sententias statuendas desumptæ conficiuntur.

Respondetur quantum ad vocabularia Sinico-Europea, illa quidem non esse numeris omnibus

omnibus absoluta, nec (ut linguam, & litteras Sinicas apprimè callentibus videtur) omninò perfecta fieri ullo modo posse, ratio est, quia Europææ voces, ut plurimum vel unam, vel paucas, & determinatas habent significationes, si complexim cum aliis inveniuntur multò plura significant, & sæpè sæpiùs à singulari litteræ significatione longissimè disparata. Talibus tamen utimur vocabulariis in primis Sinicæ linguæ addiscendæ initiis, tanquàm aliquâ ad perfectiora introductione. Si quis autem ad perfectam Sinensium litterarum velit notitiam pervenire, ad vocabularia & libros Sinicos recurrendum est, & ibi pluribus annis improbo, & sedulo labore insudandum. Aliter quomodò de rebus Sinensium plenum, & rectum judicium poterit quis formare, qui eorum litteras non didicerit? quantum ad vocabularia Sinica, hæc à modernis auctoribus concinnata sunt, hi omnium ætatum, & omnium falsarum Sectarum libros citant, omnia mixtim, sive falsa, sive vera sint de litterarum significatione proponunt. In tantâ autem variorum, & sæpè contrariorum sensuum farragine quisnam aliquid determinatum emere poterit? cum præsertim eorum Auctores de antiqua Sinarum doctrina, & genuina litterarum significatione afferenda, & declaranda tam parum laborent? Hinc consequitur vocabularia Sinica attentè, & cautè esse evolvenda, & magis sæpè credendum aliis Sinicis Scriptoribus, qui de unaquaque materia magis ex professo tractant, & distinctius

explicant, quæ in vocabulariis quasi per transennam confusè, & indeterminatè prolata inveniuntur, totum hoc allatis exemplis evidenter probabitur.

Sextò sæpè accidit, quòd circa controversas materias Sinici textus inveniantur, qui rectam & sanam doctrinam edoceant, & econtra, alii textus occurrant, qui eidem sanæ doctrinæ contrarium asserant. Impugnatores verò politici cultûs Confucii rectæ doctrinæ mentione prætermisâ, quæ apud Sinenses Auctores falsa & erronea inveniunt, ac si essent omnibus Sinensibus communia, ac universaliter recepta in suis tractatibus proponunt, & nonnullorum scriptorum nec non imperiti vulgi quosdam errores in materiis, quas pertractamus, omnibus omninò Sinensibus indifferenter attribuunt.

Ad hoc dicimus, quod ista sanæ, & rectæ Sinarum doctrinæ reticentia, præter quàm quod fideli integri facti narrationi maximè adversatur & officit, statum etiam quæstionum summoperè immutat, & earum rationi, & veritati consonam decisionem plurimum intervertit, ac impedit. Aliud enim statuitur cùm universalis omnium error proponitur, & aliud quando error tantum est imperiti vulgi, vel levioris auctoritatis scriptorum ipsâ antiquitate, & saniori doctrina reclamante.

Septimò in Sinicis textibus, qui nobis obijciuntur sæpè tropica locutio, quæ Sinensibus est frequentissima invertitur, cùm autem huiusmodi figuræ proprium vocum sensum in im-

proprium convertant cultûs politici &c. Impugnatores tropico , & improprio sensu relicto ad suas sententias confirmandas proprium rigorosè adhibent ; & à vera textuum intentione maximè elongantur.

Ad hoc cum S. Augustino lib. contra mendacium c. 10. respondemus. *Qui hoc putat tropicis etiam tam multis locutionibus potest hanc importare calumniam ; ita ut hæc ipsa , quæ appellatur metaphoræ , hoc est de re propria ad rem non propriam verbi alicujus usurpata translatio possit ista ratione mendacium nuncupari.* Hactenùs S. Augustinus hoc autem contra quod Augustinus invenitur , quàm sit irrationabile , nemo non videt.

Octavò ex laudibus , & encomiis , quæ de Confucio , & cæteris defunctis in exornativis orationibus & funebri panegyri à Sinensibus proferuntur in objectionibus contra nostras sententias confectis in eo sensu plurima desumuntur , ac si essent Sinensis doctrinæ in causa hac certissima dogmata.

Hoc evidenter redarguitur , quia in Sinis immò , & ubique terrarum , in orationibus generis exornativi nihil est usitatius , quàm ampullatæ phrasæ , & hyperbolicæ dictiones , quæ si in rigore sumantur falsæ sunt , & ridiculæ , hunc loquendi modum Sinæ vocant . . . *Huius . . . Venit hoc est vacua oratio , & nihil significativa , & si quid exprimit , nil aliud est , quàm conceptum de viro defuncto desiderium , & ardens in illum affectus , vel purè officiosa laus , & nomine , errore tenus honorifica ur-*

banitas suo loco clarissimè demonstrabitur ; quantum seria Sinarum dogmata à meræ comitatis inanibus officiis intercedant.

Nonò obijciunt nos ad tuendum positum Sinicorum librorum sententias detruncatas , & diminutas citare contra debitam in adducendis autorum testimoniis fidelitatem.

Respondemus , quòd si in proferendis Sinicis textibus id quod ad punctum , & substantiam assumptæ quæstionis pertinet , omittatur , hujusmodi sanè reticentia reprehensibilis est , & contraria fidelitati , si verò hæc prætermissio ad assumptum thema non attinet , immeritò quidem fugillatur. Nam ut Origenes ait in epistolam ad Romanos , *observanda est in hoc loco , & in cæteris consuetudo Apostoli , quod non semper cum aliquid ex Scripturis assumit integrum textum verborum , ut in suo loco positus est , assumit , sed ea tantum , quæ præsentis causæ requirit assertio*. Ita Origenes apud Salmeronem tom. I. Prolegomeno 9. quinquagena prima Canonum , mihi , pag. 508. & ibidem pag. 110. Idem Origenes inquit , sciendum est &c. *Apostolum ex utroque loco excerpentem , quæ assertioni commoda videbantur aptasse* : hucusque Origenes hujus responsionis fundamentum , & exempla ad extensum alibi declarabuntur.

Decimò objectionum Achilles plerumquè in hoc , & quidem vehementissimè insistit , videlicet ut Europeis à Sinico Regno toto Orbe divisis , & Sinenses mores , & ritus minimè callentibus persuadeat ejusmodi , in Confucii , & defunctorum cultu adhibitos ritus vel esse simplici-

ter, & intrinsecè superstitiosos, & Idolatricos, vel saltem de se malam speciem præ se ferre, à qua juxta Apostolum oportet nos totis viribus abstinere.

Respondetur quod hæc Apostolica, & divina doctrina *ab omni specie mala abstinere vos*, debito modo intelligenda est. Glossa autem interlinearis Apostoli locum 1. Thessalon. cap. 5. vers. 22. Sic explicat, *si aliquid speciem mali prætendit nolite precipitanter agere*, igitur primum diligentissimè inquirendum, an dicti ritus mali speciem, & similitudinem verè præ se ferant. Conferantur hi cum quinque requisitis sacrificii, ut in primo articulo dictum est, & nequaquam cum his coherere invenietur, quidquid in contrarium adhuc non probatum supponatur. Præterea valdè considerandum est, an inter Sineses hujusmodi ritus malam speciem habeant, licet in Europa ex defectu notitiæ integri facti, & cæterarum circumstantiarum omnimodè considerandarum illam habere forsitan videantur. Signa enim delati cultûs, & reverentiæ varia sunt apud Nationes, & sæpè quædam alicubi signa sunt præstiti honoris, & reverentiæ, quæ alibi ad contumeliam pertinent, & despectum v. g. barbam prehendere in quibusdam terris est nota supplicantis, & venerabundi, in aliis probrosum est, & contumeliosum. Stigmata vultui inurere apud Thracios, Sarmatas, & Dacos erat nobilitatis insigne; alibi ea inustio est ignominiosissima, & atrocissima pœna fugitivis mancipiis, latro-

nibus, aliorumque pessimorum criminum reis infligta; Europei adventanti assurgunt, & caput aperiunt. Japones illo adventante immoti hærent, nec caput nudant, sed calceos exuunt. In Sinis verò gravis irreverentia est de-
 tecto capite hospitem alloqui. Apud cæteras
 plerumque Nationes saltatio est nota lætitiæ,
 Sinensibus autem est etiam luctus, & mœsti-
 tiæ signum in funeralibus ritibus adhibitum.
 Propriissimè ad rem nostram descendendo mac-
 tatio sollemnis animalium in naturali, & scri-
 pta lege divina, & etiam apud Idololatrias est
 forma sacrificii, & apud Sinica-Tartaros, ut
 in primo articulo dictum est cultus evidenter
 politicus in hospitum honorem coram ipsis im-
 pensus. Jejunium, lavatio corporis (excep-
 to ad ipsiusmet corporis commodum respectu)
 vel saltem manus, plerumque juxta operantis
 intentionem censetur opus vel religiosum, vel
 superstitiosum. Apud Sinas est etiam merè po-
 liticum, sic legitur in lib. . . *Lun* . . *yu* cap.
 14. quod Confucius Regem aditurus ad gravia
 cum illo negotia transigenda prius jejunavit,
 & corpus lavit, Confucii intentionem Com-
 mentatores hujus loci declarant, illam scilicet
 fuisse, ut negotii, quod non temerè, levitèr-
 que pertractare volebat gravitatem ostenderet,
 item apud Mentium secundum apud Sinas post
 Confucium cap. 2. propè finem refertur cujus-
 dam viri ipsum Mentium invisentis jejunium
 ante eundem colloquendum honoris causâ per-
 actum, idem dici potest de politicis jejniis,
 quæ sunt in funeralibus defunctorum, non

tantum apud Sinas , sed etiam apud Græcos S. Chrysostomi ætate , ut videre est apud illum tom. 5. lib. 1. de compunctione cordis propè finem , ubi habentur plura lectu dignissima circa funerum politicos ritus Sinensibus in multis simillimos , sed de his plenè aliàs. In præsens hæc breviter attigisse sufficiat , ut ostendatur quomodò cautè procedendum sit , ne juxta citatam Glossam in specie mala dijudicanda præcipitanter agamus.

ARTICULUS III.

Textus Sinica Translationis

.....

Versio hujus Textus ,

*Insuper Chim Hoam munera offerre
non convenit.*

CIrca hanc Pontificii decreti Sinicam translationem plura notanda sunt.

Primò sciendum quod Sinicæ translationis hæc latina versio juxta litteræ . . *Ci* quam Interpres adhibet valde propriam exigentiam facta est. Hæc enim littera ut in primo articulo dictum est , de se est indifferens ad significandum omnia cujuscunque generis sacrificia vel religiosa , vel superstitiosa , vel etiam mune-

ra politica. Hoc autem loco ad tollendam significationis indifferentiam eidem nihil additur. Jure igitur eadem littera in hac Sinicæ translationis latinâ versione secundum propriæ significationis latitudinem explicatur.

Si dicas quod in hoc textu hujus litteræ Cî determinatur indifferentia, eam applicando ad sacrificium Idolo *Chim Hoam* fieri prohibitum, ideoque illam litteram non muneris, sed sacrificii juxta Sinarum intelligentiam manifestè contineat, Interpreti fatendum est, confuse, & æquivocè fuisse locutum cum distinctionis gratia nihil addiderit.

Secundò hæc Sinica Pontificii decreti translatio Autographi sensum nequaquam declarat, Pontifex enim directè responderet ad sibi propositum à P. de Morales quæsitum 7. ubi interrogat, an liceat Sinensibus Christianis Idolum nomine *Chim Hoam* externo tantum cultu adorare, sanctam Crucem in manibus occultè ferendo, vel illam inter flores sacrilegi Altaris abscondendo, intentione ad eam, non autem Idolum adorandum directâ. Ad hoc summus Pontifex responderet nullo modo hoc licere. Translatio verò Sinica hujus quæsitii, & responsi sensu penitus prætermisso, sedis Apostolicæ nomine Sinensibus fidelibus denunciat, ab illa prohiberi, ne Idolo *Chim Hoam* munera offerantur. Hoc autem à quæsitii, & responsi sensu est longè alienum, aliud enim est Idolum externè adorare, & aliud, ut Sinici textus verba sonant, & Sinenses intelligunt, illi munera offerre.

Tertiò

Tertiò per hanc Sinicam translationem Sinenſes Neophyti defraudantur notiâ in fide rudibus ſummè neceſſaria in Pontificio reſponſo propoſitâ, quod non ſolùm Idololatria interna eſt illicita, ſed etiam externa, quodque hæc verba nullo modo fiat licita per ſimulatam ſanctæ Crucis delationem, intentione ad illam tantùm adorandam directâ.

Quartò Neophytos eadem translatio ad facile ſibi perſuadendum inducit, ſanctam Sedem politicum Confucii, & defunctorum cultum, à ſacrilego cultu Idoli *Chim Hoam* nequaquàm diſtinguere cum eadem loquendi formula utrumque prohibeat, & cum Sinenſes Confucium, & Majores defunctos politicè, & civiliter ſe venerari evidentè ſciant, rudes Neophyti fortasſè hinc arguent Idoli *Chim Hoam* cultum eſſe pariter politicum, ideòque per ſe licitum.

Quintò hoc idem ſatis apertè probatur, & confirmatur, quia Translatio Sinica Pontificiam declarationem Neophytis proponit ſuper illicitum cultum externè prohibitum Idoli *Chim Hoam munera offerre non convenit*. Hæc autem dicendi formula, ut patet præceptiva non eſt, nec Dei ullo pacto violabilia præcepta ſimili modo proponenda, vel declaranda ſunt.

Sextò deniquè evitari certè non poteſt, quin per hanc Sinicam translationem Sinenſes Chriſtiani non minùs acerbo, quàm juſto dolore maximè conficiantur, atque turbentur, dum in illa vident ſuum Magiſtrum Confucium,

de quo P. de Morales, ejusque asseclæ incredibilia sanè præconia texunt, ut videbitur cap. 4. & majores defunctos in Idolorum classem juxta dictam translationem à summo Pontifice adnumerari, vel ut meliùs dicam amarissimè conqueri poterunt de pessima apud Apostolicam Sedem sibi irrogata calumnia, quasi verò cum Domini cultu execrabilem etiam Idolorum cultum tanquàm Samaritani permisceant ipsimet Sinenses infideles litterati, acerrimi ut plurimùm Idolorum osores, si hoc resciant, in quasnam furias non agentur? In quænam sanctæ legis impropria non exilient?

Ex dictis concluditur, & manifestum fit, quod præsentis articuli Sinica translatio est maximè obscura, æquivoca, diminuta, & Autographo plurimùm dissona, licèt summi Pontificis nomine fuerit Christianis denunciata, & tandem est eisdem graviter injuriosa.

ARTICULUS IV.

Textus Sinica Translationis

.....

Versio hujus Textus,

*Tempore prædicationis omnia ad Domini nostri Jesu
 Incarnationem, mundi Redemptionem, & Pas-
 sionem pertinentia convenit promulgare, & Jesu
 Crucifixi imaginem in Domini altari erigere
 convenit.*

Sinica hæc Pontificii decreti translatio est
 notabiliter diminuta, quia substantialiter
 necessarias Autographi particulas silentio invol-
 vit, ac supprimit, sacra enim Congregatio &
 summus Pontifex declarant ad actualem de
 Christi Domini passione prædicationem in sin-
 gulis concionibus faciendam Ministros Evan-
 gelicos non teneri, sed primùm baptismo om-
 ninò præmittendam, deindè prudenter, &
 opportunè proponendam esse decernit. Inter-
 pres verò in sua Sinica translatione has adeo
 necessarias circumstantias, & conditiones ta-
 citùs præterit, & suâ taciturnitate maximum
 Neophytis offendiculum parat.

Hoc probatur, quia ex dicta reticentia

Neophyti impelluntur ad firmiter sibi persuadendum sanctæ Sedis intentionem esse, ut semper, & ubique sine ulla prudentia, & opportunitate de Christi Domini Mysteriis fiat prædicatio. Ad quid enim (ipsi ratiocinabuntur, summus Pontifex singularis suæ voluntatis indicio, ne dicamus mandato, mandati enim sive præcepti in Pontificiis responsionibus Sinicè translatis nulla sit mentio, de Christi Domini Mysteriis, prædicationem adeò inculcat, cum nostri antiqui Patres à primo in Sinas ingressu Christi ad mundi Redemptionem, Adventum, Passionem, Crucem, & cætera ejusdem sacra mysteria, & doctrinam ante quàm post Baptismum opportuno quoque tempore ore per Catechismum, & conciones, scripto per plurimos libros apud nos disseruerint, distinctè usque ad ultimas minutias explicuerint, & dubia omnia, quæ circa hoc excitari poterant, ad cujus captum abundè dissolverint, plures confraternitates sub titulo Passionis Domini instituerint, ubi de hoc sanctissimo Mysterio fiunt conciones, sacræ preces, meditationes, unà cum variis corporis afflictionibus in ejusdem honorem peractis; hoc igitur novum Pontificiæ voluntatis tam expressum, & singulare judicium, majora adhuc procul dubio à nobis requirit; semper igitur, & ubique Dei incarnati, & passi prædicatio à nobis est audienda: primi etiam apud nos divinæ legis Prædicatores non perpetuò de hoc concionantes gravissimè peccarunt, & suo muneri plurimum defuerunt.

Huic Neophytorum non prorsùs malè fundato in Sinica Pontificii decreti translatione argumento , quid in contrarium dici possit non video. Cæterùm planè constat per superius relatam Sinicam interpretationem sammi Pontificis , & sacrae Congregationis prudentissimum , ac sanctissimum responsum pusillorum scandalo minùs cautè exponi.

Quod autem ad factum rei , de qua agimus spectat , sciendum est Patres Societatis anno Domini 1581. Sinas ingressos in prædicatione Evangelica , statim de Incarnationis , Passionis , & Crucis Mysteriis verba fecisse , prætereà statim de eodem argumento libros typis mandasse , & usque ad hæc tempora hoc idem continuasse. Ad majorem hujus veritatis evidentiam subjiciam hìc Catalogum nostrorum Auctorum , qui de Incarnatione , Passione , & Cruce Domini Sinicè scripserunt usque ad annum 1642. quorum noticia ne contra manifestam veritatem erraret , haberi , & poterat , & debebat à P. de Morales , antequàm sua quæsitâ Romam afferret , ibique proponeret , quod fecit anno 1644.

Catalogus Auctorum nostræ Societatis , qui Sinicè scripserunt de Incarnatione , Passione , Cruce , & morte Christi Domini ab anno 1584. usque ad annum 1642.

Pater Michael Rogerius in suo Catechismo nomine *Xe lo* cap. 11. agit de Christi Incarnatione , Passione , & morte in Cruce , editus est hic liber anno 1584. quarto scilicet anno à nostrorum ingressu in Sinas.

P. Matthæus Riccius in libro typis dato anno 1603. cui nomen *Xe y* cap. 8. agit de Christi Domini Incarnatione, Passione, & morte.

P. Didacus Pantoya in explicatione Symboli latè agit de Domini Incarnatione, Passione, & morte. Datum esse hunc librum in lucem circa annum 1610. constat ex Tractatu de origine primi hominis, qui simul cum eadem Symboli explicatione excusus fuit. Item in Manuali sacrarum precum habetur ejusdem Patris integra, & compendiosa narratio Dominicæ Passionis.

P. Joannes de Rocha in Catechismo sub titulo *Ki mum* in declaratione Symboli agit de Christi Incarnatione, Passione, & morte. Item in tractatu, & praxi recitandi Rosarii latè explicat quinque Mysteria, quæ vocantur dolorosa, & apponit sacras imagines Christi Passionem, & Crucifixionem exprimentes. Obiit hic Pater anno 1623. Hinc apparet sua opera edidisse non longe ab hujus sæculi 17. initio.

P. Nicolaus Longobardus edidit Manuale sacrarum precum ad usum Neophytorum ubi habentur plures orationes, & meditationes de Christi passi Mysteriis. Hoc Manuale citatum in Catechismo P. Joannis de Rocha, ideóque ante dictum Catechismum publicæ luci datum est.

P. Gaspar Fereira edidit meditationes super quindecim Rosarii Mysteria, ubi agit de Incarnatione, Passione, & morte Domini.

P. Jacobus Rho edidit tractatum super salutationem Angelicam, ubi plurima de sanctis-

limo Jesu nomine ex D. Bernardino, & aliis devotè, & eruditè prosequitur.

P. Alphonsus Vagnoni in explicatione Symboli in vita Beatæ Mariæ Virginis, in vitis sanctorum præcipuè Apostolorum, & alibi passim agit de Christi Incarnatione, Passione, morte &c.

P. Joannes Foes in lucem dedit Litanias sacratissimæ Passionis Domini nostri, & alias preces ad quinque dominicas plagas. Item in libro de præparatione ad bonam mortem plura habentur de Passione, Cruce, & morte Christi, & præsertim compendium Dominicæ Passionis.

P. Rodericus de Figueredo edidit Manuale precum, cui nomen *Cum to. Nuy Kim*, ubi plura habentur de sacra Christi Domini Passione, & morte.

P. Emanuel Diaz in explicatione Evangeliorum septem tomis contenta, & anno 1636. edita de Christi Domini Incarnatione, & morte, ejusque sanctissima Cruce, & morte, concionatoriè pertractat adductis plurimis utriusque Testamenti, & sanctorum Patrum locis copiosè, & eruditè: item proponit omnes difficultates, & objectiones, quæ contra hoc mysterium opponi possunt, & omnia diluit, & declarat. In aliis ab eodem Patre confectis libris plura alia de hoc eodem Mysterio inveniuntur, & potissimum in Thoma de Kempis Sinicè translato.

P. Julius Aleni anno 1635. edidit historiam Evangelicam octo libris comprehensam & penè

ad verbum ex sacris Evangelistis desumptam. Item anno 1637. typis dedit librum sacrarum Imaginum, quæ totam Christi Domini vitam, Passionem, Crucifixionem, & mortem repræsentant ad imitationem similis libri P. Hieronymi Natalis in Europa excusi. Item in lucem dedit integrum volumen, ubi unice tractatur de Incarnationis, & Passionis Dominicæ Mysteriis dogmaticè, & disputativè contra Gentiles &c.

P. Joannes Adamus Schal anno 1642. in opere cui nomen est *Chu Xiao y ven Ki*, id est *Legis Domini prima institutio tom. 4.* pene per totum differit de Christi Incarnatione, Passione, & morte, & Gentilibus objecta disputando dissolvit.

Hunc Catalogum penè totum desumpsi à quodam manûscripto, quod in Archivio hujus nostræ Provinciæ asservatur; & à P. Julio Aleni anno 1642. fuit confectum. Omitto penè innumerabilia loca, quæ in nostris Sinicis libris lectori passim occurrunt, ubi saltem incidenter de Christi Passione, Cruce, & morte fit mentio, ita ut verè dici possit, eosdem libros ubique, & per omnes modos dicta sacra mysteria personare, Christi ejusque Crucis honores, & laudes prædicare, omnésque Mortales ad ejus cultum, & imitationem invitare, & pertrahere. Item prætermitto plures antiquos Christianos litteratos Sinenses, qui in libris suis de eadem materia copiosè scripserunt, typisque mandarunt. Supra relata opera, & lucubrationes publico Neophytorum usui à nostris

nostris Patribus editæ sunt, ut dictum est, ab ipso Sinensis Missionis initio usque ad annum 1642. & plures ex iis, quasi ad conspectum P. de Morales in Provincia *Fokien* degentis, & propè Urbem *Fokeu*, ubi P. Aleni prædictos libros typis tradebat, & non longè ab urbe *Ham Cheu*, ubi P. Emanuel Diaz eodem tempore Evangeliorum commentaria excudebat. Cum igitur Sinenfes omnes Christiani per tam diuturna tempora Dominicæ Incarnationis, Passionis, & Crucis mysteria tanquàm lucidissimum solem in clara meridie coruscantem in nostris libris conspicerent, & manû palparent, solus P. de Morales, ejûsque Assesclæ ad hanc potentissimam lucem cæcutierunt, nec unum quidem ex citatis libris apicem perlegerunt, si enim legissent, quomodò tam religiosi Patres ad nos in re gravissima falsò accusandos animum induxissent? Ex qua autem causa, quorum zelo ad nos incusandos abrepti, idem Pater, & socii fuerint, æquo rerum ponderatori decernendum sino. Certum est quod iidem nostros Patres Sinenfes primùm apud Illustrissimos Philippinarum Ecclesiarum Præsules efficacissimè accusarunt, sed cum isti eosdem ad summum Pontificem Urbanum VIII. detulissent, quasi verò Christum, ejûsque Crucem erubescences, quidquàm de ejus Mysteriis Sinenfibus negligerent prædicare, & non longè postea cùm de falsitate accusationis certiores facti fuissent, statim apud eundem sanctissimum Dominum palinodiam cecinerunt. Hac verò retractatione neglectâ P. de Morales Ro-

mam advolavit , & quæ ibi dixerit , egeritque , ejus quæſita ibi propoſita ſatis ſupérque declarant. Benevole Lector , quæſo te , ex præcitato Catalogo inferas , quâ veritate , & documentis innixus P. de Morales ſuorum quæſitorum factum apud ſummum Eccleſiæ judicem ipſe probaverit , & quas juſtiſſimas quærelas circa hoc afferre poſſimus.

Quod verò ad Chriſti Crucifixi ſacram Imaginem in Eccleſia exponendam pertinet , diſti Patres Socieratis hanc quæ ſequitur praxim ab initio Miſſionis , uſque ad hæc tempora ſervaverunt , & ſervant , cùm Eccleſiæ Sinenſes publicæ ſint , & fidelibus , Ethnicisque æquè pateant , Imaginem Salvatoris , orbicularem mundi figuram in manu geſtantis , ſive Imaginem Beatæ Mariæ Virginis parvulum filium amplectentis , & ferè eſt illa , quæ apud S. Mariam Majorem Romæ colitur , vel alias ſimiles in Altari juxta morem collocatas habent ; prætereà ibidem ſacram Chriſti Domini Crucifixi imaginem ſive formatam Crucem ſemper expoſitam ſervant. Tempore verò ſacræ Hebdomadæ in concione de Paſſione Imaginem Chriſti Crucifixi à fidelibus adorandam in Altari exponunt , & in adoratione Crucis in medio Eccleſiæ collocant. Ad hanc ſolemnitatem Fideles omnes accurrunt , & devoto cordis affectu , non ſine copioſis lacrymis ſanctiſſimum Crucifixum piſſimè & teneriſſimè adorant , & osculantur. Inſupér ut Chriſti Crucifixi memoriam in Chriſtianorum cordibus profundius imprimatur , cujuſque generis Chriſti paſſi , &

Crucifixi imagines in maximo numero eisdem distribuunt, ut in domesticis Oratoriis collocent, & colant. His industriis Fideles erga Christum Crucifixum sunt impensissimè addicti, & hujusmodi sacrarum Imaginum avidissimi.

In publicis autem Ecclesiis Crucifixi Imaginem semper expositam habere iidem Patres pronunc in opportunum judicant, & in hoc summi Pontificis mentem attingere, & Ecclesiæ morem perfectè servare arbitrantur. De Pontificis mente in Autographo responsionum de quibus agimus, constat, de antiquæ Ecclesiæ more in plurimis Ecclesiasticis libris passim notatum invenitur. Consulatur potissimum Doctissimus, & eruditissimus Vir Dominus Ferdinandus de Mendoza in egregio illo opere, quod de confirmando Concilio Illiberitano typis edidit, ex plurimis, quæ ibi latè ipse prosequitur; hæc quæ sequuntur carptim, excerpti.

Mendoza igitur lib. 3. cap. 5. in expositione Canonis 36. (sive secundum aliam suppositionem 37.) ejusdem Concilii, qui ait, *placuit picturas in Ecclesiis esse non debere, ne quod colitur & adoratur, in parietibus depingatur*. Inter varios hujus Canonis sensus, Mendoza hunc refert, quòd scilicet Episcopi benè sciebant sacras Imagines religiosè coli debere, & omninò colebantur non interiori tantum, sed exteriori, & publico fidelium cultu, sed abstinebant ad tempus, ne picturas sanctorum hominum contemptui Gentiles haberent, vel sibi falsò per-

suaderent illos à Christianis, ut veros Deos Iatriæ veneratione coli, ut Eusebius lib. 8. Ecclesiast. Histor. c. 6. refert, quoad Imagines Christi Crucifixi eas in parietibus, Ecclesiæ pingi noluerunt, ne Ethnici vel Cathecumeni simplices, vel qui ad intima Christianæ Religionis adhuc non penetraverant, hominem mortuum, & Cruci affixum à Dei invisibilis, & impassibilis natura alienissimum esse crederent, Auctoremque Christianæ Religionis spernerent, ut Arnobius & Minutius asserunt, non tamen negat Canon Imagines Christi depingi posse, & suo tempore, & loco debitâ adoratione à Christianis coli debere.

Addit Mendoza ex Eusebio lib. 4. c. 8. & Nicephoro lib. 4. c. 5. Quod Adrianus Imperator ex persecutore Christianorum cognitâ ipsorum innocentia, factus eorum fautor, Christianis templa extrui iussit Christianæ Religionis tunc usu, & forma, sine simulachris Dei veri, & corporei, ne similia suis idolorum grege refertissimis delubris, nostra templa profanæ gentes arbitrarentur, & ne Christianis pro gratia exhiberet ipse molestiam, sic in ejus vita testatur Lampridius. Hac de causa illa Templa, quod numina sive Imagines non haberent usque ad tempus Constantini Magni Templa Adriani nuncupata sunt. Nec Romæ tantum hoc Catholici viri observabant, sed & in reliquis Provinciis: hoc autem irridebant gentes, obicientes nobis, quod nullam Dei formaremus picturam, & occultarem quod colebamus, legantur Minutius Felix, Ar-

nobius , Tertullianus , Justinus , Lactantius.

Non solum occultiora humanitatis Christi Mysteria publicè in Ecclesiæ parietibus pingi antiquæ Ecclesiæ Præsules non permittebant , verum nec alia Christianæ Doctrinæ mysteria litteris consignari , vel palam , publicèque doceri , fas esse censebant , ne insanis Ethnicorum ludibriis , & risu exciperentur. Ita Sozomenus lib. 1. hist. Eccl. c. 19. Dionysius Areopag. de Ecclesiast. hierarch. initio c. 1. Isidorus lib. 2. de Off. Eccl. c. 21. Ambrosius Epist. 33. & Tertullianus lib. de præscript. adversus hæreses c. 41. Hæreticis veluti rem pudendam objicit , quod Ethnicis , & Catechumenis Catholicæ Religionis mysteria , quemadmodum , & fidelibus communia facerent ; videatur insuper Chrysost. homil. 2. in epist. 2. ad Corinth. cap. 1. Basilus de Spiritu sancto c. 27. Augustinus tract. 11. & 16. in Joan. Isidorus lib. Ethimolog. c. 17. & Dionys. de Ecclesiast. Hierarch. p. 3. c. 3.

Prætereà apud antiquam Ecclesiam Catechumeni sanctissimo Eucharistiæ Sacramento conficiendo assistere non poterant , & ab ejus aspectu prohibebantur , ut Basilus , & Augustinus locis suprà citatis ; Concilium etiam Laodicenum c. 19. & Chrysost. homil. 79. de oratione testantur. Item eosdem Catechumenos benedictionem simul cum fidelibus suscipere noluit , sed tantum separatim. Concil. Araus. primum can. 13. & 15. jussis etiam defunctorum exequiis , orationibus , & sepulturæ

interesse iidem vetiti erant , ut asserit Areopagus de Ecclesiast. Hierarch. p. 2. c. 7. Deniquè tanta erat in celandis Sacramentis Religio , ut in concionibus publicis , à quibus Cathecumeni , & Gentiles non arcebantur , nunquàm propriis nominibus Sacramenta coram illis exprimerentur , sed eam formulam usurpabant , qui concionabantur quæ solis fidelibus cognita erat , quasi illis tantum divinitatis , & religionis arcana pandenda forent , Ethnicis autem , & Cathecumenis occultanda , & reticenda. Qua forsan ratione Concilii Illiberitani Patres ad exprimendam imaginem Christi in citato Canone abstinuisse , insinuasse tamen Christianis , latente illorum verborum sensu , ne quod colitur , & adoratur , verisimile est ut si decreta in Ethnicorum manus forsan incidissent , compertum non haberent.

Hæc & plura alia vide apud citatum Mendozam.

Præterea in præsentis articuli Sinica translatione maximè advertendum est , quod cùm P. de Morales in suo 17. quæsito sacram Congregationem , & summum Pontificem tantùm interrogaverit , an Missionarii Christum Crucifixum prædicare , ejusque sacras imagines maximè in Ecclesiis exponere , & cohærenter ad interrogata responsum acceperit , solum circa Christi Domini Passionem suo tempore prædicandam , ejusque Crucifixi sacram imaginem opportunè exponendam , in Sinica autem responsi translatione illud maximè dilatatur , nam S. Sedis nomine Missionariis denuncia-

tur, ut scilicet Christi Domini Incarnationem, Redemptionem, & Passionem Sinensibus prædicent, & promulgent, quasi verò spiritus oris, & cordis nostri Christus Deus, sub cuius nomine in ejus Societate militamus, & sub cujus umbra vivimus in gentibus ante nos, & à nobis proscriptus sit, & de illo absolute, & universim loqui olim erubuerimus. Deus bone? quisnam æquo animo, & silenti ore tam enormem sufferre poterit falsitatem à Pontificii decreti verbis, & mente, & ab ipsamet veritate alienissimam? Sinicas nostrorum scripturas ab ipso hujus missionis initio in lucem datas quisquis voluerit perscrutetur, & sole clariùs inveniet, quàm gloriosum, quàm honorificum, & quàm integrum, atque copiosum in genere dogmatico, ascetico, & historico de omnibus, & singulis Christi Domini, & potissimum ejus sacratissimæ Passionis, & Crucis Mysteriis testimonium ipsæ perhibeant. Tam multæ, & clarissimæ ibi extant hujus veritatis attestationses, ut intollerabilis hujus falsitatis os impenetrabiliter obturare sufficiant, & superabundent.

Ex dictis igitur manifestè patet, quàm immeritò, quàm diminutione, perversione, verborum, & sensûs, & quo fidelitatis, & veritatis defectu prudentissimum summi Pontificis, & sacrae Congregationis responsum circa Christi Crucifixi prædicationem, ejusque sacrae Imaginis publicam expositionem contra ipsiusmet summi Pontificis mentem, & antiquæ Ecclesiæ adeò laudabiles mores in Sinj-

cam linguam translatum fuerit, & Sinensibus Neophytis sedis Apostolicæ nomine propositum : Insuper constat, quàm falsò, nè amplius dicam, apud sacram Romanam Curiam delatri, & quàm gravissimo nostræ famæ dispendio ubique terrarum calumniis impetiti simus, nobis imponendo, quod Jesum Christum, & hunc Crucifixum apud Sinas non prædicaverimus. Possem hìc præterea referre inconsultissimum, eundem Christum Crucifixum, prædicandi modum à nostris Impugnatoribus non semel in Sinis adhibitum, ex quo non animarum conversio secuta, sed maximæ turbæ, & tumultus excitati sunt, & eorundem Prædicatorum carcerationes, verberationes, & exilium indè subsecutum non equidem propter Christum, quem illi recens appulsi, & in Sinico idiomate adhuc elingues annuntiare nullatenus poterant, sed eò quia per compita, & plateas Crucifixum manu, vel in pectore gerentes irruerunt, ne à Sinis, quid sibi velint, intelligebantur, & quo talis ostensio imaginis tenderet, nesciebant. Ipsi sanè Patres hunc errorem postea ingenuè confessi sunt, & ex eorum originalibus epistolis, quæ apud nos extant, ad nostros missis evidenter constat,

ARTICULUS V.

Textus Sinica Translationis

.....

Versio hujus Textus ,

*Majorum defunctorum Tabellas exponere Christianis
non convenit.*

HÆc proculdubio est ipsissima P. de Morales, ejusque asseclarum tenacissimè propugnata sententia, sed minimè cum decreti Pontificii verbis, & sensu concordat; immò verò eidem plurimùm adversatur; summi enim Pontificis, & sacrae Congregationis circa has tabellas duplex habetur responsum, primum extat in responsione ad quæsitum 11. dicti P. de Morales, ubi sic habetur. *Censuerunt omninò non licere habere illas tabellas in vero, & proprio Altari majoribus dicato.* Secundum in responsione ad quæsitum 12. ubi sic dicitur, *in quæsito consenta* (inter quæ etiam defunctorum tabella refertur) *Si contineantur intra limites obsequii filialis, & politici esse toleranda.* Utroque hoc responso cum Sinica hujus articuli translatione collato clarissimè constat, quod id quod Sedes Apostolica sub determinata conditione permittit ac tolerat, dicta translatio absolutè ne-

gat, & ejusdem sanctæ Sedis nomine Sinen-
 bus expressè prohibet. Hoc autem an sit de-
 creta Pontificia in Sinicum idioma fideliter ver-
 tere vel illa pro libitu pervertere, cæteri judi-
 cent. Si integrè & fideliter relata decreta Si-
 nensibus Christianis fuissent proposita, ipsi sta-
 „ tim argumentarentur, & inferrent: tabula
 „ illa, vel mensa supra quam defunctorum ta-
 „ bellas collocamus, nequaquam est Altare,
 „ sed mensa communis, & eodem nomine . .
 „ *cho* . . *cu* dictam mensam, ac cæteras com-
 „ munes, & vulgares mensas appellamus. Al-
 „ tare soli Deo vero, vel falsò putato Deo eri-
 „ gitur, in eoque, vel verè sancta, vel sacri-
 „ lega sacrificia conficiuntur, & offeruntur.
 „ Hos majores nostros defunctos in Deorum
 „ numerum nullatenus referimus, nec ipsimet
 „ Ethnici hoc faciunt, pro suis enim defunctis
 „ sacrificia, & preces malis spiritibus, sive
 „ Idolis offerunt, ut ab inferorum suppliciis il-
 „ li liberentur. Ea autem munera, quæ in no-
 „ strorum majorum honorem ante illorum me-
 „ morias, id est tabellas exhibemus nostri
 „ amoris pignora, & grati erga illos animi
 „ signa sunt merè officiosa, & politica, & nil
 „ aliud. Igitur per S. Sedem appositâ conditio-
 „ ne ad amissim servatâ, cur quæso, quod ab
 „ eadem nobis indulgenter permittitur, ab
 „ ejus responsionum, & decretorum Interpre-
 „ te nobis absolutè denegatur? manifestè pater,
 „ Interpretem non quæ Dei, non quæ nostra,
 „ sed quæ sua sunt quærere, & palliato sum-
 „ mi Pontificis nomine, quæ nobis supremus,

ac piissimus Pater benignus indulget, ille violenter surripit, nobisque illudit. An hujusmodi Neophytorum expostulationes justæ sint, an non, æquo & pacato animo cumque judicandum relinquo.

Cæterum quod Tabellæ defunctorum apud Sinas tantummodò sint illorum repræsentatio, & memoriæ eorundem excitatio, & nihil superstitiosum ex sua institutione contineant in peculiari, & quidem copioso tractatu demonstrabitur, & omnia contra hoc objecta abundè diluentur.

ARTICULUS VI.

Textus Sinicæ Translationis

.....

Versio hujus Textus,

Pecuniam alteri fœnerare non convenit.

AD meliorem hujus articuli intelligentiam, & ad certius de eo efformandum judicium, duo præmittenda sunt. Primum quod hæc latina dictio, *Pecuniam alteri fœnerare* in tota sua latitudine, atque genericè sumpta, significat pecuniam alteri tradere, ad lucrum ex sorte, ut aiunt recipiendum, sive hoc fiat juxta, vel contra justitiæ leges, adeoque indifferens est ad significandum sive licitum, si-

ve illicitum sœnus, hoc faciliè probari potest ex latinæ linguæ scriptoribus, & dictionariis, ex moralis Theologiæ Doctõribus de sœnore tractantibus, ut ex sacræ scripturæ commentatoribus in locis, ubi hoc nomen sœnus, vel verbum sœnerare inveniuntur secundum hæc Sinica dictio . . *fam* . . *ly* . . *cien*, sive . . *fam* . . *cien*, utraque enim in communi usu Sinarum eundem sensum refert, superiori latinæ dictioni, *Pecuniam alteri sœnerare*, nisi aliud addatur omninò correspondet cum hac tantùm differentia, quod latina dictio in malum sensum sæpè sæpius accipitur, Sinica verò locutio nisi aliud addatur in bonum sensum semper accipitur.

His positis, si præsentis articuli Sinica translatio cum Romano Autographo conferatur, utriusque maxima discrepantia manifestè colligitur. In translatione quidem, summus Pontificis nomine Neophytis denunciatur ipsum decrevisse, ut iidem absolute, & simpliciter, & ex consequenti quocunque modo si ve licito, si ve illicito pecuniam alteri non sœnerarent; in Pontificii autem decreti Autographo ad quæsitum 3. Patris de Morales, de iusta & licita sœneratione pecuniæ statuitur, & in quo lucri iusti recipiendi radix consistat, & causa declaratur. Cum ergo de hoc in Sinica translatione mirum servetur silentium, clarè patet, in quas angustias, & conscientiæ scrupulos miseri Neophyti redigantur, cum illis falsò assumpto Pontificio nomine, & eâdem planè formulâ, quâ in 3.^o articulo Idolo *Chinæ*

Hom. sacrificia offerre interdicitur, in hoc præfenti textu id illis prohibeatur, quod cæteris fidelibus ubique terrarum ad cujuscunque arbitrium exercendum relinquitur.

Ut verum fatear, mihi certius esse videtur relatum Sinicam translationem non esse interpretis intentioni conformem, sed tantum ex sibi non benè parata Sinicæ linguæ, & litterarum debita notitia processisse, etenim difficile creditu videtur in hunc errorem illum scientem, & volentem impegisse.

Ex hoc ipso validum potest confici argumentum, scilicet quòd si in materia tum gravi ad explicandum tum facili, & à qua malè explicata immania subsequi possunt inter Neophytos scandala, & animarum detrimenta, nihilominus huic translationi Auctor suo muneri adeò defuit, quid dicendum, & suspicandum est, de omnibus, & singulis septemdecim quæsitis à P. de Morales Romæ propositis, cum ad ea juxta rei veritatem explicanda, non solum communium, & vulgarium Sinensis linguæ locutionum, ut est ea, de qua hic agimus, perfecta scientia requiratur, sed insuper summoperè necessarium sit plura, ne dicam plurima Sinensium litterarum millena, earumque omnium, & singularum, sive complexim, sive disjunctim multiplices implexos, & æquivocos sensus, non tantum ex communibus vocabulariis bene percipere & aptiorem, & subjæctæ materiæ congruentiorem sensum feligere, prætereà oportet longè diuturno, & improbo studio plurimorum antiquorum, &

modernorum Sinensium volumina pervoluta-
re, conferre uniuscujusque auctoritatem, æqua-
lance perpendere, opera genuina à supposi-
tis segregare, tempora in quibus fuere des-
cripta attentius advertere, quæ dogmaticè,
quæ poëticè, quæ seriò, quæ officiosè, quæ
propriè, quæ figuratè perspicaciter ponderare.
Item ritus, & mores Sinicos Europæis ut plu-
rimùm valdè oppositos; & primâ facie, seu
rationi dissonos, seu vanos, in rei tamen ve-
ritate, nec ratione, nec solido fundamento
destitutos adæquatè dignoscere, eorum insti-
tutionis tempora, & causas perscrutari, illo-
rum formale objectum, & constitutum à te-
merè adjectis accidentibus secernere, commu-
niter receptos, à communiter reprobatis, su-
perstitiosos à politicis, permisos Christianis,
vel interdictos radicitus indagare, & conside-
ratè distinguere. Cùm hæc omnia ut plurimùm
Quæstorum auctori, & pluribus ejus asseclis
defuerint, immò vulgarium, & tritissima-
rum Sinensium locutionum sensus illos sæpè
latuerit, quomodo ipsorum dictis tutò, & in-
dubitanter credi posse jure merito judicabitur?

ARTICULUS VII.

Textus Sinica Translationis

.....

 ,
 ,

Verfio hujus Textus,

Tempore Baptismi convenit, ut sacerdos omnes mulieres sancto Oleo vice alterius inungat, & sanctum sal gustandum eisdem præbeat, & in eorum mortis articulo convenit, ut vice alterius sanctum Oleum, iis conferat.

IN hac Sinica translatione quatuor consideranda sunt.

Primò. Interpretem reticere, & intactam præterire summè necessariam particulam in decreti Autographo contentam, scilicet, ut *quantum in se est*, Sacerdos dicta sacramentalia & Sacramentum extremæ Unctionis mulieribus conferre nitatur. Hæc autem particula nobilem sub se continet sensum, & emphasim, Missionariis, & *ipsis etiam* Neophytis aprimè scitu necessariam, Missionariis quidem ut ritè & prudenter suum officium peragant, frequenter enim in his omnibus datur casus, in quo ex gravi necessitate proportionata possint omitti quædam sacramentalia in Baptismate fœminarum, ac etiam omitti Sacramentum extremæ Unctio-

nis id posse fieri sacra Congregatio Universalis Inquisitionis Romanæ die 23. Martii anni 1656. coram sanctissimo Domino nostro Alexandro Papa VII. declaravit, & idem Sanctissimus approbavit. in responsis ad quæsitâ P. Martinii. Est etiam Neophytis scitu summè necessaria hæc declaratio, sive indultum, ut cum casus accidat in quo Missionarius ad non conferendum dictum Sacramentum, & sacramentalia gravem necessitatem proportionatam dari arbitretur, Neophytus præhabitâ Pontificii decreti integrâ notitiâ Missionarii judicio subjiciatur, & conquiescat, nec ultrâ ad importunè inquirendum illud Sacramentum, & sacramentalia progrediatur. Si autem de relato Pontificio decreto fideliter condocesactus non sit, non temerè arguet ex tenore responsionum ab Interprete travillatarum, Missionarios Societatis in hac materia hætenùs errasse, & modo etiam eadem decreta negligere, & frangere, & Sinensibus fidelibus semper, & ubique necessarium Sacramentum, & sacramentalia impiè denegare.

Secundo notandus est in adhibenda Sinica littera . . . *ray* Interpretis lapsus, hæc enim littera in præsentî textu significat *vice alterius* ideòque minimè appositè in hoc articulo bis collocatur, & jubetur, ut Sacerdos in Baptismo, & in infirmitate &c. Sancto oleo *vice alterius* fideles mulieres inungat. Certum enim est, quòd Sacerdos Pastoris munus exercens ex vi sui officii oleo sancto ungit Baptismum recipientes, & infirmos, idque *vice alterius*
non

non agit, ideóque dicta littera *ay* in præsentí articulo apponi non debet, tunc autem rectè adhibetur, quando de eo loquimur, qui in aliquo casu vice Sacerdotis Baptismum confert.

Tertiò Interpres Pontificium decretum de sale benedicto Baptismum recipientibus conferendo Neophytis proponit, de saliva autem, qua aures, & nares baptizandi tangendæ sunt prorsus tacet. Hic percontor Interpretem: cum apud Apostolicam Sedem quæsitum fuerit, an Missionarii Sinenses in collatione Baptismi à tangendis salivâ-auribus, & naribus baptizandi possint abstinere, & eadem sancta Sedes responderit sacramentalia à dictis Missionariis quantum in se est debere conferri, ad quid Interpres in sua versione de oleo sancto, & sale benedicto loquitur, & de saliva penitus tacet? hujus reticentiæ ratio, quæso proferatur.

Quartò Autographum Romanum ab Interprete translatum loquens de sacramentalibus in Baptismo, & de Sacramento extremæ Unctionis mulieribus conferendo ad *ly* mulieres particulam *omnes*, non præponit, Interpres verò ex suo illam addit, & ex propositione indefinita eam facit universalem neminem excludentem. Cur quæso Interpres id superaddit? Satis ni fallor apparet interpretis intentionem fuisse, illam limitationem *quantum in se est*; in Autographo appositam fortiùs excludere, & absolutum, & universale decretum, sine ullius exceptionis admissione, etiam datâ quacunque gravi necessitate proportio-

natâ formare, vel effingere. Hoc autem esse contra manifestam Sedis Apostolicæ mentem nemo non videt.

ARTICULUS VIII.

Textus Sinica Translationis

.....

Versio hujus Textus,

Omniſibus maribus, & ſceminis Chriſtianis diem dominicum, & magnos dies feſtos, abſtinentiam à carnibus, & jejunia ſervare convenit.

IN hac Sinica Pontificii decreti translatione Interpres tripliciter labitur.

Primò. Circa jejunia Neophytis Sedis Apostolicæ nomine denunciat omnes tam mares, quàm ſceminas *convenire* ut jejunia ſervent; hoc autem tali modo loquendi propositum falſum eſt, non enim hac illimitatâ univerſalitate ab Eccleſia fidelibus proponitur; plurimæ enim ab illa in ſacris Canonibus, ejusque ſacris Doctoribus declarantur cauſæ, & exceptiones, propter quas plurimi utriusque ſexûs fideles abſtinentia à carnibus, & jejunio excuſantur, eas autem rudibus, & imperitis Neophytis explicare ſummopere oportebat.

Secundò nullam mentionem facit de Sedis

Apostolicæ indulgentia, quòd possit circa jejunia Sinensibus fieri dispensatio, si petatur, prout Indis occidentalibus indultum fuit, ideòque cum hoc Interpres omiserit, iidem Neophyti ad omnia Ecclesiæ jejunia à S. Sede se inviolabiliter obligari, non temerè arbitrabuntur. Cur ergò quod supremus Pastor liberaliter ex parte laxat, ejus valdè inferior Minister avarè restringit, ac denegat?

Tertiò Potissimùm notandum est, quòd Patres Societatis à Sinicæ Missionis initio singulis annis Kalendaria festorum, & juniorum vulgarunt, monendo Christianos illos ea servare conveniens esse, & ad hoc explicandum usi sunt littera *y* . . quæ omninò coincidit cum superius relata littera . . *Cay* in ordine ad significandum convenire, decere &c. Usi sunt olim iidem Patres dictione non præceptivâ, sed consilium innuente piæ Matris Ecclesiæ sensui, & usui sedulò inhærentes: Ecclesia enim cum Neophytis indulgenter semper se habuit, & circa jejunia præcipuè patet in Responsis Nicolai Papæ 1. ad consulta Bulgarorum cap. 41 ubi sanctissimus Pontifex de jejuniiis à Neophytis servandis interrogatus sic ait. *Quor temporibus; vel diebus in circuitu sit anni à carnibus abstinendum nunc vobis, qui rudes estis; & in fide quodammodò parvuli supersluè ducimus expouendum, relatis verò jejuniiis, quæ tunc temporis Romana servabat Ecclesia, Pontifex iterum ait, Nos autem vobis, qui, ut prætulimus adhuc rudes estis, & lacte tanquàm parvuli nutriendi non grave potuimus jugum, donec ad solidum cibum veniatis*

imponere. Ita sanctissimus Pontifex, uti habetur tom. 3. Conciliorum p. 1. sect. 2. pag. mihi, 521. Hic inter cætera apprimè ponderandum est, quod summus Pontifex hac ratione Bulgaris respondet, licet eo tempore tota Bulgaria cum suo Principe suavi Christi Domini jugo se jam subjecisset, quid autem Sinensium pusillo gregi inter innumeros gentiles, & sub Imperatoris Ethnici potestate constituto respondisset? Licet autem nostri Patres Sinenses cum Neophytis olim, ut dictum est se se gesserint, non tamen eisdem manifestare prætermiserunt jejuniorum & festorum dierum (ut etiam Confessionis, & Communionis annuæ) observantiam cadere sub præcepto, & sine causa eam omittentes, peccare. Hoc patet in supracitato Catechismo *Ki mum* dicto à P. Joanne de Rocha non longè ab hujus sæculi initio typis impresso cap. 9. ubi Ecclesiæ præcepta sub nomine . . . *Sliay* id est *præcepta* fusè explicantur. Clarè enim ibi asseritur Christianos ad ea servanda sub præcepto teneri; additur autem, quòd Ecclesia, ut pia, & misericors Mater tenellos in fide Neophytos ad ea integrè servanda paulatim assuescat. Deindè processu temporis P. Julius Aleni in sacrarum precum manuali ejus tempore edito, ad calcem, tractatum adjunxit cui nomen est . . . *Tie* . . . Cui . . . *Chim* . . . *Quey* . . . *Lio* id est *compendium rectæ regulæ ad detergenda peccata* ibi in examine tertii præcepti Decalogi ad Confessionem sacramentalem præmittendo, clarè, & strictè asserit quod die festo Missam non audire, je-

junia non servare, insuper debito tempore peccata non confiteri, nec Eucharistiam sumere, singula esse peccatum. Hinc constat quomodo nostri Patres Sinenses olim se gesserint in introducenda præceptorum Ecclesiæ inter Neophytos observantia, primum mitius, & tanquàm ex Consilio, deinde arctius promulgando præceptum, & in ejus violatione peccatum. Totum hoc iidem Patres peregerant, antequam P. de Morales vel quæstionem de hac materia moverit, vel romana responsa ad Sinas referret, & promulgaret. Sed ut ad Interpretem redeamus; si ipse ut suprà dictum est circa festa, & jejunia à Patribus Societatis quorannis publicata, ita se habere conspexit, quid ulterius suæ translationis pervulgatione Neophytis proposuit, quod Patres Societatis longè antè eisdem non proposuissent? Nonne potiùs interpret per sua quæsitâ amplissimam de nobis malè suspicandâ apud romanam Curiam, & ubiquè terrarum materiam præbuit, quàm per suam translationem Sinenses Neophytos de re sibi per Patres Societatis jam diù notissima utiliter edocuerit?

Ex omnibus, quæ in præsentî capite dicta sunt evidenter infertur, quàm graviter Pontificii decreti Interpret in ejus Sinica translatione suo muneri, & debitæ fidelitati defuerit, & quot ac quânta errata commiserit, nunc ad ea, quæ in eadem translatione omisit enarranda veniamus.

CAPUT III.

De iis quæ in Sinica Pontificii decreti translatione Interpres omisit, & ex toto reticuit.

PRæter illa quæ in secundo cap. circa Interpretis omissiones notata jam sunt, adhuc eorum longa series restat, quæ ne uno quidem verbo eidem arrisit attingere, ea nunc eo ordine, quo in latino decreti Autographo responsionum ad quæsitâ P. de Morales inveniuntur, distinctè hîc referuntur.

Primò. In responsione ad primum quæsitum circa Confessionem, & Communionem semel in anno faciendam declaratur, necessarium esse notificare Sinensibus Neophytis obligationem annuæ Confessionis, & Communionis, & quid ab illis agendum sit, cùm legitimum adsit impedimentum, aut grave periculum immineat. Insuper hoc idem Neophytos edocendi præceptum Missionariis proponitur, & inculcatur.

Hæc Interpres in sua Sinica translatione edocere prætermisit. Si id actum est, quia constabat cum Sinensibus de hoc agere non oportere, eò quod ista callerent, & quantum fieri potest, exercerent, cur quæso apud romanam Curiam hujusmodi fuit oblatum quæsitum?

recogitari sanè debuerat, quod cum hujusmodi interrogationes sacris Romæ Tribunalibus non superflue, & otiose, sed valdè necessariò proponi, rationabiliter supponantur, cum longe aliter hoc in rei veritate processerit, nonne timendum est, ne tale quæsitum parùm sincerè propositum esse videatur; ut omnes certò judicarent per figuram interrogationis Societatis Jesu in Sinis Missionarios dictorum observantiam oscitanter negligentes directè perstringi? Illos autem Patres hoc non curare, est re vera falsissimum, quia in Sinensis Missionis initio, in doctrina Christiana typis edita, quam vocant *Tien Chu Xim Kiao yao* inter Ecclesiæ præcepta hoc specialiter, & individuum pervulgarunt, & perpetuò eorum observantiam Christianis inculcant, & ab iis, quantum fieri fas est, requirunt.

Secundò in responsione ad quartum quæsitum declaratur in statu usurario permanentes baptizari non posse; item si quis à judice compellatur ad mutuum, posse aliquid ultra sortem accipere, ratione oneris, quod subire cogitur: insuper circa accepta pignora justitiæ consentanea doctrina proponitur.

Hæc omnia Interpres profundo involvit silentio, & de iis, quæ tam ardenti zelo, & acri conatu proposita fuerant Apostolica responsa Sinensibus proferre non curat.

Tertiò in responsione ad quintum quæsitum circa obligationem restitutionis ab Usurarii filio faciendæ Usurarii lucri, quod Pater acceperat, ipsemet quæsitox ad regulas à Doctori-

bis traditas, & ad docti, pii, & prudentis viri judicium remittitur.

Hæc omnia, & singula Interpres Sinicè transferre neglexit. Liceat mihi modò eundem sic amicè alloqui; cur quæso priusquàm quæsitorem Autor tam vasta, & periculosa itinera conficeret, & tantam pecuniæ vim expenderet, ut Romam accederet, unam saltem vulgarem summam Doctrinæ moralis, vel doctum aliquem pium, & prudentem virum in his partibus existentem non consuluit, ut tot itineribus, periculis, & sumptibus parceret, solutionem enim hujus dubii & quæsitum statim, & facillè obtinuisset? juxta plurimos sacros Canones (ab Antonio Augustino in juris Pontificii Epitome 32. adducuntur) majora tantùm negotia, & ab aliis indissolubilia dubia sunt ad S. Sedem Apostolicam referenda, ne supremi Principis veneranda Majestas levi, & superfluo recurso offendatur, & quasi contemni videatur. Quæsitorem sanè oportebat advertere, hujusmodi quæsitum audientes, non Quæsitoris imperitiam exprobraturos, sed de Doctrina Patrum Societatis, quasi verò non Catholicè de usuris sentiant, & Neophytos doceant, pessimè judicatuuros. Quid enim aliud cum de re notissima supremum interrogatur Tribunal, nisi ut nobis ægrè sit homines suspicabuntur?

Quartò in responsione ad quæsitum 6. de Contributionibus, quæ à Neophytis sunt in publicis lætitiæ demonstrationibus, & etiam festis gentilitiis, Neophytos id agere posse declaratur dummodò non intendunt ad actus Idolatricos

lolatricos , & superstitiosos concurrere , suppositâ evitandorum tumultuum causâ præsertim præmissâ , si commodè fieri potest , protestatione , quòd imposita tributa præstant in ordine tantùm ad populi lætitiâ , & ad actus indifferentes vel saltem cultui Christianæ religionis non repugnantes.

Hoc Pontificium responsum ab Interpretis calamo ex toto excidit , & evanuit. Hanc taciturnitatem considerans , valdè suspicor quæsitorem longè diversum sperasse responsum , nempe , ut omnia in quæsito allata prohiberentur. Ratio suspensionis est , quia hujus Pontificii responsi doctrina ex pluribus Autoribus , qui de fide scribunt , desumi facilè poterat , his ergo relictis aliud strictius responsum obtinere tentavit , suæ opinioni magis favens , quàm nostræ in præsentis S. Sedis responso stabilitæ.

Attamen suspicionem hanc procul rejiciamus , & Interpretem sic appellemus. Cur quæso tam favotabilem Neophytorum plurimos conscientiae scrupulos eximentem , & à mille molestiis , & vexationibus ethnicorum eos extricantem doctrinam tacitus prætereundo iisdem invidit ? Cur onera Sinenfibus importabilia de falso putato illicito cultu Confucii , & suorum defunctorum & de nullo pacto exercenda scœnatione pecuniæ , etiam quando evidenter est licita , adeò vehementer inculcat , vel inculcare intendit , & quod Neophytis faver , illos celat ? Admiror equidem , Quæsitorem secum non reputasse homines hinc

facile illaturos , malle illum erga Neophytos Novercam agere quàm Matrem.

Quintò in responsione ad quæsitum 7. circa cultum Idoli *Chim Hoam* Neophytis Sinensibus falsissimò imputatum ab Interprete supprimitur Pontificii decreti declaratio , quod illicita sit occulta sanctæ Crucis dilatio , vel inter flores sacrilegi Altaris absconsio in externo cultu dicti Idoli , intentione ad adorandam sanctam Crucem , & non Idolum directâ.

Hic percontor Interpretem factum in quæsitò suppositum vel est verum , vel falsum : si verum , cur Neophytos de Apostolico hoc decreto non commonefacit , nec de tam enormi errore per illum manifestè damnato eos dedocet ? Si falsum de crimine falsi quæditorum purget Autorem.

Sextò in responsione ad quæsitum 8. circa cultum Confucii , ubi supponitur Confucio *Templa* , & *Altaria* erigi , destinatos esse ad ei sacrificandum *Sacerdotes* , de facto ei sacrificari , *Idolothyta* accipi , & avidè manducari ex erroneo iudicio , quod ex tali manducatione magnus in litteris , & gradibus progressus obtinebitur , & hæc omnia sanctæ Crucis in manibus delatione justificari à Neophytis , & licita judicari. Cùm tamen hæc omnia in Pontificia responsione , nec licere , nec posse permitti apertissimè declaratum sit. Interpres ne unum quidem verbum de his omnibus protulit , sed tantùm juxta Sinarum intelligentiam , & captum expressit *Confucio munera offerre non convenit*.

Non temerè ut reor, judicabitur Interpreter cuncta hæc in Sinicam linguam vertere omisisse, ne ab ipsis Sinensibus de tot suppositionum apud ipsos evidentissima falsitate Quæsitorem autor ad oculum convinceretur. Quomodo enim *Templum* vocari potest, quod juxta Sinas *Gymnasium*, & *Aula* appellatur, & est? Quomodo nominatur *Altare*, quod nomine, & re est *mensa* communis, nec in ea res sacra fit ulla? Quomodo *Sacerdotes* nuncupantur, qui nulla sacra faciunt? quomodo dicitur *Sacrificium*, quod est munus merè politicum? quomodo dantur *Idolothyta*, ubi nullum intervenit Sacrificium? ad quid in illo sperabunt, cujus animæ in rerum natura existentiam litterati Sinenses recentiores penè universaliter negant? Ad quid sanctæ Crucis delatio in eo opere, quod non sacrum, sed profanum, sive civile indubitanter judicant? Quæsitorem Autor, & Interpreter cum Affeclis solidè probent, quod sine debito fundamento supponunt; tunc Sinenses Christiani manus dabunt, & suos ingenuè fatebuntur, & perfectè emendabunt errores. Si verò his, quæ diximus non acquiescat Interpreter, aliam indissolubilem in se excitat difficultatem, fateri enim cogitur, & in iis, quæ circa Confucium ex Pontificio decreto transtulit, unum pro alio, hoc est *munus* pro *Sacrificio* exponens in essentiali sensu quæstionis errasse, & in iis, quæ transferre omisit debitæ fidelitati in re gravissima, & Neophytis summè noxia defuisse.

Septimò in responsione ad quæsitum 9. circa

cultum apud Sinas defunctis majoribus exhibitum conformiter ad factum in quæsito suppositum declaratur, Christianis Sinensibus nullatenus licere fidei, vel exterius assistere sacrificiis in honorem Progenitorum, neque eorum deprecationibus, aut quibuscumque ritibus superstitiosis gentilium erga ipsos, multò minus licere circa præfata ministerium aliquod exercere.

Horum omnium in Sinica Pontificii decreti translatione, nulla prorsus fit mentio, sed tantum dicitur *Christianos Majoribus defunctis munera offerre non convenire*. Nihil de fidei assistentia, nihil de deprecationibus, nihil denique de quibuscumque ritibus superstitiosis, & ministerio circa omnia, in quæsito præfato declaratis universim pro illicitis nihil, inquam, in translatione edicitur, vel innuitur.

Octavò in responsione ad quæsitum 13. Ministrorum Evangelicorum obligatio strictissima declaratur, quod scilicet Cathecumenos docere teneantur sacrificia omnia, præterquam soli Deo esse illicita, cultum Dæmonum, & Idolorum esse relinquendum, & quæcunque hujusmodi cultum concernunt; esse falsa, & Christianæ fidei repugnantia.

Hæc omnia tam substantialia, & Christianæ religionis prima fundamenta mirabili silentio obvoluta Interpretes tacitus præterit. Si hujus silentii causam indagare fas est, maxime vereor, Interpretem ita secum esse ratiocinatum. Si prædictam responsionem summi Pontificis assumpto nomine Sinensibus propono

Neophytis , ipsi me loquentem maximis sibi-
lis , & cachinnis excipient , mille disertiis , &
contumeliis onerabunt , & in malam crucem
amandabunt : dicent enim , quid enim aliud “
à prima die , quâ ad audiendum Catechis- “
mum accessimus , à P. P. Societatis audi- “
mus , quàm unum Deum coli & uni Deo “
sacrificari oportere , Dæmones , & Idola “
eorumque sacrilegos ritus , & nefaria sacrifi- “
cia rejici , & sub pedibus ignominiosè con- “
culcari debere ? hoc esse maximum , & “
primum Dei mandatum. Nos tum Christia- “
ni , tum Ethnici omnes Sinenses nostro Ma- “
gistro Confucio , & majoribus defunctis nul- “
latenus sacrificamus nec enim eos pro Idolis “
habemus , sed tantum in grati animi , & fi- “
lialis obsequii signum eos politicè , & civili- “
ter veneramur. Omnia verò Idola , eorum- “
que omnis generis sacrilegos ritus , hos ut- “
potè Omnipotenti Deo sincerè , & integrè “
Fideles implacabili odio ex intimis cordis “
medullis detestamur , & execramur. Ex hu- “
jusmodi autem nobis à te proposita Pontificia “
responsione manifestè colligimus , nos atro- “
cissimâ , & implacabili calumniâ apud sanc- “
tam Sedem fuisse per summam injustitiam “
accusatos , quasi verò Christum cum Belial “
impiissimè confundamus , & Deum simul , “
& Idola cum pessimis Samaritis adoremus , “
illisque pariformiter sacrificemus. Ut igi- “
tur has , & plures alias acerbissimas querelas
Sinenſium Christianorum subterfugeret Inter-
pres præſens hoc Apoſtolicum reſponſum Sini-

cè transferre, sibi sedulò consulens prætermisit.

Si hanc justissimam expostulationem non admittat Interpres, huic ineluctabili dilemmati cogitur respondere, vel in quæsito 13. contenta suppositio est vera, vel non. Si vera, cum res sit omnium gravissima, & in Pontificio responso dilucidè, & enucleatè, ut illicita declaretur, cur turpiter deceptos Neophytos hac summè necessariâ doctrinâ illam supprimendo defraudat? Si autem dicta suppositio vera non est, falsitatem, & calumniam continet atrocissimam, ideóque illam si non puniri, saltem manifestari, & innocentiae plenè satisfieri opus est.

Nonò in responsione ad quæsitum 14. circa usum Sinicæ vocis, & litteræ . . *Xim* licet in quæsito supponatur ejus significationem restringi ad id quod nomen latinum *sanctus*, *sancta*, *sanctum* in Ecclesia Catholica significat, cum tamen in responsione ad id quæsitum declaratum fuerit non posse aliquod formari iudicium circa vocem hanc & usum ejus, nisi præhabita cognitione Idiomatis, ejusque veræ, & propriæ significationis: Ceterùm si eadem vox in Regno Sinarum habet latitudinem, posse ministros eâ uti, si verò restringatur ad significandam veram, & perfectam sanctitatem, nullatenus posse.

Hæc tam prudens, & æqua responsio Interpreti, ut videtur nequaquam arrisit, ideóque in sua Sinica translatione illius prorsus omisâ mentione silens prætergreditur. Hoc tacuit Interpres, ut arbitror, quia sibi pluri-

mum timuit, ne supinae oscitantiae notâ à Sinensibus omnibus signaretur, quasi verò ipse, & quæditorum Autor cum pluribus sociis nescirent, hanc vocem *Xim* amplissimam habere significationis latitudinem in libris, & communi Sinensium loquelâ passim occurrentem, à Missionariis tamen Societatis, commodatò ut ita dicam acceptam adhiberi ad significandam veram, & perfectam sanctitatem, cum proprium ejus vocabulum in Sinica lingua non invenissent, ut primitivæ Ecclesiæ accidit quæ cum in lingua latina ante divinam legem inter latinos Ethnicos promulgatam nullum vocabulum invenisset, quod veram, & propriam sanctitatem significaret vocem *sanctus*, *sancta*, *sanctum* ad illam significandam assumpsit, ut in 2. cap. hujus tractatûs dictum est.

Utinam Autor Quæditorum, & ad ea responsionum Interpreter legisset Sinicum librum Manilæ typis excussum anno 1607. à R. P. Thoma Majore ex eodem sacro ordine S. Dominici compositum, cui nomen est . . *Ke . . Voa . . Kium . . Ly . . Pien . . Lan* hoc est lectu facilis Philosophia; in hoc opere Autor ejus pag. 70. facie 1. vers. 3. ultimo vocat antiquos sapientes . . *Xim . . hien*, eodem modo illos appellat pag. 306. facie 2. vers. 2. nominat Imperatores Sinenses *Xim . . Kium*. Insuper pag. 223. facie 1. vers. 3. & pag. 299. facie 1. v. 2. & facie 2. v. 3. eosdem Imperatores appellat . . *Xim . . Xam* ex hisce tot locis manifestè patet Patrem Majorem benè intellexisse litteram *Xim* usurpando, si hæc sapientibus tribuatur, nihil

aliud significare quàm insigni, & *supereminenti* scientia præditos viros; si autem Regibus, & Imperatoribus applicetur nullum alium sensum in eadem voce *Xim* designari, quàm omnes Superiores, & in cæteros dominantes homines. Hic est genuinus in prædictis locutionibus hujus litteræ sensus, & voce, & scripto à Sinensibus perpetuò adhibitus, ut Sinicos libros pervoluantibus, sive cum Sinis colloquentibus passim constabit, satius sanè nostro Quæsitóri fuisset prius prædicta maturè, & patienter secum evolvere, & ponderare, quàm de re sibi non rectè perspectâ quæstionem instituere, & coram supremis Romæ Tribunalibus quæsitâ proponere.

Decimò in responsione ad quæsitum 15. circa cultum descripti in tabula nominis pro tempore viventis Imperatoris Sinarum, cum sacra Congregatio summo Pontifice approbante responderit: *Exclusis sacrificiis, & Altari verè, & propriè dicto, cætera quæ redolent tantummodò cultum civilem, aut possunt ad illum reduci, permitti posse*: Hujus tam æqui, & Sinensibus adeò favorabilis responsi Interpres ne unumquidem apicem Neophytis exponere est ausus, vehementer enim, ut credo, à significantissimis Pontificii decreti verbis sibi suisque opinionibus timuit, dum ibi dicitur: *Cætera quæ redolent tantummodò cultum civilem, aut possunt ad illum reduci permitti posse*. Hac Apostolicâ doctrinâ, quæ alibi ex aliis responsis Pontificiis, sacris Canonibus, sanctis Patribus, & Doctoribus abundè elucidabitur, tanquàm gladio

dio ex utraque parte acuto, & quaquaversum facile versabili, omnes ferè objectiones, quæ in hisce controversiis Sinicis de cultu Confucii, & defunctorum contra nostram sententiam formantur, jugulare audemus, & parati sumus.

Undecimò in responsione ad quæsitum 16. Utrum liceat Sinensibus Christianis orare, & Sacrificia facere pro defunctis, qui in sua infidelitate ex hac vita decedunt. Cùm summus Pontifex & sacra Congregatio responderit, *si verè ii in sua infidelitate decedant, omninò non licere.* Hanc responsionem more sibi jam familiari silentio suppressit Interpres. Si verò meum circa hanc taciturnitatem sensum aperire fas est, certissimè judico illum noluisse Sinenses Neophytos audire, sic sibi loquentes: Interpres egregiè “ adeò stultos, vel saltem obliviosos nos arbi- “ traris, ut divinæ legis prima principia nobis “ ex toto, mente exciderint? Nonne Patres “ Societatis in Catechismi primo capite nos di- “ fertissimè docuerunt, quod extra Deum, “ ejusque sanctissimam legem, non est in ali- “ quo alio salus. Non enim aliud nomen est “ sub cælo datum hominibus in quo oportet “ nos salvos fieri. Insuper quod præmium, & “ supplicium in futuro sæculo est æternum, “ nec ex inferis damnatorum ullus datur per “ omnem æternitatem regressus, vel pœna- “ rum finis; quomodo enim pro illis orabi- “ mus, quos Deus immutabili decreto ad in- “ feros condemnavit. Cur ergo tanquam no- “ vam apud nos doctrinam, quasi verò à recta “

„fide erraremus , summi Pontificis nomine
 „hoc nobis denuncias ? Fieri sanè non potest ,
 „quin atrocissima alia calumnia circa hoc apud
 „sanctam Sedem Apostolicam in nos conficta
 jam fuerit. Hanc acerbam exprobrationem in
 se à Sinensibus Neophytis impingendam ,
 cautus Interpres , facillimè hoc est , tacendo
 evitavit.

Si tamen hoc meum de Sinensibus , ut suprà loquitur iudicium non admittatur , necessariò consequitur , ut toties repetita in Interpretem recurrat illatio , scilicet si Sinenses Neophyti juxta in quæsito suppositum errabant , cur illos Interpres de hoc gravissimo errore conformiter ad Pontificium decretum , & præceptum , ne uno quidem verbo commonefacit ?

Duodecimò in decreto sacrae Congregationis quod ad finem responsionum ad septendecim quæsita recitatur summus Pontifex Innocentius X. *sub pœna excommunicationis lata sententia sanctitati suae & sanctae Sedi Apostolicae reservata districtè præcipiendo mandavit , quatenus præfata responsa & resolutiones omnes Missionarii Sinenses diligenter observent , illisque in praxi utantur , ac ab aliis , ad quos pertinebit observari , & practicari faciant , donec sanctitas sua , vel sancta Sedes Apostolica aliud ordinaverit.*

In Sinica hujus decreti translatione duo summè substantialia omninò prætermittuntur. Primum est urgentissimum sub gravissima pœna præceptum circa responsionum observantiam , secundum prudentissima , & maximè ponde-

randa conditio, donec scilicet à S. Sede Apostolica aliud ordinetur. Interpres verò urgentissimi præcepti, & gravissimæ pœnæ loco per mitissimum, & suavissimum verbum, *non convenit*, omnia dissolvit & Pontificia decreta incassa, & delusa reddit. Quoad verò conditionem adeò substantialem appositam cùm hæc futura esset maximo Sinensium Neophytorum solamini, eò quod per illam se esse clementer audiendos cognoscerent, & sperarent, per illius tamen reticentiam miserorum illorum solatium, ac spes intervertitur, & detruncatur, dum decretum Pontificium non conditionatum, ut re vera est, sed ut absolutum, & irrevocabile, circa quod vel leviter hiscere nefas sit, eisdem promulgat Interpres.

Ex dictis superiùs in 2^o. & præsentì 3^o. capite constat utriusque capitis assumptum esse evidenter probatum, scilicet Interpretem in sua Sinica responsionum, & decreti Pontificii translatione, à veritatis scopo, in iis, quæ transtulit toto cœlo aberrasse, & in iis, quæ non transtulit in fidelitate Interpreti debita plurimùm defecisse.

CAPUT IV.

*Suspicio de mala fide, quâ politicus cultus
Confucii, & defunctorum impugnatur,
multipliciter confirmatur.*

HUjus confirmationis argumenta præcipuè
desumuntur ex duobus Sinico Idiomate
conscriptis libellis, sive opusculis, quos R. R.
P. P. Fr. Joannes Baptista de Morales, & Fr.
Franciscus Varus, uterque ex sacro Ordine S.
Dominici confecerunt, & promulgarunt. P.
de Morales opusculo cui titulus est . . Xim . .
Kiao . . Hiao . . Cin . . Kiay, id est *sancta
legis Christianæ obsequii filialis erga parentes explica-
tio*. Hoc autem opus in lucem prodiisse vide-
tur post ejusdem Patris Româ in Sinas regres-
sum, cum responsionum & decreti Pontificii,
de quibus suprâ egimus translationem Sinicam
inter Neophytos evulgavit, quæ translatio ad
calcem dicti libelli apposita circumfertur.

P. Francisci Vari libellus pro titulo habet . .
Pien . . Ci . . juxta dicti Patris intencionem
titulus hic verti debet. *Disputatio de sacrificio*, sed
juxta propriam Sinarum intelligentiam, se-
cundum quam nos exteri cum Sinis loqui, ut
ab illis probè intelligamur omninò debemus,
titulus iste in latinum idioma translatus hunc
sensum propiissimè exprimit de littera . . Ci,

ejusque sensu disputatio, sive de sacrificiis, oblationibus, & muneribus in genere sumptis disputatio.

Objicitur. Autor in hoc opusculo de veri, & proprii sacrificii ratione tractat, & in hoc sensu illicitum esse, præterquàm soli Deo sacrificare, demonstratur; ad quid ergo tituli sensum ad alios à me nunquàm cogitados devias, & distorques.

Respondeo cum Apostolo Paulo 1. Corinth. c. 14. v. 7. quæ sine anima sunt vocem dantia, sive tubâ, sive cytharâ nisi distinctionem sonituum dederit, quomodo scietur id, quod canitur, aut quod citharisatur. Etenim si in certam vocem dederit tuba, quis parabit se ad bellum. Ita & vos per linguam nisi manifestum sermonem dederitis, quomodo scietur id, quod dicitur? Eritis enim in aëra loquentes &c. Si ergo nesciero virtutem vocis, ero ei cui loquor barbarus &c. Nisi igitur P. Varus in suo libro, & præsertim in ejus titulo distinctionem sensus litteræ *Ci* dederit, quomodo à Sinensibus scietur, in quo sensu eam litteram ipse assumat? minimè dubium est, quod per incertæ significationis vocem ad scholasticum disputationis bellum haud ritè se parat, & à nullo Sinarum intelligetur id quod in dicto opusculo tractat, sic ejus Autor ab iisdem tanquàm in aëra loquens, & in incertum currens reputabitur, eò quod virtutem vocis, & litteræ *Ci* nequaquàm fuerit assecutus.

Cæterum ex utroque præcitato opusculo in hoc capite tantum assumam, quæ in præsens

ad rem nostram deserviunt, reliqua si Deus dederit, alibi discutientur. Magnam enim differendi materiam, utrumque opus abundè suppeditat. Modò igitur octo sequentes propositiones expenduntur, quarum fundamentum in dictis libellis invenitur.

Prima. Controversiæ Sinicæ inter Sinenfes Missionarios agitatae à quibusdam ipsorum rudibus, & pusillis in fide Neophytis inconsultò, & cum scandalo communicantur.

Secunda. In disputatione de vero, & proprio sacrificio, ejus essentialè constitutivum non rectè declaratur, & per æquivocationem litteræ *Ci* cum aliis longè diversis rebus confunditur.

Tertia. Tabellæ defunctorum à S. Sede Apostolica Sinensibus pluries permissæ à P. Francisco Varo absolutè damnantur, & prohibentur, licet pluribus ejus sociis contradicentibus, ipsiusque superioribus contrarium præcipientibus.

Quarta. Obsequium filiale supra quam fieri debeat, & liceat extollitur.

Quinta. Quartum Dei præceptum in propositivum, & negativum minùs aptè dividitur.

Sexta. Nova, & nunquam audita Dei mandata, circa defunctorum funera confinguntur & Neophytis proponuntur.

Septima. Quæ juxta Dei legem, vel ex P. de Morales sententia prohiberi debent, & ab eodem faciliè Neophytis conceduntur, & quæ Romæ ille damnari curaverat, degens postea in Sinis approbat, & eisdem indulget.

Octava. Summis , & indebitis laudibus ab eodem Patre cum sociis extollitur Confucius , licet agnitus , sed falsò ut primus Autor rituum , quorum in Romana Curia damnationi , & excommunicationi urgender incubuit.

Ad harum propositionum veritatem singulatim demonstrandam eo ordine , quo recitatæ sunt , accedamus.

PRIMA PROPOSITIO.

Controversia Sinica inter Sinenses Missionarios agitata à quibusdam ipsorum rudibus , & pusillis in fide Neophytis inconsultò , & cum scandalo communicantur.

PRobatur Propositio , postquàm Controversiæ Sinicæ inter Missionarios exortæ sunt ; ex parte defendentium politicum cultum Confucii , & defunctorum , scripti quidem sunt plurimi tractatus sententiam hanc tractantes & confirmantes , hi autem nostris tantùm Patribus , & etiam aliquando adversæ sententiæ propugnatoribus ostensi fuerunt ; cum Neophytis verò de hujusmodi quæstionibus rarò , & solâ urgente necessitate , actum est , & multò minùs nostrarum sententiarum adversas opiniones impugnantes libros , seu opuscula Sinensibus litteris conscribere , & inter Neophytos evulgare ausi sumus. Ex altera verò parte dictum politicum cultum impug-

nantium non solum responsa, & resolutiones ad septemdecim quaesita P. de Morales Sinice translata, & Sinensibus communicata sunt, sed insuper ab eodem Patre opusculum Sinensi idiomate, & litteris confectum est, ad cujus calcem dictarum responsionum versio invenitur, & inter Neophytos vulgatum. Praeterea P. Franciscus Varus aliud simile opusculum elaboravit, & inter eosdem Christianos sparsit. In utroque libello juxta Auctorum intentionem, disputatio de sacrificio instituitur, nec solum sententia dicti cultus politici, manifestè refellitur, sed etiam Pontificiis decretis, & responsis directè contradicitur. Hoc autem, quam grande, & perniciosum scandalum hinc apud Neophytos oriatur, nemo est, qui non videat. Certissimè mihi constat, illos ex hoc licet erroneè colligere nostræ S. legis immutabilia dogmata non esse omninò firma, sed hinc indè academicè disputabilia; rudes enim Neophyti inter invariabiles fidei articulos, & opiniones circa harum quaestionum factum nondum possunt differentiam aptè discernere. Hinc etiam eò prolabantur ut de firmissima divinæ legis veritate secum ambigant. Insuper utramque de cultu Confucii, & defunctorum affirmativam, & negativam sententiam hac ratione distinguunt, quod affirmativa sinat Neophytos parentes honorare, & magistros, juxta evidens naturæ dictamen, & quartum Dei præceptum. Negativa verò hoc idem contra omne rationis lumen Deique mandatum severè, ne dicam impiè prohibeat, clariùs

clariùs hoc ostenditur ex communi Sinarum sensu, tum in eorum libris, tum in vulgari usu loquendi passim expresso, illi enim qui ergà Confucium, & majores defunctos stabilitos reverentiæ, & honoris ritus negligunt exercere, non irreligiosi nominantur, sed ergà magistros ingrati, & inofficiosi, & ergà Progenitores impii, & inobsequentes, & præcipuè peccantes in hoc erga parentes defunctos appellantur. . . *Pu . . hiao . . Cu . .* id est *filii non honorantes parentes.*

Ad majorem dictorum confirmationem ponatur casus, quod politicum cultum Confucii & defunctorum propugnantes, ad suæ causæ justam defensionem, & læsæ famæ restorationem plures libros, Sinicè scribunt, quod cum Dei adjutorio facillimè possunt, solida suæ sententiæ fundamenta demonstrant, & eam impugnantium paralogismos, æquivocationes, & plurimos, atque graves in linguâ, & rerum Sinicarum notitiâ lapsus debitæ fidelitatis in vertendis Pontificiis decretis plusquàm palmares defectus clarè, & dilucidè explicent, quisnam ubique terrarum hoc tanquàm inexpiabile crimen dicti politici cultûs propugnatoribus non exprobraret atrociter, & severissimâ dignos censurâ, & supplicio non judicaret? Quid ergo quod illis non dicere censetur, adversæ sententiæ defensoribus hoc licebit? Equidem satis, superque quotidiana nos docet experientia, quàm ingentia mala ex nimio ardore dictum politicum cultum impugnandi in Sinis accidunt,

& nihil aliud nobis superest, quàm altis suspiriis, & copiosis lachrymis miserabilem harum Missionum statum deplorare, & clementissimum Deum, ut his malis dignetur occurrere humilibus precibus implorare. Consultius sanè, ni fallor, egissent, qui dicta Sinica opuscula inter Christianos sparserunt, & aliud insuper de novo componere, & typis dare, ut mihi constat, tentarunt, si in hac re S. Isidorum audissent, qui lib. 3. de summo bono cap. 42. & refertur, à Conc. Aquisgran. cap. 23. sic ait, non, omnibus ea, quæ sunt clausa, aperienda, sunt, multi enim sunt, qui capere non possunt, quibus si indiscretè manifestantur, statim aut detrahunt, aut negligunt. Prima, igitur prudentiæ virtus est, eam quam docere oporteat æstimare personam rudibus populis, seu carnalibus plena, atque communia non summa, atque ardua prædicanda sunt, ne immensitate doctrinæ opprimantur, potius, quàm erudiantur. Hastenùs S. Isidorus hoc idem optimè inculcatur à S. Gregorio magno 1. parte Pastoralis cap. 4. per hæc verba; cùm rector animarum se ad loquendum præparat sub quanto cautelæ studio loquatur, attendas ne si inordinatè ad loquendum rapitur, erroris vulnere corda audientium feriantur, & cum fortassè sapiens videri desiderat, unitatis compagem insipienter abscindat. Hinc namque veritas dicit. Habete sal in vobis, & pacem habete inter vos. Per sal quippè verbi sapientia designatur; qui ergo loqui sapienter ni-

titur magnoperè metuat, ne ejus eloquio “
audientium unitas confundatur &c. Provi- “
dendum quoque est sollicitè rectoribus, ne “
ab iis non solum prava nullo modo, sed ne “
recta quidem nimie, & inordinatè profe- “
rantur &c. Ita magnus Gregorius cujus hìc “
allata doctrina refertur decreti 1. part. dist. “
43. c. 1. sed hæc pauca de iis, modo satis. “

SECUNDA PROPOSITIO.

*In disputatione de vero, & proprio sacri-
ficio, ejus essentielle constitutivum non
rectè declaratur, & per equivocationem
Litteræ . . . Ci cum aliis longè diversis
dictis confunditur.*

AD hujus probationem præmittenda est
veri & proprii sacrificii definitio. Hæc
autem à Theophylo Raynaudo de virtutibus,
& vitiis lib. 4. sect. 3. num. 281. Sic proponi-
tur, sacrificium propriè acceptum est sig- “
num sensibile deputatum ad divinam ex- “
cellentiam & subjectionem illi ab homine “
debitam significandam per alicujus rei præ- “
manentis Deo oblatae immutationem. Dein- “
dè idem auctor variis rationibus suam con- “
firmans definitionem hæc addit. Non nego “
alios præterea dari fines sacrificii, qui con- “
junctim cum ea significatione quærentur per “
actionem externam sacrificandi: ejusmodi “
sunt, gratiarum actio, beneficiorum impe- “

, tratio , & expiatio culparum &c. Tamen
 , primarius finis sacrificii est is , quem dixi
 , nempè sacrificandi , & protestandi supre-
 , mam Dei vitæ , & mortis Domini excellen-
 , tiam , & totam ad Deum summo jure subje-
 ctionem. Hucusque Raynaudus , & cum eo
 cæteri scholaſtici. Hoc posito , videamus in
 quo P. Varus in suo Sinico opusculo §. 2. post
 quæſitum 2. veri ac proprii sacrificii rationem
 constituat. Ad vitandam autem æquivocatio-
 nem , nunc explico litteram . . Ci juxta di-
 cti Patris intentionem , qua vult hanc litte-
 ram verum , & proprium significare sacrifi-
 cium , sic igitur ait.

.....
 Id est , *Sacrificium sanè est ritus petendi felicitatem , gratias pro acceptis beneficiis agendi , & infortunia evitandi.* Deinde eodem loco paulò inferius hæc addit.

.....

 Id est in summa id ad quod sacrificium respicit , certè ad hæc tria superius allata reducitur , & horum trium principium , & causa ex solo Deo procedit , ergo manifestè patet , tantum uni Deo posse Sacrificium dirigi , & offerri.

Hæc veri , & proprii descriptio sacrificii à P. Varo allata si benè consideretur , essentiam

sacrificii non explicat, cum potissimam ejus rationem, & formale objectum prætermittat, nempe significandi, & protestandi supremam Dei excellentiam, & dominium, & hominum subjectionem ad ipsum. Quomodo ergo Sinenſes Neophyti ex P. Vari verbis, verum, & proprium de sacrificio conceptum efformabunt?

P. de Morales in suo Sinico opusculo, etiamsi veri, & proprii sacrificii uni Deo debiti rationem paulò post opusculi initium aliquantisper explicet, asserendo sacrificari Deo, ut rerum omnium Creatori, & Gubernatori, sed sacrificii essentiale constitutivum integrè non declarat, immò prope libelli finem, Missæ sacrificium describere nitens perperam sanè, & confuse id agit ipsius textum recitemus.

.....
.....
.....
.....
.....
.....

Id est, ad ritum Deo sacrificandi accedamus? Hic ritus est summè æstimabilis, magnus, profundus & excellens. Hujus sacrificii materia est longè diversa ab ea, quæ in sæculi sacrificiis, & politicis oblationibus adhibetur. Illius sacrificii intentio est longè diversa. Veteres ritus legis naturæ, & scriptæ, in sacrificiis Deo offerendis victimas adhibe-

bant. Cùm verò Deus humanam carnem hypostaticè assumpsit, tum magnum Missæ ritum determinavit, nec animalium victimæ jam usui sunt, Missæ autem ritus hic est, sive in hoc consistit Sacerdos, & spiritualis Pater recitat precum librum, Missalis, & orat Dominum. præter hoc, sacrificium, elemosynas pauperibus erogare abstinentiam à Carnibus, & jejunia, se flagellis cadere, prævios animi, & corporis affectus vincere, & similia; nullum ex his non est opus ad Dominum deprecandum, idoneum, inter hæc opera habetur, quod Christiani omnes, præparant varias res, & eas . . Chi . Ci . . id est offerunt in sacrificium. Sacrificiis autem hiscè peractis, res oblatas, pauperibus erogant. Illorum intentio ad Deum respicit, scilicet, ut pro defunctis eundem deprecantur, ut ii à pœnis purgatorii liberentur, & illorum animabus ad cælum ascendendi, & felicitatem recipiendi munus ipse impertiatur. Omnes hujusmodi sacrificii ritus ad Deum potissimum respicere convenit, & licet ii ad homines non respiciant, aut non dirigantur, principaliter tamen offerreptium intentio universim sumpta ad Deum deprecandum dirigitur, ut illorum defunctorum animas adjuvet. Hucusque de Morales, in hoc textu plura sunt notatu dignissima.

Primò tres potiores species significationis litteræ Ci non distinguuntur, scilicet sacrificii latreutici uni Deo debiti, sacrificii idolatrici, verè sacrilegi, & politicorum munerum, quæ tam vivis, quàm mortuis inter Sinas offeruntur, & sub eodem Ci nomine significantur. Cùm ergo adeò necessaria distinctio haud fiat, quæstionis confusio evidenter apparet.

Secundò cùm totius opusculi series ad hoc tendat, ut munera defunctis à Sinensibus oblata esse superstitiosa demonstrentur, in hoc textu asseritur illa munera in materia, & sine à vero sacrificio soli Deo exhibito, esse longè diversa. Hoc igitur à P. de Morales tam clare, & distinctè concessio & insuper cum superius cap. 2. art. 2. constet in prædictis muneribus nec sacerdotem, nec Altare, nec formam sacrificii inveniri, quid aliud hinc consequitur, nisi talia munera nullatenus esse, & vocari posse *sacrificia*. Prætereà P. de Morales incidit in manifestam unius de eodem contradictionem, quia illud, quod vult esse sacrificium, essentiali sacrificii constitutivo carere pronunciat, cùm tale constitutivum à fine tanquàm ab objecto formali specificetur.

Tertiò perperam explicatur Missæ sacrificium per illa verba. *Sacerdos recitat precum librum*, hoc est Missale, & *orat Dominum*, non enim hoc loquendi modo, talis sacrificii constitutivum refertur, Missa enim juxta Theologos est sacrificium incruentum consistens, saltem in consecratione corporis, & sanguinis Christi sub sensibilibus speciebus panis & vini, & est actus patriæ, qui primariò fit in recognitionem supremi dominii Dei, & signum nostræ servitutis, secundariò etiam ad fines particulares offertur, ad agendas gratias, ad impetrationem beneficiorum, ad remissionem peccatorum, ad sanctos honorandos, ad vivos, & Christo mortuos adjuvandos &c. Ex hac igitur sacrificii Missæ descriptione constat,

quàm malè in citato textu illud Neophytis proponatur.

Quartò in eodem textu, omnes Christianos sacrificare, & consequenter illos universim esse sacerdotes, & omnia eorum opera bona esse sacrificia affirmatur. Cùm autem ex toto contextu manifestum sit de vero, & proprio sacrificio hìc agi non benè advertit P. de Morales, dum in hoc sensu loquitur, se Lutheranorum, & Calvinistarum dogma Sinenses Neophytos edocere. Videatur Lessius de iustitia lib. 2. cap. 38. dubit. 2. Greg. de Valentia Apol. de sacrif. Missæ. Bellarminus tom. 2. controvers. de missa lib. 1. cap. 2. & Becanus in Theolog. scholast. & controversiis de hac materia, ibi enim invenietur, quod dicti, & alii hæretici asserunt omnes Christianos esse sacerdotes, & omne opus bonum ab iis ad Deum directum esse verum, & proprium sacrificium.

Ex dictis satis intelligitur, prædictorum opusculorum Autores dum Sinenses Neophytos à cultu Confucii, & defunctorum absolute avertere nituntur, quasi verò illicitis eos sacrificiis venerentur; in quo veri, & proprii sacrificii essentia consistat, eosdem nullatenus edocere. Immo è contra omnia permiscere, & confundere, & quod magis est, penitus reprobendam doctrinam illis proponere; satis equidem fuisset iisdem Autoribus hæc omnia silentio involvere, quàm ea tam inordinatè, & perperam declarare.

TERTIA

TERTIA PROPOSITIO.

Tabella defunctorum à sancta Sede Apostolica Sinensibus pluries permiffa à Patre Francisco Varo absolute damnantur, & prohibentur licet pluries ejus sociis contradicentibus, ipsiusque superioribus contrarium præcipientibus.

ANtequàm P. Vari doctrina, & verba proferantur, præmittenda est dictarum Tabellarum per Sedem Apostolicam ter facta permissio.

Prima habetur ex responsione ad II. quæsitum P. de Morales, ad quod responderetur, omninò non licere habere illas Tabellas in vero, & proprio Altari majoribus dicato, multò minùs deprecationes, & sacrificia eis offerre. Ex hac responsione colligitur, quod si verè dictum Altare, deprecationes, & sacrificia in usu Tabellarum non reperiantur, ut in rei veritate non inveniuntur, absolute illas esse permiffas. Hæc permissio facta est 12. Septembris anni 1645. à sacra Congregatione de propaganda fide, & à summo Pontifice Innocentio X. fuit approbata, ejuusque executio sub gravi pœna præcepta.

Secunda permissio continetur in decreto à S. Congregatione Sacræ Romanæ, & universalis Inquisitionis 13. Novembris anni 1699. emanato, & à summo Pontifice Clemente IX. ap-

probato ad instantiam Patris Fratris Joannis Polanco Ordinis S. Dominici. Ibi enim declaratum fuit, quod supra relatum decretum S. Congregationis de propaganda fide latum sub die 12. Septembris 1645. secundum exposita in dubiis esse in suo robore, & omnia in dictis dubiis expressa, esse servandum prout jacet.

Tertia permissio habetur in responsis, quæ eadem sacra Congregatio sanctæ Romanæ, & universalis Inquisitionis dedit ad quæsitum P. Martini Martinii, ubi decernitur posse tolerari Sinas conversos adhibere ceremonias in dictis quæsitis relatas, inter quas est usus Tabellarum, sublatis tamen superstitionibus; hujus etiam S. Congregationis responsa summus Pontifex Alexander VII. approbavit sub die 23. Martii anni 1656.

Per supradicta sacrarum Congregationum responsa, & Pontificias approbationes, non tantum Patres Societatis intellexerunt tabellas defunctorum seclusis superstitionibus à S. Sede Apostolica Sinensibus esse permissas, sed etiam Patres sacrorum Ordinum S. Dominici, & Francisci idem senserunt. Quatuor ad hoc probandum Testes adduco.

Primus est R. P. Fr. Arcadius cognomine nî fallor à S. Rosario Ordinis S. Dominici, & Sinicus Missionarius, qui inter quæsitum, quæ ad R. P. Fr. Joannem de Paz in Insulis Philippinis morantem virum eximiâ virtute, doctrina, ac fama celebrem, & ejusdem Ordinis religiosum in primo quæsitum de Sinicis Tabellis, sic ait, (hispanicum ipsius sermonem

in latinum verto) *Universalis Inquisitionis Qualificatores ad P. F. Joannem Polancum , & P. Fr. Dominicum Navarrete respondentes omninò eas prohibent. Attamen summus Pontifex Innocentius X. eas non prohibet , nisi in vero & proprio Altari Majoribus dicato. Sic P. Fr. Arcadius circa id quòd dicitur à memorato Patre de Qualificatoribus sanctæ Romanæ , & universalis Inquisitionis , intelligendum hoc puto , ni fallor , quòd sapientissimi Patres negarunt esse licitas Tabellas in sensu composito cum superstitionibus , quas illis inesse , in propositis quæsitis , suppositum fuerat. Cæterum non fuisse illorum intentionem illas prohibere , seu illicitas declarare in eo sensu , in quo ut supradictum , & à S. Sede Apostolica permittuntur , id est *seclusis superstitionibus*.*

Secundus Testis est perfectus P. Fr. Joannes de Paz , qui in responsione ad prædictum quæsitum P. Fr. Arcadii sic loquitur hispano ejus idiomate in latinum verso. *In decreto sacræ Congregationis de propaganda fide ab Innocentio X. approbato permittuntur Tabellæ dummodò in vero Altari Progenitoribus dicato non maneant.*

Idem P. de Paz ad repetitum de hac materia quæsitum à R. P. Fr. Andrea Lopez Ordinis S. Dominici , & Sinenfi Missionario sibi propositum distinctiùs per hæc verba respondit , *ad 11. P. Fr. Joannis Baptiste de Morales quæsitum de progenitorum defunctorum Tabellis eadem sacræ Congregatio respondit non esse licitum illas habere in vero , & proprio Altari dictis defunctis dicato. Itaque Tabellæ non sunt absolute prohibita , nisi in casu in*

quo in Altari defunctis dicato sint collocata., Haftenus P. de Paz.

Tertius testis est R. P. Fr. Dominicus Maria de sancto Petro ejusdem Ordinis S. Dominici, qui præter ejus præclaras dotes in Sinicis litteris, & ritibus est apprimè versatus. Hic in peculiari tractatu, quem de Sinicis controversiis eximio studio elaboravit, sic ait hispanum ejus sermonem latinè transfero. Præter dicta optarem, ut fratres mei hoc unum adverterent, scilicet quod etiam si P. Fr. Joannes Baptista de Morales sacra Congregationi proposuerit Infideles sacrificare Tabellis, easque animarum sedes vocaverit, non propterea eas sacra Congregatio prohibuit, nisi in vero, & proprio Altari. Quid autem egisset, si ipsa scivisset quod mensa munerum defunctis oblаторum non est verè, & propriè Altare propter rationes jam dictas, neque aula in qua id agitur est templum, neque munerum oblatio est sacrificium & encomia, orationes funebres, nihil aliud esse, quàm hyperbolicas laudes, & Tabellam nihil aliud esse, quàm defuncti viri imaginis substitutum, illamque non vocari sedem, nisi metaphoricè, repræsentativè, & solâ opinione, vel cogitatione, & ante illas domesticorum negotiorum narratio, obedientiæ, filialis pietatis erga parentes defunctos manifestationem, sive manifestationis speciem non excedit; agunt enim cum eorum imagine eosdem actus, quos coram illis viventibus egissent. Haftenus P. de S. Petro, cu-

jus singula dicta verissima, & notatu dignissima sunt, & alibi Deo favente Sinicis textibus confirmabuntur, & elucidabuntur.

Quartus Testis est R. P. Fr. Bonaventura yubanches è sacro Ordine S. Francisci omnium suæ religionis Missionariorum in Sinis superior, & Commissarius Provincialis. Hic in quodam scripto propriâ ipsius manu exarato, quod mecum servo, cum Cantone degerem 2. Julii 1680. ad me transmissio, in quo agit de modo, quo cupit dictas Tabellas reformare, earum fanè usum proculdubio admittit, & tamen quam ibi proponit, reformatio an sit necessaria & opportuna, alibi plenè discutietur.

Præter hos quatuor tam fide dignos testes, quibus ullam exceptionem dare posse nefas est, aliud etiam majoris ponderis addi debet, scilicet quod R. P. Fr. Carolus Clemens Ordinis S. Dominici, & Philippinarum Provincialis, variis vicibus Missionariis suis subditis in Sinis degentibus imperavit, ut cum Societatis Jesu Patribus in eadem Missione morantibus uniformiter in ritibus agerent. Hoc ex variis ejus epistolis in nostro Archivio servatis constat. Item R. P. Franciscus de Paula ejusdem Ordinis, & Provinciæ Provincialis, eisdem Patribus sibi subiectis jussit, ut responsionibus à P. Martino Martinio Româ allatis se conformarent. Denique R. P. Fr. Philippus Pardus ejusdem itidem Ordinis, & Provinciæ Provincialis præciratis sibi subditis vetuit, ne in suis libris illi doctrinæ contrarium scriberent, quam Societatis Patres scripssent in suis. Hæc

omnia manifestè constant ex epistola prædicti Patris de sancto Petro ad suum Provincialem, & Definitorum Capituli Provincialis Philippinarum conscripta; quæ ante initium citati tractatus ejusdem Patris invenitur. Cum igitur sacrarum Romanæ Curiae Congregationum responsiones à summis Pontificibus ter approbatæ, Tabellas defunctorum seclulis superstitionis, Sinensibus permittant; item cum talem esse earundem responsionum sensum prædicti valdè æstimandi testes affirmant; cum denique in ritibus Sinensibus conformitate nobiscum, responsionum à P. Martino Martinio allatarum observantiam, & ne quid nostræ doctrinæ contrarium in libris conscribatur, Tres Provinciales Ordinis S. Dominici Missionariis Sinicis suis subditis præceperint.

His omnibus non obstantibus P. Franciscus Varus in sui Sinici opusculi quæsito dicto hæc quæ sequuntur exarare non timuit, & apud Neophytos evulgare non dubitavit. Sic igitur ait.

.....

Id est. *Quæritur. Sinenses omnes consanguineis, affinibus, sapientibus demortuis erigere & exponere Tabellas ad eos honorandos, hoc præcipuè antiquo ritui attribuitur, & in ejus usu, petendi felicitatis intentio non intervenit? Cur ergo sancta Dei lex hoc interdicit? Respondetur Tabella defunctorum est fal-*

sa , deceptiva , & erronea res , quomodo ergo fieri potest , ut sancta lex eam non prohibeat ?

In quæsito etiam 11. ejusdem opusculi idem Autor has Tabellas appellat.

.

Id est Aula defunctorum falsas imagines , sive Idola.

Ex utroque textu planè constat , quantum P. Varus Apostolicis decretis , cæterisque supra relatis directè adversetur , & quomodò suam privatam opinionem , tanquàm divinæ legis dogma , & præceptum ipse proponat , quâ fide erga veritatem , & quo Sinensium scandalo cæteri judicent , quæ ab Autore ad suam stabiliendam sententiam loco citato , & in aliis ejus manu scriptis tractatibus afferuntur ; alibi plenè expendentur ; modò enim de mala fide , in quânam altercantium parte ipsa consistat , per modum præludii pertractamus.

QUARTA PROPOSITIO.

*Obsequium filiale supra quam fieri debeat ,
& liceat extollitur à P. de Morales in
sui opusculi prima periodo , ait.*

.....

*Id est Sanctæ Dei legis obsequium filiale , est pri-
ma res necessaria.*

Licet Autor verbis post hunc textum im-
mediatè sequentibus asserere voluisse vi-
deatur , obsequium filiale in lege Christiana
exercitum , cum obsequio filiali ab Ethnicis
suis parentibus præstito comparatum , illud
isti præcedere tamen negari non potest , prima
jam relatæ periodi verba magnam continere
æquivocationem , & Sinensibus in parentum
obsequium propensissimis non leviter offendi-
culum asserre , cùm ex illis verbis facillimè
inducantur , & apud se arbitrentur primum ,
& magis in divina lege necessarium esse hono-
rare Parentes. Confirmatur hoc ex ultima opus-
culi periodo , ubi absolutè , & sine ulla æqui-
vocatione sic dicitur.

.....
.....

*Id est unius Dei cultu excepto , honorare Parentes ,
est prima res necessaria.*

Hæc

Hæc propositio sub his terminis enunciata videtur penitus falsa, & Neophytis scandalosa, ne dicam illam quoque esse hæreticam, etenim cultum B. Virginis, & sanctorum, filiali ergà Parentes cultui postponit, cui ille proculdubio præferri debet. Quod autem sit falsa, præterquàm quod allata ratio id persuadeat, insuper probatur ex eo, quod multa alia sunt homini ad salutem magis necessaria, quàm cultus parentum, nam si parentes sint mortui, vel etiam si vivi sint, & absentes, sine ullo ergà eos cultu æternam salutem assequi possumus. At verò sine observatione aliorum mandatorum, quorum aliqua sunt negativa, quæ pro omni tempore obligant, impossibile est æternam adipisci salutem. Deinde si de vivis parentibus agatur, quod Autor non determinat, certum est, quod in singulis Dei præceptis ad salutem consequendam observandis, non datur magis, aut minùs necessarium, cùm singula sint ita necessaria, ut uno tantùm non servato salutem obtinere sit impossibile. Unde Christus simpliciter, & absolutè pronunciat, *si vis ad vitam ingredi serva mandata*. Falsò ergo dicitur, quod *colere parentes post Dei cultum sit primum maximè necessarium*.

At fortassè respondet Autor, quod per *h* necessarium intelligit præcipuum, sive magis principale, & strictiùs obligatorium. Hoc autem quoque falsum esse, sic ostenditur. Præceptum magis obligans, in majus peccatum violantem inducit, sed majora dantur pecca-

ta, quàm præcepti de honorandis parentibus violatio, illud enim cùm sit positivum, omissione frangitur. Quis autem non dicet esse majus peccatum, seipsum, aut quemlibet alium occidere, quàm cultum parentum negligere? Similiter fornicationem, adulterium, pactum inire cum dæmone &c. levius hoc esse, quàm in cultu eorundem parentum per omissionem deficere quis autumat. Præterea peto ab Auctore, quodnam sit majus peccatum, parentes, vel Ecclesiam non audire sanè hoc est gravius, cùm nos Ethnicis publica vis similes efficiat: obsequium igitur filiale nullo modo præferendum est obsequio, & submissioni, quam Ecclesiæ Christi Sponsæ quisque debet, adeoque prædictam propositionem temerariam, & falsam esse, videtur non posse dubitari. Denique ea propositio est Neophytis scandalosa, cùm per illam perperam doceantur, quod præter peccata, quæ directè contra Dei cultum committuntur, nullum sit gravius, quàm parentum cultum negligere, & quod in vita Christiana parentes deserere ad Evangelica consilia sequenda non liceat, juxtà illud Christi: *Qui non odit Patrem & Matrem, non potest meus esse discipulus.*

Non temere forsan quis opinabitur P. de Morales dictis propositionibus suum tractatum à capite ad calcem præclusisse ad sibi captandam Sinensium benevolentiam, & quasi illius extrema dulci lacte & melle tinxisse ad tegendam, quæ in toto opusculi corpore continetur, amaritiam, ludicra sanè est res, ali-

quid unâ manu liberaliter offerre, & alterâ a varè surripere.

QUINTA PROPOSITIO.

Quantum Dei Præceptum in positivum, & negativum minùs aptè dividitur.

Pater de Morales in suo Sinico opusculo quantum Dei præceptum, quod à Theologis inter positiva præcepta absolutè & simpliciter collocatur, illud in positivum, & negativum distinguit. Positivum eâ ratione declarat, ut si ejus doctrina de obsequio filiali cum eâ quâ Sinenses de eodem tradunt, comparetur, illa præ hâc valdè sterilis, & jejuna videtur, immò talibus loquendi formulis Autor utitur, ut pleræque ex libris Sinicis erutæ inveniantur, pauca scilicet de plurimis, quæ inibi extant ad filiale obsequium pertinentia.

Negativam autem hujus præcepti partem à se effictam Autor sic explicat.

.....
.....

Dupliciter textum hunc transferri oportet, nempe & juxta Patris de Morales privatam intentionem, & secundum publicam, & communem Sinarum, qui hunc textum legerint,

intelligentiam, juxtà dicti Patris intentionem sic vertitur.

Attamen quod prohibetur, tantummodò est vana res sacrificia defunctis hominibus offerendi, quia sacrificii oblatio soli Deo fieri potest.

Secundùm obvium & communem Sinarum conceptum sic transferri debet.

Attamen quod prohibetur, est vana res munera defunctis hominibus offerendi, quia sacrificii oblatio soli Deo fieri potest.

In hujus textûs versione, & Autoris mentem, & Sinarum intelligentiam circà litteram . . *Ci* duplicem sensum disjunctivè apposui: In utroque tamen sensu à debito loquendi modo ipse Autor declinat quàm maximè, vel enim Sinenfes hic per litteram *Ci* verum, & proprium sacrificium intelligunt, & sic malè explicatur alteri præterquàm soli Deo exhibiti sacrificii gravissima malitia, cùm dicatur hoc esse rem vanam, & supervacaneam, iste enim est sensus litterarum . . *Hui* . . *Su*, cùm reverà sit summè criminosa, & nefaria Idololatria, vel Sinenfes per eandem litteram *Ci* intelligunt munus genericè sumptum, & tunc est falsissimum, immò & valdè ridiculum asserere à Deo prohiberi munera defunctis offerre, cùm de facto ab ejus Ecclesia hoc agi olim, & modò permittatur. Quomodò ergò Autor potest asserere, & Sinenfibus denunciare dictorum munerum oblationem à Deo præceptivè interdici.

Prætereà notandum me nullatenùs argui posse, ex eo, quod litteram *Ci* ad Deum di-

rectam nomine sacrificii interpreter, & eandem ad defunctos relatum nomine muneris transferam, quia cum hæc littera sit æquivoca, & in religioso, vel politico sensu inter Sinas adhibeatur, juxta subjectam materiam diversimodè explicari, & verti opus est. v. g. cum hanc vocem *Canis* audio. Si de stellis loquamur, Syrium intelligo. Cum de animalibus agitur, belluam percipio, cum de cantu fit sermo, de canendo tunc agi percipio. Imò ex hoc contra P. de Morales & cæteros ejus affeclas argumentor, quia cum disputent de rebus omninò diversis, ut sunt verum, & in rigore acceptum sacrificium, & munera politica per æquivocationem vocis, & litteræ *Ci*, utrumque confundunt, & perpetuò paralogizant, videatur articulus I. capitis præsentis tractatûs.

SEXTA PROPOSITIO.

Nova, & nunquàm audita Dei mandata, circa defunctorum funera Neophytis proponuntur.

Pater frater de Morales in suo Sinico opusculo, apud me, pag. 2. sic inquit.

.....

Id est. Si contra filiorum vota Parentes vitâ defungantur quid agendum? Equidem necesse est, honorificè, & graviter ritus peragere funerales, nempe defuncti cadaver mortualibus vestibus componere, arcam ligneam ad condendum cadaver fortem, ac nitidam præparare, ejus sepultura locus elevatus sit, & siccus, lugubres vestes ex cannabe confectæ sunt induendæ, ad cordis commiserationem perfectè quidem, & fideliter demonstrandam, ne fiat, ut postea aliquid in hoc esse prætermisissum, oporteat pœnitere: hoc certè est quod Deus præcipit, planè ita est.

Si hæc verba in Sinico Patris de Morales opusculo clarissimè conscripta non extarent, quis unquàm ea, ex tanti viri ore excidisse credere auderet? In his igitur doctrinis ex traditionibus hominum, quæ apud Sinas pravâ non semel intentione involutæ reperiuntur, cum deberet Autor sedulò elaborare, ut pretiosum à vili, & superstitiosum à politico, & indifferenti secerneret sine ulla distinctione, & præmonitione omnia mixtîm tanquàm à Deo præcepta Neophytis indubitata assertionem proponit. Quidni nostro Autori non ineptè diceretur, quod habetur Jeremiæ c. 23. v. 28. *Propheta qui habet somnium, & qui habet sermonem meum, loquatur sermonem meum verè quid paleis ad triticum dicit Dominus?* Sed de his, quæ Autor Neophytis concedit, & Dei nomine præcipit, alibi plura.

SEPTIMA PROPOSITIO.

Quæ juxta Dei legem, vel P. de Morales sententiâ prohiberi debent ab eodem Neophytis faciliè conceduntur, & uæ Romæ ille damnari curaverat degens postea in Sinis approbat, & iisdem indulget.

Hic Autor in eodem opusculo pag. 1. facie 2. sic loquitur.

..... ?

Id est Annuatim statuto tempore, cùm recurrit solemnitas vocata . . Jo, & alia vocata . . La die natali parentum, die, quâ virilis pileus assumitur, & die nuptiarum filii parentibus fausta hilariter annuncient, & profundam exhibeant reverentiam.

Optimè iis verbis, vel saltem innocenter locutum se esse autor forsitan arbitrabitur, sed revera in illis dupliciter, & graviter labitur.

Primò enim concedit Sinensibus in gentilica solemnitate vocata Jo tanquàm in die magnæ lætitiæ suis parentibus fausta hilariter apprecari, illósque profundâ reverentiâ venerari. Non advertit autem, ut videtur, hanc diem esse supersticiosæ infidelium solemnitati consecratam, ideóque illicitum esse saltem sine protestatione Christianis ad illius lætitiâ, cujus

objectum est superstitiosum, concurrere. Legatur vocabularium Sinicum nomine . . *Chim* *Cu*, tum in explicatione litteræ . . *fo*, ibi enim dicitur hanc litteram inter alia significare tres dies anni, quorum primus, & secundus post solstitium æstivum occurrit, & tertius initio Autumni, deindè addit.

.

„ Id est in diebus vocatis *fo*, mali spiritus, „ sive lemures perambulant, ideóque totis illis diebus, homines se abscondunt, & domesticæ negotia non tractant. Hactenus vocabularium. Hi igitur dies apud Sinenses festivi habentur, & filii coram parentibus accedentes, illos genuflexo adorant, & fausta omnia eisdem apprecantur, ad eos hilariter consolandos, hoc enim significat illa littera . . *Kim*, in textu apposita.

Secundò in eodem textu Sinensibus Autor indulget, ut in illa duodecimo mensis die, quæ apud illos vocatur . *La*, illa ipsa, quæ superius relata sunt, reverentiæ faustæ acclamationis, & hilaritatis signa coram parentibus peragant. Hæc autem dies inter Sinas est festiva, eò quod ut aiunt vocabularia Sinica in explicatione hujus litteræ *La* tali die . . *Ci* . . *Sien* . . *Cu* id est, ut interpretari cogitur P. de Morales, sacrificia majoribus defunctis offeruntur. Cùm ergo secundum dicti Patris sententiam Sinensium munera majoribus defunctis oblata sint superstitiosa, & nefaria, cur eo die,

die, quo illa peraguntur Neophytis absolutè, & sine ulla protestationis mentione, si quid ea tunc valeat, ipse concèdit per supra relata lætitiâ, & faustas acclamationes ad ea concurrere, & cooperari? Cur ullum de ea re quæsitum sacris Romæ Tribunalibus non proposuit, immò è contra sine ulla, ut videtur conscientiæ titillatione Neophytis hoc permisit? Certum est, quod antiqua Ecclesia gentiles strenas, quæ Kalendis Januariis celebrabantur adeò abhorruit, ut in variis conciliis non tantum hunc superstitiosum ritum ptohibuerit, sed insuper strenarum diebus jejunia, & preces indixerit, & Alleluya cantari vetuerit, ut constat ex Concilio Tolet. 4. can. 11. & Concil. Turon. 2. can. 18. horum ratio assertur ab Augustino in psalmum 98. qui ait. *Ut quando ipsi, gentiles, letantur nos pro illis gemamus*, & etiam ab Ambrosio serm. 11. dicente, *ut quando illi epulantur, & lati sunt, tunc nos simus soli, atque jejuni, quo intelligant suam lætitiâ nostrâ abstinentiâ condemnari*. Videatur Basilii Pontius, qui de his copiosè, & eruditè agit in libro variarum disputationum parte 1. quæst. 2.

Ex supradictis ergò evidenter infertur, quod quæ juxta Dei legem, vel P. de Morales sententiam, debent Neophytis prohiberi, ab eodem P. eisdem liberaliter conceduntur, & quæ Romæ ille damnari curaverat, in Sinis postea degens approbavit, & Christianis indulxit.

OCTAVA PROPOSITIO.

Summis, & indebitis laudibus à P. de Morales, ejusque sociis extollitur Confucius, licet agnitus, sed falsò, ut primus Autor eorum rituum, quorum in Romana Curia damnationi urgeretur incubuit.

Pater de Morales citati Sinici opusculi, apud me, pag. 6. Sic loquitur.

.....

Id est erit sanè aliquis vir doctus, qui sic argumentari possit, & dicere. Equidem juxta ritus munera sic litteram Ci juxta doctorum virorum Sinensium intelligentiam interpretor, offerre, defunctis nonne hæc est doctrina Confucii: respondeo sex volumina, id est Sinensium sex antiqui, & classici libri sunt, naturali legi conformia commentaria. Cælum assumpsit Confucium, ut esset ligneum crepitaculum, alludit ad antiquum Sinarum morem ut quotannis quidam Præfectus ligneum crepitaculum tangens in publicis viis altâ voce sex morales sententias recitaret, ad homines

jamdiù exleges educendos , ideo illum legati munera fungentem misit ad surdos excitandos, & cecos expurgandos, notetur de cæcis expurgatis loquendi improprietas , ac si esset Dei precursor. Nunc verò naturam humanam Deus assumpsit , & per se ipsum magni sacrificii ritum stabilivit. Orto jam sole , ligneâ faculâ ex paleâ confectâ urî velle , hoc nonne est supervacaneus labor ? Hactenùs P. de Morales, in hoc textu quinque notatu dignissima inveniuntur.

Primò , & principaliter de immodicis laudibus Confucio attributis , quantum ad hoc pactum dictus P. suos habet contestes , & sequaces.

Primus contestis est ex eodem Ordine S. Dominici in libro sinicè conscripto , & Manilæ typis excusso cui titulus est.

.....

Id est Patris Dominici Lichoma , Europeum verum cognomen qualenam sit ignoro , de re-cta Dei lege facile lectu , & novitèr excussum commentarium.

Hic igitur autor dicti operis lib. 1. à pag. 110. & deinceps agit de Christi Domini imitatione à Christianis sedulò procuranda pag. verò 112. sic ait.

.....
.....
.....
.....

Id est, exempli gratia est qui dicat : *Iesus Christus ipse certè Deus, ego verò homo, & nihil amplius : ipse est valdè bonus, & magna virtute præditus, ego valdè inferior, imperitus, & valdè inferior vilis, & sanè inutilis, quomodo potero illum imitari ? Hoc verò difficile est : Si tamen Deus gratie munus conferat, & humanas vires adjuvet, difficile non erit. Comparisonem à Confucio sumamus, ipse sanè à Nativitate sapiens est, & sanctus vir hoc autem quomodo potuit obtinere ; si Deus hominibus distinctam rerum scientiam & ingenii perspicacitatem concedat, & discendi voluntas ab homine habeatur, tum demùm & poterit ille in pedes assurgere, & appropinquare ad Christi imitationem &c. Hactenus prædictus Autor.*

Circa hujus textûs styli, & locutionis intelligentiam quæso lectorem ne turbetur, si ibi Deus appelletur *Leao Xi*, quod propriè verri debet, homo quidam cognomine *Leao*. Itidem si nomen Jesu exprimatur per litteras *Si Su*, quæ propriè significant *Occidentis litterarum virum*, quâ phrasi nosmetipsos inter Sinas vocitamus. Item si nomen Christi Sinicè pronuncietur *Xichixetao*, cujus sensus est *Admirabilis viri vera lex*. Denique si gratia divina nominetur ni fallor, quod secundam litteram, quam in quatuor vocabulariis Sinicis non inveni *ya la xe*. Non proptereà inquam Lector turbetur neque miretur, quia hæ loquendi formulæ apud dictum

Autorem in explicandis Christianæ legis My-
steriis sunt passim usitatæ, licet reverà nec
materialiter sumptæ quoad vocum Sinicarum
sonum ullo modo Dei Jesu Christi, & gratiæ,
Europea nomina exprimant, & insuper sen-
sum in Sinenfi idiomate plurimum indecen-
tem efficiant, sed de his alibi plurima.

His ad majorem declarationem præmissis ad
citatum textum redeamus. Clarè patet Confu-
cium ibi vocari à nativitate sapientem, & vi-
rum sanctum verà propriâ, & supernaturali
sanctitate præditum, ut ex benè inter se col-
lato toto loci contextu legitimè inferri debet.
Si tamen Sineses litteratos viros, eorûmque
libros consulamus, nihil tale de Confucio po-
test in rigore affirmari. Probatum quia licet
quidam Sineses Confucium à nativitate sa-
pientem appellaverint, tamen ex libris Sini-
cis, & ex ipsiusmet Confucii expressis verbis
planè constat, ipsum habuisse Magistros, &
rerum scientiam paulatim usque ad senium
didicisse. Illud igitur de Confucii scientia ex
ipso ortu habita dictum, sumendum est, ut
hyperbolicè prolatum. Quoad sanctitatem ve-
rò si propriè sumatur est pariter falsum, illam
à Sinesibus Confucio tribui, præsertim jux-
tà scientiam nos impugnantium, qui Confu-
cio, & cæteris Sinesibus omnem Dei, futu-
ræ vitæ, & omnium supernaturalium noti-
tiam adimunt. Ex dictis itaque clarè evinci-
tur, quàm gratis dictæ sapientiæ & sanctitatis
encomiis in relato textu Confucius exornetur.

Secundus contestis est P. Fr. Antonius de

sancta Maria Ordinis S. Francisci , qui in libro Sinicè scripto , & typis mandato , cui ritulus est . . Tien . . Ju . In Id est , Cæli , seu Dei legis , & Sinensium litterariæ sectæ ad modum sigilli , & rei sigillatæ conformitas pag. 16. præterquàm quod Confucio defert nomen . . Xim , quod alibi eidem posse deferri acerrimè negat , & impugnat , eò quod putet illam litteram veram , & propriam sanctitatem significare , hæc etiam addit ad magnum Confucianæ laudis complementum.

. ? . . .

Id est. *Vir nomine y yum etiam inquit cælum assumpsit Confucium , ad hoc ut esset ligneum crepitaculum. Hinc simul intelligitur hoc quod est Confucium præsidere doctrinæ , ejusque promulgationi à superioris Cæli mandato præfici.*

Ex dictis patet , quænam encomia à tribus Sinicis scriptoribus utriusque Ordinis S. Dominici , & Francisci Confucio tribuantur , scilicet , quod sit ab ipsa Nativitate sapiens , & . . Xim , id est , proprii , & genuini Sinici sensûs metâ , & limitibus prætergressis , verâ propriâ , & supernaturali sanctitate præditus , à Cælo specialiter electus , & ad hominum Magisterio præsidendum delegatus , constitutus , & cui nihil addi posse præcellius videatur , alter Dei in carne venturi Præcursor.

Liceat modò hos Confucianos Encomiastas in illius laudibus tam exorbitanter profusos sic convenire. Summa veritas pronunciat. *Omnis arbor bona fructus bonos facit, mala autem arbor malos fructus facit, non potest arbor bona malos fructus facere, neque arbor mala, bonos fructus facere, ergo, aut facite arborem bonam & fructum ejus bonum, aut facite arborem malam, & fructum ejus malum.* Cùm igitur tam grandiloquis, & immoderatis laudibus ad sydera Confucius extollatur, & in nono quæsito P. de Morales sacrae Congregationi de propaganda Fide proposito Sinenses ritus circa cultum defunctorum ex tradita à Confucii doctrina processisse supponantur, cur quæso deinde idem P. in quæsito 13. eos omnes ritus illicitos esse supponit, eorùmque omnium condemnationem tantâ sollicitudine, & ardore obtinere curavit? difficulter sanè, ut videtur, viam sibi aperiat ad seipsum ab indissolubili per æternam veritatem confecto dilemate extricandum. Quomodò à manifesta contradictione immunem se eximet, dum in Romana Curia Confucium tantquam superstitionum, & Sinicae Idololatriæ erga defunctos Autorem vehementissimè accusat, & deprimat? Apud Sinas verò eundem tam prodigè effusis, & tantum maxime indebitis laudibus prosequitur, & exaltat? Sed ad textum P. de Morales initio hujus octavæ propositionis allatum revertamur.

Secundò in eodem textu dictus Autor sa-

ris clarè insinuat per institutionem sacrificii Missæ tanquàm ad ortum Solis mirabiliter coruscantis cætera omnia prisca sacrificia , inter quæ etiam Sinensium munera Confucio , & defunctis oblata adnumerari videntur. Si totus contextus benè perpendatur, tanquàm tenuissimas faculas conspici desuisse: immò cessasse, & evanuisse ; ergo ante institutum à Christo Domino Missæ Sacrificium , non solùm veteris legis sacrificia licita erant , sed etiam à Confucio , ut supponitur , sed falsò in honorem defunctorum apud Sinas instituta sacrificia erant pariter licita. Ex præmissis in textu propositis , hæc videtur inferri legitima consequentia. Sed contra sacrificia superstitiosa , & Idololatrica quocunque tempore sunt illicita , quia intrinsecè mala. Quomodo ergo à Confucio instituta sacrificia juxta P. de Morales intelligentiam loquor , ante Christi adventum fuisse licita supponuntur ?

Tertiò in eodem textu affirmatur , Sinarum sex libros antiquos , & classicos quos vocant . . *Lo . Xim* , esse leges naturæ conformes , ergo eorum doctrina , utpotè naturæ consona recta est , & in suo genere perfecta. Quomodò igitur à P. de Morales asseclis affirmari potest , Confucii , & priscorum Sinarum doctrinam esse merum Atheismum , cum lex naturæ dari Deum clarè convincat ? Prætereà cum denominatio à potiori sumatur , si quod est potius in lege naturæ Dei scilicet notitia priscis Sinensibus denegetur , quomodò illorum

illorum doctrinam esse legi naturæ conformem dici poterit ?

Quartò in eodem textu Deus sub cæli nomine appellatur , & de eo dicitur , quod Confucium in suæ legis promulgatorem , suum legatum , & præcursores elegerit. Immeritò igitur ab iisdem contrarium defenditur , Sinenfes scilicet sub Cæli nomine nullam divinitatem agnoscere , & per illud nihil nisi quid materiale significari.

Quintò ibidem falsò affirmatur , quod Confucius Sinenfes jamdiù exleges naturalem legem docuerit manifestè , hoc refellit idem Confucius in libro . . Lun . . ju initio Capitis per hæc verba.

.

Id est , Confucius ait : Ego refero , & non (meo Marte) compono , credo , & amo antiquos sapientes.

Commentator nomine . . Chu . . Hy hunc locum exponens sic ait in persona Confucii.

.

Id est. Refero , & promulgo antiqua , & nihil amplius.

Deinde idem Commentator ibidem fusè probat Confucium veterem doctrinam docuisse , nec aliquid novi protulisse ; ex quo patet falsum esse , quod P. de Morales

disertè asserit , jam diù exleges Sinas propriâ doctrinâ excoluisse.

De omnibus igitur , de quibus in hoc capite actum est Lectorem obsecro , ut suum ferat æquâ lance iudicium , an scilicet suspicio de malâ fide , quâ politicus Confucii & defunctorum impugnatur cultus , solidè nec nè per superius dicta multipliciter confirmetur.